

A Damira

A Damira

Kitabu Nin ye a Nan Fø Kuma Damira

Kitabu jen ye Tariku le ri men farini Nabi Musa la, ni a di fo a ma A Damira. Suran biloolu le ye a kondø. Suran biloolu wo di se a la talanan sidijama naanin.

Ka damira suran folona, ka ta se sura tan ni kelen ma wo ye dunuja dan ja le ri. Alla ka dunuja dan. Adama ni Hawa wo kera a la danni fen na ban de ri. A ka alu dan ka alu jamari waati taminnin kørø alu ka Alla la tøn tijan. Ka damira wo waati ma, adamadenilu ka tørøya damira. Kebi wo waati adamaden na ko bøe kera a juuman de. Adamadenilu la kojuu danna taminda, alu ka hake sørøn Alla la. Alla ka a latee ko a ri dunuja tijan sanci ba la. Miriya wo bøni Alla seniman de rø. Julumun bøyani Alla ye ka a dan natamin. Køni Alla la kininkinin kosøn a ma søn adamaden bøe halaki la. Wo rø, a ka Nabi Nuhan a ni sobo su bøe ladon kulunba kondø ka alu kisi halaki ma.

Ka bo suran tan ni fila ma ka se suran muwan ni loolu ma, tariku le ri men farani Nabi Iburahima la. Alla ka Nabi Iburahima suwandi ka a ke møø ri men di se adamaden bøe madonnala. A ka baraka don a la ko rø, a ri ke jama siyaman benba ri. A ka lahidi ta a ye. A ka Kanaan jamana lahidi Isirayeli ni a bønsøn le ye. Køni lahidi wo ti se mafala fo Iburahima wa dence sørøn waati men na. Iburahima muso Saran wa yen ko a ti se den sørønna tuma men na, a ka a la jønmuso Hajara di a la ce ma. Wo ka Isumayila sørøn Iburahima

yε. Kəni Alla ma sən Isumayila ye kε a cətala ri. A ka Isiyaka di Iburaḥima ni Saran ma ala məəbaya waati le rɔ. A ka lahidi kelen wo ta Isiyaka yε, a ka mən ta Iburaḥima yε.

Ka bə suran muwan ni wərən ka se suran bisawa ni wərən, wo tariku le ri farani Nabi Isiyaka ni Nabi Yakuba la. Rebeka ka filani sərən Isiyaka yε. Alla sənda Yakuba, mən sərənda to la, wo ri a kərəcε Esawu cəta a bolo. Esawu ka wo lən mən kε, a loo tere ye a la ka a dooce Yakuba faa. Wo fanan ka a bori a kərə ka wa a barince wara, a na kərəcε kənən. A tora ye, a ka Leya ni Rasayeli furu. Alu ka dence məə tan ni fila sərən a yε. Dence məə tan ni fila woilu kəra kabila tan ni fila le benba ri mən bəni Isirayəlika rɔ.

Ka bə suran bisawa a ni wərəəfila ma ka se suran biloolu ma, wo ye Nabi Yusufu la tariku le ri. Yakuba dence Yusufu tere ma di a kərəcəilu yε. Ka bən Alla la kibaro mən la Yusufu ja ma a tere ye kəkərə alu la mansa ri. Wo bolo ma alu ka a majiira janya rɔ Misirrankailu ma. Kəni Alla sənda Yusufu la ko ma ko a ye kε Misiran jieməəba ri. Alla ka a yiraka a ye ko a ri dunuja bəε kisi kənkəba ma, kənkə mən dontə. San wərənwula tamin kərə, kənkəba a ri dunuja bəε mira. Kənkə ti don na Misiran kelen pe le rɔ, ka a bən Yusufu la ko ma. Ni Yakuba ka a denceilu lawa Misiran balojinin diya, woilu ri Yusufu yen jamana wo kəndə. Yusufu ka a la məəilu lana Misiran ka alu kisi kənkəba ma.

An di hankili sərən kitabu jin ma. Alla ya a jərε yirakala tariku jin de rɔ. Alla la fanka ka bon fen bəε ri. A ye a fe adamadenilu ye latelenbaya kε. Julumun bəyani Alla yε ka a dan natamin. Alla ye

julumun tiilu kiti la alu la julumun de la. Koni a ti sɔn ka adamadenilu halaki. Adamaden duman a yε. A ye a fε ka alu dεmεm ka alu tubi ka alu kisi, ka a bεn a la kaninteya ma. Sila jin yirakani Alla la kitabu fɔlɔ le rɔ.

Alla ye an dεmen an ye wo bεε lɔn. An di se kεla a dujɔɔn bεrε ri jna mεn ma. Allama wo kεra. Amina.

Alla ka dunuya dan ja mεn ma

¹ Fɔlɔfɔlɔ, Alla ka sankolo dan ka duukolo dan, ² kɔni duu rajani tere tε waati wo rɔ. Fen fen tere sa a kan. Ji dunba le tere a yɔrɔ bεε rɔ, a ni dibi. Alla la Ni tere ye taa ni seyi kεla ji kunna san ma. ³ Alla ka a fɔ ko: «Kεnε ye bɔ!» Kεnε bɔra. ⁴ Alla ka a yen ko kεnε ka jni. A ka kεnε ni dibi fara i jɔɔn na. ⁵ A ka kεnε kili ko tele, ka dibi kili ko su. Nba, su kora ka kεnε bɔ. Wo kεra lon fɔlɔ ri.

⁶ Alla kumara ikɔ ko: «Dan ye ke jilu tεma, ka alu fara i jɔɔn na.» ⁷ Wo kεra. Ji mεn tere san ma, a ni mεn tere duu ma, a ka woilu fara i jɔɔn na, ka kεnεgbε ladan alu tεma. Alla ka a fɔ ja mεn ma, a kεra ten. ⁸ A ka kεnεgbε kili ko san. Nba, su kora ka kεnε bɔ. Wo kεra lon filana ri.

⁹ Alla kumara ikɔ ko: «Ji mεn ye san kɔrɔ, wo bεε ye laden yɔrɔ kelen dɔ, kosa gbelemala ri bɔ gbe ma.» A ka a fɔ ja mεn ma, a kεra ten. ¹⁰ A ka gbelemala wo kili ko duu, ka ji ladenni kili ko kɔɔji. Alla ka a yen ko wo ka jni.

¹¹ Nba, a ka a fɔ ko: «Binilu ni sumanilu ye fεrεn duu kan ka alu kiseilu labɔ ka kε si ri. Jiri denta su bεε fanan ye bɔ, mεn ye kise ni kolo kεla alu den dɔ.» Alla ka a fɔ ja mεn ma, a kεra ten. ¹² Duu ka bin su bεε labɔ, mεn ye kise kεla. Jiri denta su bεε

fanan bɔra, mɛn ye kisɛ ni kolo kɛla alu den dɔ. Alla ka a yen ko wo ka jni. ¹³ Nba, su kora ka kɛnɛ bɔ. Wo kɛra lon sawana ri.

¹⁴ Alla kumara ikɔ ko: «Kɛnɛbɔlan ye bɔ san dɔ, ka tele ni su fara i jɔɔn na. Woilu ye sali lonilu yiraka, a ni lon damira ni san damira. ¹⁵ Woilu ye kɛ san dɔ, ka kɛnɛ labɔ duu kan.» Alla ka a fɔ ja mɛn ma, a kɛra ten. ¹⁶ Alla ka kɛnɛbɔlan belebele fila raben, tele ni karo. Woilu rɔ bonba ba, tele kɔnin, Alla ka wo lasii lon kun na. Mɛn dooman, karo kɔnin, a ka wo lasii su kun na. A ka loloilu fanan dan. ¹⁷ A ka kɛnɛbɔlan woilu kɛ san dɔ, kosa alu ri kɛnɛ labɔ duu kan. ¹⁸ A ka alu lasii tele ni su kun na, ka kɛnɛ ni dibi fara i jɔɔn na. Alla ka a yen ko wo ka jni. ¹⁹ Nba, su kora ka kɛnɛ bɔ. Wo kɛra lon naaninna ri.

²⁰ Alla kumara ikɔ ko: «Nimafen ye kɛ ji rɔ ka siyaya kosebe. Kɔnɔilu ye alu gban san ni duu tɛ.» ²¹ A ka ji rɔ nimafen belebelebailu dan, a ni ji rɔ nimafen tɔ bɛɛ. Fen woilu bɛɛ kera ji rɔ ka siyaya, a bɛɛ ni a su. A ka kɔnɔ su bɛɛ fanan dan. Alla ka a yen ko wo ka jni. ²² A kumara ka baraka don alu rɔ. A ka a fɔ ko: «Ai ye jiri ka siyaya kɔɔji fan bɛɛ rɔ.» A ka a fɔ kɔnɔilu ye ko: «Ai ye jiri ka siyaya duukolo kan.» ²³ Nba, su kora ka kɛnɛ bɔ. Wo kɛra lon looluna ri.

²⁴ Alla kumara ikɔ ko: «Nimafen su bɛɛ ye kɛ duu kan, so kɔndɔ kolofenilu wo, waa rɔ soboilu wo, ni nimafen misen mɛn ye taamala duu ma, a bɛɛ ni a su!» A ka a fɔ ja mɛn ma, a kɛra ten. ²⁵ Waa rɔ sobo ni so kɔndɔ kolofen ni nimafen misen mɛn ye taamala duu ma, a ka woilu su bɛɛ dan. Alla ka a yen ko wo ka jni.

²⁶ Wo kɔ, Alla ka a fɔ ko: «An di adamaden dan ka a kε an munuja ri, ka a su sudunya an jnɔen na. Alu ri alu sii duu bεε kun na, ka alu sii jεε kun na, a ni kɔnɔilu ni kolofenilu ni nimafen misen mɛn ye taamala duu ma.» ²⁷ Nba, Alla ka adamaden dan ka a kε a jεrε munuja le ri. Wo rɔ, a ka cε dan, ka muṣo fanan dan. A ka adamaden dan ten de. ²⁸ Alla kumara ka baraka don alu rɔ. A ka a fɔ ko: «Ai ye jiri ka jensen duu fan bεε rɔ, ka ai la fanka sii duu kan. Ai ye ai sii jεε ni kɔnɔilu ni nimafen tɔilu bεε kun na.»

²⁹ A ka a fɔ alu yε ko: «Duu suman su su, n da wo bεε di ai ma. Ka a la wo kan, jiri denta fen fen ye duu kan, n da wo fanan bεε di ai ma, mɛn ye kisε ni kolo kela alu denilu rɔ. Wo bεε ri kε ai balo ri. ³⁰ So kɔndɔ kolofenilu ni waa rɔ soboilu ni kɔnɔilu ni nimafen misen mɛn ye taamala duu ma, nimafen bεε kɔnin, n da bin ni fira bεε di woilu ma ka kε alu balo ri.» Nba, a ka a fɔ ja mɛn ma, a kεra ten. ³¹ Alla ka dalifen mɛn dan, a ka a yen ko wo ka ji bake. Nba, su kora ka kεne bɔ. Wo kεra lon wɔɔrɔna ri.

2

¹ Nba, sankolo ni duukolo ni ie kɔndɔfen bεε danda ja mɛn ma, wo le wo ri. ² Tele wɔɔrnwulana sera ka a teren Alla ra ban baarala. A ka a la baara bεε ban tele wɔɔrɔ wo le kɔrɔ. Tele wɔɔrnwulana lon, a ka jnɔn wo lon. ³ Alla ka tele wɔɔrnwulana bonya ka a bɔ lon tɔilu ma, ka a masɔrɔn a ma baara si kε wo lon.

Alla ka cε dan ja mɛn ma

⁴ Nba, Alla ka sankolo ni duukolo dan ja mɛn ma, wo le ye jnɔn di. Allabatala Alla ka sankolo ni duukolo dan tuma mɛn na, ⁵ bin ni jiri tun tε

duukolo kan fɔlɔ, baa Allabatala Alla tun ma sanci lana duu kan fɔlɔ. Mɔɔ si tun tε ye fɔlɔ ka duu sεnε fanan. ⁶ Ji le tεrε bɔla duu kɔrɔ ka duu yɔrɔ bεε sɔ.

⁷ Allabatala Alla ka duu buuri ta ka adamaden dabεn wo la. A ka jnεnemaya fɔjɔ fe adamaden nunwo rɔ. Wo rɔ, adamaden wo kera nima ri.

Edεni jamana nakɔjuma

⁸ Nba, Allabatala Alla ka nakɔ labɔ Edεni jamana rɔ, mεn ye telebɔ fan fe. A tun ka adamaden mεn dan, a ka wo bila nakɔ wo kɔndɔ. ⁹ Allabatala Alla ka jiri su bεε laferen yɔrɔ wo rɔ, jiri mεnilu ka jni kosebε. Alu den duman. A ka jiri su fila gberε laferen nakɔ tema. Kelen tεrε jnεnemaya jiri ri. A tɔ kelen tεrε mɔɔ lalɔnnijala kojuma ni kojuu faranfaasi la.

¹⁰ Ba do tεrε bɔni Edεni jamana rɔ ka latamin nakɔ wo rɔ, mεn ye a yɔrɔ bεε sɔla ji la. A bɔ mεn kεni nakɔ wo rɔ, a farara ka kε ba bolo naanin di. ¹¹ Ba fɔlɔ tɔɔ ko Pison. Wo ye woyenna ka Habilja jamana laminin. Sanin ye bɔla jamana wo rɔ. ¹² Sanin wo ye sanin jerewolo le ri. Jiri kasila latiklɔnnaman fanan ye ye. Kaba do fanan ye bɔla ye, mεn tɔɔ ko onikisi. ¹³ Ba filana tɔɔ ko Kiyɔn. Wo le ye woyenna ka Kusi bɔnsɔn na jamana bεε laminin. ¹⁴ Ba sawana tɔɔ ko Tikire. Wo le ye woyenna ka wa Asiri so telebɔ fan fe. Ba naaninna tɔɔ ko Efirati.

¹⁵ Nba, Allabatala Alla ka adamaden bila Edεni nakɔ jnuma rɔ, ko a ye a sεnε ka a janto a rɔ.

¹⁶ Allabatala Alla ka a fɔ a yε ko, «Jiriden damunta fen fen ye yan, i ye wo bεε damun. ¹⁷ Kɔni, jiri mεn ye mɔɔ lalɔnnijala kojuma ni kojuu faranfaasi la,

i kana wo den damun de! Ni i ka a damun lon men na, i ri faa.»

Allabatala Alla ka muso dan ja men ma

¹⁸ Wo ko, Allabatala Alla ka a fo ko, «Ka ce to a kelen na, wo ma ni. N di a demenba raben, men di ben a ma.»

¹⁹ Wo ro, Allabatala Alla ka sobo su bee ni kono su bee dan duu buuri la, ka alu bee lana ce ma, kosa a ri alu kelen kelen na bee too la. A ka too menilu fo, wo ilu kera alu too ilu ri. ²⁰ Ce ka too la so kondo kolofen ni kono ilu, ni waa ro soboilu bee la. Koni a demenba ma soron wo ilu ro, men benni a ma komin.

²¹ Wo ro Allabatala Alla ka sunoo ba don ce ja ro. A sunoora. Ka a to sunoo ro, Allabatala Alla ka barasa kolo kelen ta ce fari ro, ka sobo bila wo no ro ka a da tuun wo la. ²² Allabatala Alla ka barasa kolo wo ta ka muso raben, ka na muso di ce ma. ²³ Ce kan ko: «A koloilu boni n koloilu le ro. A fari boni n fari le ro. N di a too la ko muso, ka a masoron a boni ce le ro.»

²⁴ Wo le koson, ce ri mataa a fa ni a na la, ka to a muso fe. A fila ri ke mo kelen di.

²⁵ Nba, wo tuma ce ni a muso fila bee fari makolon de ter, koni fari makolontoya maleya tun te alu la.

3

Ce ni muso ka Alla la ton tipan

¹ Nba, Allabatala Alla ka waa ro sobo menilu dan, duuma sa le kiwoyani ter wo to bee ri. Lon do ro, sa ka a fo muso ye ko: «Tuja le, Alla ka a fo ko, «Ai kana nakonuma jiriden si damun?»» ² Muso ka a jabi: «A sonni an ye nakonuma jiriden damun.

³ Koni jiri men ye nakonuma tema, Alla ka a fo an

yε ko, «Ai kana wo le den damun. Ai kana ai maa a la. Ni ai ka ai maa a la, ai ri faa.»» ⁴ Sa ka a fɔ muso yε ko: «Tuja tε wo rɔ. Ai tε faa fewu! ⁵ Alla ka lɔn ko ai wa jiriden wo damun lon mɛn na, ai ri kε hankilimailu ri. Ai ri kε iko Alla, ka kojuma ni kojuu faranfaasi lɔn.»

⁶ Muso ka a yen ko jiriden wo ka ji, a duman kosebε. A ka a yen fanan ko jiriden wo ri mɔɔ kε hankilima ri. Wo rɔ, muso ka do kadi ka a damun, ka do di a cε ma, mɛn lɔni a tɔrɔfε. Wo ka a ta ka a damun. ⁷ Alu banni a damunna, alu ka hankili sɔrɔn ka alu jεre yen ja gberε ma. Alu ka a yen ko alu fari makolon de. Alu ka toro firailu kara ijɔɔn na ka alu kε feriyabɔ ri ka alu jεre sutura.

⁸ Nba, wura fε, Allabatala Alla tεre ye a mataamala nako jnuma rɔ, fɔjɔ ri tεe dooni dooni waati mɛn na. Cε ni a muso ka a natɔla kan mɛn ka ibori a kɔrɔ ka wa alu dokon Alla ma jirilu tεma. ⁹ Allabatala Alla ka a kan nabɔ cε ma ko: «I ye mi?» ¹⁰ Cε ka a jabi: «N ka i natɔla kan mɛn nako jnuma rɔ tuma mɛn na, n silanda, baa n fari makolon de. Wo le kosɔn, n ka n dokon.» ¹¹ Allabatala Alla kan ko: «Yon de ka a fɔ i yε ko i fari makolon de? N ka tɔn sii jiri mɛn na, i ra wo le den damun wa?» ¹² Cε kan ko: «I ka muso mɛn di n ma, wo le ka jiriden wo di n ma. N ka a damun.» ¹³ Allabatala Alla ka a fɔ muso yε ko: «I ka nfen kε jin di?» Muso kan ko: «Sa le ka n manεen ka n loo a damunna.»

Allabatala Alla ka bɔnɔ la mɔɔilu kan

¹⁴ Allabatala Alla ka a fɔ sa yε ko: «I ra wo kε. Wo le kosɔn, n di tɔrɔya la i kan ka tamin kolofen ni waa rɔ sobo bεε kan. Sisen i ri i sɔmɔn i kɔnɔ kan, ka buuri damun i la dunujarateε bεε rɔ. ¹⁵ N di juuya

bila i ni muso tε, ka a bila i bɔnsɔn ni a bɔnsɔn tε. A ri i kun gbasi. I fanan di a sen tintiri gbasi.»

¹⁶ Allabatala Alla ka a fɔ muso yε ko: «N di do la i la tin tɔrɔya kan. I ri i la kɔnɔmaya bεε kε dun ba rɔ. A loo ri kε i la, ka sii i cε kun na, kɔni i ri to a fanka kɔrɔ.»

¹⁷ Allabatala Alla ka a fɔ Adama yε ko: «I ra i muso kan lamɛn ka jiriden damun, n ka tɔn sii men na ko i kana a damun. Wo rɔ, n di duu tijan ile kosɔn. Duu te sɔn ka i balo di i ma fo i wa baara siyaman kε. A ri kε wo ja i la dunujaratee bεε rɔ.

¹⁸ Tiriwonin ni bin juu ri feren duukolo kan kɔni i balo ri kε sɛnɛsumanilu ri. ¹⁹ I te balo sɔrɔn ni i ma wasi. A ri kε wo ja haan i wa i kɔseyi duu rɔ, i danni duu men dɔ kɔnin. I kɔseyitɔ buuri wo le rɔ, baa i bɔni buuri le rɔ.»

²⁰ Nba, Adama ka a muso tɔɔ la ko Hawa, baa ale le kɛra mɔɔ bεε na ri. ²¹ Allabatala Alla ka gbolo doilu ladan ka woilu kε durukibailu ri ka alu bila Adama ni a muso kan na. ²² Allabatala Alla kan ko: «Awa, cε ra kε iko an do le, ka kojuma ni kojuu lɔn. A kana a bolo rasɔmɔn ma jnɛnɛmaya jiri ma ka a den kadi ka a damun. Ni a ka a damun a ri to jnɛnɛma rɔ habadan.» ²³ Wo rɔ, Allabatala Alla ka alu labɔ Edɛni nakɔjuma rɔ, ko alu ye wa duu sɛnɛ, Alla ka alu dan duu men dɔ. ²⁴ Nba, Allabatala Alla ka Adama ni Hawa gben ja wo le ma. A ka mɛlekailu lalɔ nakɔjuma donda la telebɔ fan fe. A ka fanmuru fanan bila ye, ta ye mɛnɛnna men na. Fanmuru tama wo ye mininmininna tuma bεε. A ka woilu bila le ye, kosa mɔɔ si kana tamin ka wa jnɛnɛmaya jiri ma.

Kabila ni Abila

¹ Nba, nbenba Adama ni a muso nma Hawa denda. Nima Hawa ka kɔnɔ ta ka Kabilia sɔrɔn. A kan ko: «Allabatala da n dəmən ka dence sɔrɔn.» ² Wo kɔ, a ka kɔnɔ ta ikɔ tuun ka Kabilia dooce Abila sɔrɔn. Abila kera kolofengbengbenna ri. Kabilia kera sənekela ri.

³ Lon do rɔ, Kabilia ka a la sənɛsuman doilu ta ka na a la sɔ ka na woilu di Allabatala ma. ⁴ Abila fanan ka a la saa doilu di Allabatala ma. Saa woilu tɛrɛ alu na den fɔlɔ le ri. Abila ka alu kannatɛɛ ka Allabatala sɔ alu ken dɔ. Abila ni a la saraka diyara Allabatala yε. ⁵ Kɔni Kabilia ni a la saraka ma diya Allabatala yε. Kabilia mɔnɛra wo rɔ kojuuya, ka a na wulen kosebɛ!

⁶ Allabatala ka a fɔ Kabilia yε ko: «Nfɛnna i ye mɔnɛla foo ka i na wulen ten? ⁷ Ni i ka kojuma kε, n di n ban i rɔ wa? Ni i ma kojuma kε, kojuu a ri kε ikomin wara, mɛn ye i makɔnɔla i la bon da la. A loo ri kε a la, ka sii i kun na, kɔni i kana sɔn a rɔ le, fo i ye se a la le.»

⁸ Nba, Kabilia ka a fɔ a dooce Abila yε ko: «An ye wa waa rɔ.» Alu sera ye tuma mɛn na Kabilia bera a dooce kan ka a faa.

⁹ Allabatala ka a fɔ Kabilia yε ko: «I dooce Abila ye mi?» Kabilia kan ko: «N ma a diya lɔn. Nde le a kɔnɔgbɛnba ri wa?» ¹⁰ Allabatala kan ko: «I ka nfɛn kε jin? I dooce jeli bɔtɔla kule kan bɔra duu ma ka se n ma yan, ko ka a ta sara i la. ¹¹ Sisen, n di tɔrɔya la i kan. I wa fen fen sənɛ, a tε sɔn butun, baa i ra i dooce jeli le bɔ ka ke duu wo kan. ¹² I wa duu sənɛ, i tε suman foyi sɔrɔn a rɔ. I ri kε mɔɔ ri, sii yɔrɔ kelen tε mɛn bolo.» ¹³ Kabilia ka a fɔ Allabatala yε ko: «I ra n jahadi mɛn la n kan, wo ka bon ka

tamin. N ti se wo kɔrɔ. ¹⁴ A ragbɛ! I ra n gbɛn ka bɔ duu kan bi. Fo n ye wa n dokon ka n bɔ i jnakɔrɔ, ka ke mɔɔ ri, sii yɔrɔ kelen te men bolo. Men wa n sɔrɔn wo ri n faa.» ¹⁵ Allabatala ka a fɔ Kabilia yɛ ko: «Ni mɔɔ mɔɔ ka Kabilia faa, n di i jeli sara wo la sijna wɔrɔnwula.» Allabatala ka a tɔɔmasere la Kabilia kan, sa mɔɔ men wa a yen, wo kana a faa.

¹⁶ Wo rɔ, Kabilia bɔra Allabatala jnakɔrɔ ka wa i sii Nodi jamana rɔ, men ye Edeni jamana telebɔ fan fɛ.

Kabilia bɔnsɔn

¹⁷ Nba, Kabilia ni a muso dɛnda. A muso ka kɔnɔ ta ka dence sɔrɔn. A ka wo tɔɔ la ko Enɔki. Wo sɔrɔn kɔ, Kabilia ka so do sii ka wo tɔɔ la a dence Enɔki la. ¹⁸ Enɔki ka Iradi sɔrɔn. Iradi ka Metujayeli sɔrɔn. Metujayeli ka Metusayeli sɔrɔn. Metusayeli ka Lemeki sɔrɔn.

¹⁹ Lemeki ka muso fila ta. Kelen tɔɔ ko Ada. A tɔ kelen tɔɔ ko Tisila. ²⁰ Ada ka dence sɔrɔn ka wo tɔɔ la ko Jabali. Mɔɔ menilu ye alu siila faaninbonilu la ka alu la kolofenilu kɔnɔgbɛn, Jabali kera wo bɛɛ benba ri. ²¹ Jabali dooce le Jubali ri. Wo le kera korafɔla ni fulefɔla bɛɛ benba ri. ²² Tisila fanan ka dence sɔrɔn ka wo tɔɔ la ko Tubali Kabilia. Wo kera numun di. A tere ye sula ni neɛfin nadanna. Tubali Kabilia doomuso tɔɔ ko Nama.

²³ Lon do rɔ, Lemeki ka a fɔ a musoilu yɛ ko:
«Ada ni Tisila, ai ye n kan namɛn.

Ai, Lemeki musoilu, ai ye ai tolo malɔ n na kuma la.

Cɛ men ka n madimin, n da wo faa.

Kanberen men sera n ma, n da wo faa.

²⁴ A fɔra ko ni mɔɔ men ka Kabilia faa, a julu ri sara wo tii la sijna wɔrɔnwula.

Koni Lemeki la julu ri sara foo siŋa biwərənwula ni siŋa wərənwula.»

Seti ni Enosi

²⁵ Nba, Adama ni a muso dənda. A muso ka kənɔ ta ka dence sərən ikə tuun. A ka wo təo la ko Seti, baa a kan ko: «Alla ra dence gbərə di n ma Abila nɔ rɔ, Kabilia ka mən faa kənin.»

²⁶ Nba, Seti fanan ka dence sərən. A ka wo təo la ko Enosi. Məɔilu ka Allabatala tara damira Enosi tele le rɔ, ko a ye alu dəmən.

5

Adama bənsən

¹ Adama bənsən təo le səbeni jin di.

Alla ka məɔ dan lon mən na, a ka a dan ka a kε a jere munuja le ri. ² A ka alu dan ka alu kε cε ni muso ri. A banni alu danna, a kumara ka baraka don alu rɔ ka alu təo la ko məɔ.

³ Adama sərən ka san kəmə ni san bisawa bɔ tuma mən na, a ka dence sərən, mən kəra a la munuja ri. Adama ni a dence tərə su kelen de ri. A ka a təo la ko Seti. ⁴ Seti sərən kɔrɔ, Adama ka san kəmə seyin de kε, ka dence ni denmusoilu sərən.

⁵ A si san bεε ladənni kəra san kəmə kənəndə ni san bisawa le ri. Wo dafanin, a sara.

⁶ Seti si ka san kəmə ni san loolu bɔ tuma mən na, a ka dence sərən. A ka wo təo la ko Enosi.

⁷ Enosi sərən kɔrɔ, Seti ka san kəmə seyin ni san wərənwula le kε, ka dence ni denmusoilu sərən.

⁸ Seti si san bεε ladənni kəra san kəmə kənəndə ni san tan ni fila le ri. Wo dafanin, a sara.

⁹ Enosi si ka san bikənəndə bɔ tuma mən na, a ka dence sərən. A ka wo təo la ko Kenan. ¹⁰ Kenan sərən kɔrɔ, Enosi ka san kəmə seyin ni san tan ni

loolu le ke, ka dence ni denmusoilu sərən. ¹¹ Enosi si san bəe ladənni kəra san kəmə kənəndə ni san loolu le ri. Wo dafanin, a sara.

¹² Kenan si ka san biwərənwula bə tuma mən na, a ka dence sərən. A ka wo təə la ko Malaleli. ¹³ Malaleli sərən kərə, Kenan ka san kəmə seyin ni san binaanin de ke, ka dence ni denmusoilu sərən. ¹⁴ Kenan si san bəe ladənni kəra san kəmə kənəndə ni san tan de ri. Wo dafanin, a sara.

¹⁵ Malaleli si ka san biwərə ni san loolu bə tuma mən na, a ka dence sərən. A ka wo təə la ko Yəredi. ¹⁶ Yəredi sərən kərə, Malaleli ka san kəmə seyin ni san bisawa le ke, ka dence ni denmusoilu sərən. ¹⁷ Malaleli si san bəe ladənni kəra san kəmə seyin ni san bikənəndə ni san loolu le ri. Wo dafanin, a sara.

¹⁸ Yəredi si ka san kəmə ni san biwərə ni san fila bə tuma mən na, a ka dence sərən. A ka wo təə la ko Enəki. ¹⁹ Enəki sərən kərə, Yəredi ka san kəmə seyin de ke, ka dence ni denmusoilu sərən. ²⁰ Yəredi si san bəe ladənni kəra san kəmə kənəndə ni san biwərə ni san fila le ri. Wo dafanin, a sara.

²¹ Enəki si ka san biwərə ni san loolu bə tuma mən na, a ka dence sərən. A ka wo təə la ko Metusalemu. ²² Metusalemu sərən kərə, Enəki ka san kəmə sawa le ke Alla la dən də, ka dence ni denmusoilu sərən. ²³ Enəki si san bəe ladənni kera san kəmə sawa ni san biwərə ni san loolu le ri. ²⁴ Enəki mənda Alla la dən də. A tunura ka a masərən Alla ka a ta ka wa a ri.

²⁵ Metusalemu si ka san kəmə ni san biseyin ni san wərənwula bə tuma mən na, a ka dence sərən. A ka wo təə la ko Lemeki. ²⁶ Lemeki sərən kərə, Metusalemu ka san kəmə wərənwula ni san biseyin ni san fila le ke, ka dence ni denmusoilu sərən. ²⁷ Metusalemu si bəe ladənni kera san kəmə

kɔnɔndɔ ni san biwɔɔrɔ ni san kɔnɔndɔ le ri. Wo dafanin, a sara.

²⁸ Lemeki si ka san kɛmɛ ni san biseyin ni san fila bɔ̄ tuma mɛn na, a ka dence sɔrɔn. ²⁹ A ka wo tɔ̄ la ko Nuhan. A ka a fɔ̄ ko: «Allabatala ka duu tijan ka an bila baara gbelen dɔ̄. Kɔni cɛ pɔ̄n de kɛtɔ̄ an masabarila baara gbelen jusukasi kosɔn.» ³⁰ Nuhan sɔrɔn kɔrɔ, Lemeki ka san kɛmɛ loolu ni san bikɔnɔndɔ ni san loolu le kɛ, kɔ̄ dence ni denmusoilu sɔrɔn. ³¹ Lemeki si bɛ̄e ladenni kera san kɛmɛ wɔrɔnwula ni san biwɔrɔnwula ni san wɔrɔnwula le ri. Wo dafanin, a sara.

³² Nuhan ka san kɛmɛ loolu sɔrɔn tuma mɛn na, a ka Sɛmu ni Kamu ni Jafeti sɔrɔn.

6

Alla ka adamadenilu halaki alu la kojuu kosɔn

¹ Nba, mɔɔilu tɛrɛ ye siyaya la duukolo kan tuma mɛn na, alu ka denmusoilu sɔrɔn. ² Wo kɛni, Alla denceilu ka alu ja lɔ̄ denmuso woilu rɔ̄ ka a yen ko woilu kɛni kosebe. Mɛnilu diyara alu yɛ, alu ka woilu ta ka alu kɛ alu musoilu ri. ³ Wo le rɔ̄, Allabatala kan ko: «N ka n na ni don mɔɔilu rɔ̄, kɔni n tɛ sɔ̄n a ye mɛn alu rɔ̄ foo habadan, baa alu tɛ foyi ri fo fari banku, fen banta kɔnin. Alu si san bɛ̄e ladenni tɛ tamin san kɛmɛ ni san muwan kan.»

⁴ Alla denceilu sera mɔɔilu denmusoilu matuma mɛn na, woilu ka kɔnɔ ta ka deni sɔrɔn. Den woilu kera mɔɔilu jan belebele ri, mɛnilu tɔ̄ ko Nefilimu. Kebi waati taminni, woilu kera cɛ fadiyani ri. Alu tɔɔilu bɔ̄ra kosebe.

⁵ Allabatala ka a yen ko adamadenilu kɔnɔrɔjuuya ra wara dunujia rɔ̄. A ka a yen ko fen si tɔ̄ adamadenilu jusu rɔ̄ fo miriyajuu tuma

bεε. ⁶ Allabatala nimisara adamadenilu dan ko rɔ duukolo kan. A sewani tun tε. ⁷ A kan ko: «N da mɔɔ menilu dan, n di woilu halaki ka alu bɔ duukolo kan. Adamadenilu wo, kolofenilu wo, waa rɔ soboilu wo, kɔnɔilu wo, ni nimafen misen menilu ye taamala duu ma, n di wo bεε halaki ka a masɔrɔn n da nimisa alu dan ko rɔ.» ⁸ Kɔni Nuhan diyara Allabatala yε.

⁹ Nuhan bɔnsɔn de jin di. Nuhan de tεrε mɔɔ telenni ri. A kelen de ma kojuu ke a la waati rɔ. A mɛnda Alla la dɛn dɔ. ¹⁰ A ka dencε sawa sɔrɔn, Sɛmu ni Kamu ni Jafeti.

¹¹ Wo tuma, juuya warani fan bεε Alla jnakɔrɔ duukolo kan. Mɔɔilu karagbεleman tεrε i jnɔɔn na fan bεε rɔ. ¹² Alla ka a yen ko duukolo ra tijnan juuya la. Mɔɔ bεε kewali ra juuya foo ka a dan natamin. ¹³ Wo rɔ, Alla ka a fɔ Nuhan yε ko: «N da a lateε ko mɔɔilu bεε ri halaki n bolo, baa karagbεleya ra jenseñ alu bolo foo ka duukolo fa. N kεtɔ alu bεε ni duukolo halakila i jnɔɔn fe le. ¹⁴ Wa jiri jnuma ninin ka kulunba rabεn i jere yε. I ye a kɔndɔ ratala ka a ke bonkɔndɔilu ri, ka ban ka a kɔndɔla ni a kɔkanna bεε mamun tulubɔ fasani la. ¹⁵ I ye a rabenna ja men ma, wo le ye jin di. I ye a janyan ke nɔnkɔn ja kεmε sawa ri, ka a kɔndɔ ke nɔnkɔn ja biloolu ri, ka a lɔ ke nɔnkɔn ja bisawa ri. ¹⁶ I ye fɔjɔ don yɔrɔ bɔ a san fe, ka wo lɔ ke nɔnkɔn ja kelen di. I ye donda bɔ kulunba fan kelen fe, ka kulunba ke ikomin sankaso, ka a ke duuma bon ni tɛma bon ni san ma bon di. ¹⁷ N jere kεtɔ ji dunba lanala duu kan. Fen fen ye a nilakilila san kɔrɔ, wo bεε ri halaki. Fen bεε ri faa duu kan. ¹⁸ Kɔni n di teriya ta i yε ka i kisi. I ri don kulunba kɔndɔ,

i ni i denceilu, a ni i muso ni i denceilu musoilu.
19 I ye nimafen su bεε fila fila ladon i fε kulunba kɔndɔ, cεman ni musoman, sa woilu ri to nimaya rɔ.
20 Kɔnɔilu wo, kolofenilu wo, waa rɔ soboilu wo, ni nimafen misen mεnilu ye taamala duu ma, a su bεε fila fila ri na i ma sa alu ri to nimaya rɔ.
21 I ye damunun fen su bεε do ta ka a lamara i fε kulunba kɔndɔ. Wo ri kε balo ri ile ni woilu yε.»
22 Nba, Alla ka Nuhan jamari ko ko la, Nuhan ka wo bεε kε iko a fɔra a yε ja mεn ma.

7

Nuhan donda kulunba kɔndɔ

1 Nba, Allabatala ka a fɔ Nuhan yε ko: «I ye don kulunba kɔndɔ, i ni i la denbaya. N da a yen ko i kelen pe le telenni n jnakɔrɔ adamaden bεε tema. **2** I ye sobo sεnimana su bεε ta i fε, a cεman wɔrɔnwula ni a musoman wɔrɔnwula. Sobo mεn sεnimana tε, i ye wo su bεε fanan ta, cεman kelen ni musoman kelen. **3** I ye kɔnɔ su bεε fanan ta, cεman wɔrɔnwula ni musoman wɔrɔnwula, sa alu siya kana tunu duukolo kan. **4** A ra to tele wɔrɔnwula ma. Wo wa dafa, n di sanci lana duukolo kan. Sanci wo ri tele binaanin ni su binaanin kε nali la. Wo ri kε sababu ri. Fen mεnilu danni n bolo, wo bεε ri halaki ka bɔ duu kan.» **5** Allabatala ka Nuhan jamari ko ko la, a ka wo bεε kε.

6 Nba, ka a teren Nuhan sɔrɔn da san kεmε wɔɔrɔ bɔ, ji dunba nara duukolo kan. **7** Nuhan ni a denceilu ni a muso ni a denceilu musoilu, alu bεε donda kulunba kɔndɔ kosa alu ri kisi ji dunba ma. **8** Wo lon, sobo mεnilu sεnimana ni mεnilu sεnimana tε, a ni kɔnɔilu ni nimafen misen mεnilu ye taamala duu ma, **9** wo bεε fila fila nara

Nuhan ma, a ceman ni a musoman. Alu bεε donda kulunba kɔndɔ, iko Alla ka Nuhan jamari ja mεn ma. ¹⁰ A tele wɔrɔnwulana, sanci nara duukolo kan.

¹¹ Nuhan sɔrɔn san kemε woɔrɔna, wo karø filana tele tan ni wɔrɔnwulana, ji bondon mεn ye duu kɔrɔ, wo tera ka ji bɔn duu kan. Sankolo ji bondon fanan da lakara. ¹² Wo rɔ, sanci ba nara duu kan. A ka tele binaanin ni su binaanin kε, a ma tεε. ¹³ Sanci nara lon mεn, wo lon kelen Nuhan ni a denceilu donda kulunba kɔndɔ. A denceilu le tεrε Sεmu ni Kamu ni Jafeti ri. Nuhan muso donda alu fε, a ni a denceilu muso sawa. ¹⁴ Nimafen su bεε donda kulunba kɔndɔ alu fε. Waa rɔ soboilu wo, kolofenilu wo, nimafen misen menilu ye taamala duu ma, a ni kɔnɔilu wo, kawa ye fen fen na, woilu su bεε donda. ¹⁵ Nba, fen fen ye a nilakilila, wo bεε fila fila donda kulunba kɔndɔ Nuhan fε. ¹⁶ Nimafen su bεε donda, ceman ni musoman, ikomin Alla ka jamarili kε ja mεn ma. Alu bεε donda tuma mεn na, Allabatala ka kulunba da tuun Nuhan ma.

¹⁷ Nba, sanci ka tele binaanin kε, a ye nala duukolo kan. Ji siyayara ka kε ji dunba ri, ka kulunba kɔrɔta ka bɔ duu ma. ¹⁸ Ji yεlera ka siyaya kosεbε. Kulunba funda ji kan ka wa. ¹⁹ Ji tora yεlεla kojuuya foo ka koyinkε bεε latunun fan bεε san kɔrɔ. ²⁰ Ji yεlera koyinkε woilu kun na ka se fo nɔnkɔn ja tan ni loolu, ka koyinkε latunun fewu! ²¹ Nimafen bεε faara duukolo kan. Kɔnɔilu wo, kolofenilu wo, waa rɔ soboilu wo, nimafen misenilu wo, menilu ye taamala duu ma, mɔɔilu wo, alu bεε faara. ²² Fen fen ye duukolo kan, ni a ye a nilakilila, wo bεε faara. ²³ Allabatala ka

duukolo nimafen bεε halaki wo ja le ma. Mօɔilu wo, soboilu wo, kənɔilu wo, ni nimafen misen mənilu ye taamala duu ma, alu bεε halakira ka bɔ duukolo kan. A tora Nuhan dərən de ma, a ni mənilu tere a kun kulunba kəndə. ²⁴Ji ka tele kəmə ni biloolu kε duukolo kan, a ma majii.

8

Alla ka sanci ba lal

¹Kəni Alla hankili tora Nuhan dɔ, a ni waa rɔ soboilu ni so kəndə kolofenilu, mənilu tere a kun kulunba kəndə. Wo rɔ, Alla ka fɔŋɔ lawuli ka a tεe duu kan ka ji majii. ²Duukolo ji bondon da tuunda, a ni sankolo ji bondon. Sanci tεera. ³Ji tora majiila dooni dooni duukolo kan. Tele kəmə ni tele biloolu taminda tuma mən na, ji madooyara. ⁴A karo wərənwulana tele tan ni wərənwulana, kulunba nara i sii Arara jamana koyinke do kan. ⁵Ji tora madooyala foo ka se karo tanna ma. Wo karo tele fɔlɔ, koyinke ilu kulinu bɔra.

⁶Tele binaanin taminda tuma mən na, Nuhan ka fɔŋɔ don da laka, a tun ka mən bɔ kulunba la. ⁷A ka jañasila do bila. Wo bɔra ka taa ni seyi kε haan ji jara duukolo kan tuma mən na. ⁸Wo kɔ, a ka kanba do bila ka a kɔrɔsi ni ji ra dooya duukolo kan. ⁹Kanba wo bɔ mən kəni, a ma sii yɔrɔ sərən. A ka a kɔseyi ka na Nuhan ma kulunba kəndə, baa ji tere ye duukolo yɔrɔ bεε kan fɔlɔ. Nuhan ka a bolo labɔ ka kanba mira ka a ladon a fε kulunba kəndə. ¹⁰Nuhan ka a to tele wərənwula ye tamin ikɔ tuun, ka ban ka kanba bila ikɔ. ¹¹Wura fε, kanba ka a kɔseyi Nuhan ma. Olibiye fira kəndε ye a da la. Nuhan ka a lən wo le rɔ ko ji ra fɔlɔ

madooyala duukolo kan kosebe. ¹² A ka a to tele wərənwula ye tamin ikə, ka ban ka kanba bila. Kanba wa men keni, a ma a kəseyi Nuhan ma wo ko. ¹³ Nuhan sərən san kəmə wəorə ni kelen, wo karo fələ tele fələ, ji tun tə duukolo kan butun. Nuhan ka kulunba kunnafen waranka ka a yen ko duu ra fələ jala. ¹⁴ A karo filana tele muwan ni wərənwulana sera ka a təren duu ra ja fewu!

Nuhan bəra kulunba kəndə

¹⁵ Nba, Alla kumara Nuhan fə ko: ¹⁶ «I ye bə kulunba kəndə sisen, i ni i muso ni i denceilu ni alu musoilu. ¹⁷ I ye nimafen bəe labə. Kənəilu wo, waa rə soboilu wo, so kəndə kolofenilu wo, ni nimafen misen menilu ye taamala duu ma, i ye alu bəe labə, sa alu ri jiri ka siyaya duukolo fan bəe rə.»

¹⁸ Wo rə, Nuhan bəra kulunba kəndə, a ni a denceilu ni a muso ni a denceilu musoilu. ¹⁹ Nimafen bəe bəra. Waa rə soboilu wo, so kəndə kolofenilu wo, kənəilu wo, ni nimafen misen menilu ye taamala duu ma, bəe ni a la siya bəra kulunba kəndə.

²⁰ Nuhan ka Alla saraka bə diya do lə ka Alla-batala bato kanma. A ka sobo sənimən ni kənə sənimən su bəe do ta ka Allabatala sə alu rə. A ka alu janin Alla saraka bə diya wo kan, ka alu kə buuri ri. ²¹ Saraka wo suma diyara Allabatala yə. Allabatala ka a latee ko: «N tə duu danka adamaden kosən butun. N ka a lən ko ka bə alu denmisənya waati ma foo ka na se alu la məoya laban ma, alu miriya bənni kojuu le ma. Hali wo, n tə sən ka nimafen bəe halaki butun, iko n ka a kə ja men ma fələ. ²² Ka bə bi ma ka wa haan dunuya laban, si foyi tuma ni suman ka tuma, nənə tuma

ni tara tuma, sanma ni telema, su ni tele, wo si te ban.»

9

Alla ni Nuhan na teriya

¹ Alla kumara ka baraka don Nuhan ni a
dence^{ilu} r^o. A ka a f^o alu ye ko: «Ai ye jiri ka siyaya
duukolo fan b^{eε} r^o ka a fa. ² Nimafen b^{eε} ri silan ai
ye kose^{bε}. Waa r^o soboilu wo, so k^ond^a kolofenilu
wo, k^on^oilu wo, j^{ee}ilu wo, ni nimafen misen menilu
ye taamala duu ma, wo b^{eε} ri silan ai ye. Alu b^{eε} ri
k^e ai la fanka k^or^o. ³ Nimafen b^{eε} ri k^e balo ri ai ye.
N ka suman di ai ma ja men ma, n ye nimafenilu
fanan dila ai ma ja kelen wo le ma. ⁴ K^oni ai kana
sobo ni a jeli damun muum^e! Baa a nimaya ye a
jeli le r^o. ⁵ Ni sobo do ka m^oo jeli lab^o ka a faa, sobo
wo ka kan ka faa. Ni m^oo do ka a m^ooja^{on} faa, wo
fanan di faa. ⁶ Nde Alla ka m^oo dan ka a k^e n jere
munuja le ri. Wo r^o, m^oo m^oo wa a m^ooja^{on} jeli
lab^o ka a faa, m^oo ri wo fanan jeli lab^o ka a faa.
⁷ Nba, ai k^onin, ai ye jiri ka siyaya. Ai ye seruya ka
siyaya duukolo fan b^{eε} r^o ka a fa.»

⁸ Alla ka a fō Nuhan ni a denceilu yē ko: ⁹ «Sisen teriya ri tō nde ni aile tema, a ni ai bōnsən men ye nala ai kō ¹⁰ a ni duukolo nimafen, men bee tere ai kun, fen fen bōra ai fē kulunba kōndo, kōnōilu wo, so kōndo kolofenilu wo, waa rō soboilu wo. ¹¹ Teriya jin ye tōla n ni duukolo nimafen bee tema. Ji dunba tē nimafen bee halaki butun. Ji dunba tē kē butun ka duukolo bee tiñan.»

¹² Alla ka a fo ikɔ ko: «N ye teriya mɛn tala ai ye a ni ai bɔnson bɛɛ ni nimafen bɛɛ fo habadan, wo tɔɔmasere le pin di. ¹³ N di nincinankan labɔ san

fe bandafin kɔrɔ. Nincinankan wo le n na teriya tɔomasere le ri, n ye teriya mɛn tala dunuja bɛɛ yɛ. ¹⁴ Tuma tuma, ni n ka bandafin nadɛn duukolo kun na, ni nincinankan fanan bɔra, ¹⁵ wo rɔ, n di n hankili bila n na teriya rɔ, n ka mɛn ta ai ni nimafen su bɛɛ yɛ. N tɛ ji siyaya ka a ke ji dunba ri butun ka nimafen bɛɛ halaki. ¹⁶ Nincinankan wa bɔ bandafin kɔrɔ, n di wo yen ka n hankili bila n na teriya banbali rɔ, n ka mɛn ta duukolo nimafen su bɛɛ yɛ.»

¹⁷ Alla ka a fɔ Nuhan yɛ ko: «N da teriya mɛn ta duukolo nimafen bɛɛ yɛ, wo tɔmasere le wo ri.»

Nuhan dence sawa la ko

¹⁸⁻¹⁹ Nba, Nuhan dence mɛnilu bɔra a fe kulunba kɔndɔ, woilu le tɛrɛ Sɛmu ni Kamu ni Jafeti ri. Nuhan dence sawa le woilu ri. Woilu le bɔnsɔn jɛnsenda ka se duukolo fan bɛɛ rɔ. Wo rɔ, Kanaan fa le tɛrɛ Kamu ri. ²⁰ Nba, Nuhan ka sɛnɛ damira. Ale le fɔlɔ ka rɛsen fe sɛnɛ. ²¹ Lon do rɔ, Nuhan ka rɛsenji do min ka a ja laminin. A fari makolon lani tɛrɛ a la faaninbon kɔndɔ. ²² Kanaan fa Kamu ka a fa Nuhan fari makolon yen, ka wa wo fɔ a badenma fila yɛ lu ma. ²³ Sɛmu ni Jafeti ka durukiba ta ka a la alu kamannakun kan ka don alu kɔnkɔma alu fa la faaninbon na ka alu fa sutura. Alu ma sɔn alu ja yen na alu fa kan, kosa alu kana a fari makolon yen fewu.

²⁴ Nba, rɛsenji ka Nuhan bila tumana mɛn na, a dence doomani Kamu ka ko mɛn kɛ a la, wo fɔra a yɛ. ²⁵ Wo rɔ, Nuhan kan ko:

«Alla ma tɔrɔya lara Kamu dence Kanaan kan.
Ka a ke a kɔrɔceilu la jɔntajɔn di,

Alla ma wo kɛra.»

²⁶ Nuhan kan ko:

«N di Allabatala tando,
 Semu Maari Alla kənin.
 Alla ma Kanaan ke Semu la jən di,
 Alla ma wo kera.
²⁷ Alla ma Jafeti bonyara,
 Ka a bənsən sii Semu bənsən fε,
 Alla ma wo kera.
 Alla ma Kanaan ke alu la jən di,
 Alla ma wo kera.»

²⁸ Nba, ji dunba tamin kə, Nuhan ka san kəmə
 sawa ni san biloolu le ke. ²⁹ A si bεε ladənni kera
 san kəmə kənəndə ni san biloolu le ri. Wo bεε
 taminni, a sara.

10

Nuhan denceilu la bənsən

¹ Ji dunba tamin kə, Nuhan denceilu Semu ni
 Kamu ni Jafeti ka denceilu sərən. Alu bənsən le jin
 di.

² Jafeti denceilu le ten: Koməri, Makəki, Madayı,
 Jaban, Tubali, Mesəki a ni Tirasi. ³ Koməri denceilu
 le Asikənasi, ni Rifati ni Tokarima ri. ⁴ Jaban
 denceilu le ten: Elisiya, Tarisisi, Kitimu a ni Do-
 danimu. ⁵ Jaban bənsən jənsənda ka wa i sii kəjə
 da la, a bεε ni a la duu, a bεε ni a la kumakan, a bεε
 ni a məɔilu, a bεε ni a la jamana.

⁶ Kamu denceilu le ten: Kusi, Misiran, Puti a
 ni Kanaan. ⁷ Kusi denceilu le ten: Saba, Habila,
 Sabita, Rayema a ni Sabiteka. Rayema denceilu le
 Seba ni Dedan di. ⁸ Kusi dence do le Namurudu ri.
 Wo le fələ kera fənkətii ri duukolo kan. ⁹ A kera
 donso fadimanba ri Allabatala jəna. Wo rə a ye
 fəla doilu ma ko: «A kəni donso fadimanba le ri,
 Allabatala jənakərə iko Namurudu tərə ja mən ma.»

10 Namurudu kera faama ri. A fələma le ka a sii Babəli ni Ereki ni Akadi soilu kun na. So sawa wo bəe tere Sineyari jamana le rə. **11** A bəra jamana wo rə ka wa Asiri jamana rə. A ka Ninibe ni Rehobotiri ni Kalasi **12** ni Resəni soilu sii ka alu lə. Resəni ye Ninibe ni Kalasi so fila le tə. So ba le wo ri.

13 Misiran kera mənilu benba ri, woilu le ten: Ludi bənsən, Anamu bənsən, Lehabi bənsən, Nafitu bənsən, **14** Paturusi bənsən, Kafitorı bənsən a ni Kasiluhi bənsən. Filisitilu bəra Kasiluhi bənsən le rə.

15 Kanaan dence fələ le tere Sidən di, ka Heti tuun wo la. **16-18** Məo mənilu fanan bəra Kanaan də, woilu le ten: Jebusikailu, Amərikailu, Kirikasikailu, Hifikailu, Arikiilu, Sinikailu, Arifadikailu, Semarikailu a ni Hamarikailu.

Kanaan bənsən jənsənda. **19** Alu la jamana ye damirala Sidən de ka wa Kerari fan fə, ka wa se foo Kasa. A ye wala Sədəmu ni Kəməri ni Adima ni Seboyimu fan fə, ka wa se foo Lesa. **20** Kamu bənsən de woilu ri, a bəe ni a la məəilu, a bəe ni a kumakan, a bəe ni a la duu, a bəe ni a la jamana.

21 Jafəti kərəcə Səmu fanan ka denceilu sərən. Səmu wo le kera Hebəri bənsən bəe benba ri. **22** Səmu denceilu le ten: Elamu, Asuri, Aripasadi, Ludi a ni Aramu. **23** Aramu denceilu le ten: Usi, Huli, Ketari a ni Masi. **24** Aripasadi wo ka Selasi sərən. Selasi ka Hebəri sərən. **25** Hebəri ka dence fila sərən. Kelen təo ko Peleji ka a masərən duukolo ratalara a tele le rə. A dooce təo ko Jokitan. **26-29** Jokitan denceilu le ten: Alimodadi, Selefu, Hasamawəti, Jeraki, Hadoramu, Usali, Dikila, Obali, Abimayəli, Seba, Ofiri, Habila a ni Jobabu. Nba, woilu bəe tere Jokitan denceilu le ri. **30** Duu mən ye Mesa ni Sefari tə, alu ta le tere wo bəe

ri. Yørø wo ye koyinkéilu kørø telebø fan fe. ³¹ Nba woilu bëe kéra Semu deni le ri, a bëe ni a la maoilu, a bëe ni a la kumakan, a bëe ni a la duu, a bëe ni a la jamana.

³² Nba, Nuhan denceilu bønsøn de woilu ri, a bëe ni a bønsøn, a bëe ni a jamana. Møø woilu le jensenda ka ke jamana siyaman di duukolo kan ji dunba kɔ.

11

Babæli sankaso jan na ko

¹ Dunuja maoilu bëe tere ye kan kelen de mënna. Alu bëe tere ye i njøøn famunna. ² Alu børa telebø fan dø, ka wa gbækannan ba do tærøn Sineyari jamana rø. Alu ka i sii dinkira wo rø. ³ Lon do rø, alu ka a fø i njøøn yε ko: «An ye birikilu gbasi ka alu janin kosebε.» Alu ma kabakurun ta fo biriki. Alu ma boro fanan ta, fo tulubø fasani. ⁴ Alu kan ko: «An ye so lø an jεre yε, ka sankaso jan lø a køndø. Wo lø ye se haan sankolo ma, sa an di tøø sørøn. Ni an ma wo kε, an di jenseñ duukolo fan bëe fe.»

⁵ Allabatala jiira ka so ni sankaso jan dagbε, adamadenilu ka mën lø. ⁶ A kan ko: «A ragbε. Alu bëe ye siya kelen de ri, alu bëe ye kan kelen de mënna. Alu ye baara mën kan nin, alu la baara følø le wo ri. A tε mën bakε, alu wa alu miri fen fen ma, alu ri se wo kela. ⁷ An ye jii ka alu kan basan, sa alu kana se i njøøn kan mënna butun.»

⁸ Wo rø, Allabatala ka alu farafara ka alu bø dinkira wo rø, ka alu jenseñ duukolo fan bëe rø. Alu la so lø ko ra dan wo rø. ⁹ Wo le kosøn, dinkira wo tøø lara ko Babæli, baa Allabatala ka dunuja

məɔilu bεε kumakan basan ye le, ka ban ka alu jensen duukolo fan bεε rɔ.

Semu bənsən

¹⁰ Nba, Semu bənsən de jin di.

Semu sərən ka san kəmə bə tuma mən na, a ka Aripasadi sərən. Wo kera san fila ji dunba kɔ.
¹¹ Aripasadi sərən kɔrɔ, Səmu ka san kəmə loolu le kε, ka dence ni denmusoilu sərən.

¹² Aripasadi sərən ka san bisawa ni san loolu bə tuma mən na, a ka Selasi sərən. ¹³ Selasi sərən kɔrɔ, Aripasadi ka san kəmə naanin ni san sawa le kε, ka dence ni denmusoilu sərən.

¹⁴ Selasi sərən ka san bisawa bə tuma mən na, a ka Heberi sərən. ¹⁵ Heberi sərən kɔrɔ, Selasi ka san kəmə naanin ni san sawa le kε, ka dence ni denmusoilu sərən.

¹⁶ Heberi sərən ka san bisawa ni san naanin bə tuma mən na, a ka Peleji sərən. ¹⁷ Peleji sərən kɔrɔ, Heberi ka san kəmə naanin ni san bisawa le kε, ka dence ni denmusoilu sərən.

¹⁸ Peleji sərən ka san bisawa bə tuma mən na, a ka Eruhu sərən. ¹⁹ Eruhu sərən kɔrɔ, Peleji ka san kəmə fila ni san kənəndə le kε, ka dence ni denmusoilu sərən.

²⁰ Eruhu sərən ka san bisawa ni san fila bə tuma mən na, a ka Seruki sərən. ²¹ Seruki sərən kɔrɔ, Eruhu ka san kəmə fila ni san wərənwula le kε, ka dence ni denmusoilu sərən.

²² Seruki sərən ka san bisawa bə tuma mən na, a ka Nakɔri sərən. ²³ Nakɔri sərən kɔrɔ, Seruki ka san kəmə fila le kε, ka dence ni denmusoilu sərən.

²⁴ Nakɔri sərən ka san muwan ni san kənəndə bə tuma mən na, a ka Teraki sərən. ²⁵ Teraki sərən kɔrɔ, Nakɔri ka san kəmə ni san tan ni kənəndə le kε, ka dence ni denmusoilu sərən.

26 Teraki sɔrɔn ka san biwɔrɔnwula bɔ tuma mɛn na, a ka Iburama ni Nakɔri ni Haran sɔrɔn.

27 Teraki bɔnsɔn de jin di. A ka Iburama ni Nakɔri ni Haran sɔrɔn. Haran ka Luti sɔrɔn. **28** Haran sara ka a fa kɛndɛ to. A la saya kera a sɔrɔn jamana le rɔ, Kalide jamana kɔnin. A sara Uri so le kɔndo. **29** Iburama ni Nakɔri ka furu kɛ. Iburama muso tɔɔ le tere ko Sarayi. Nakɔri ka Haran denmuso do furu, mɛn tɔɔ ko Milika. Haran denmuso do fanan tɔɔ ko Sisika. **30** Sarayi tere densɔrɔnbali le ri. Den tun te a bolo.

31 Nba, Teraki ka a dence Iburama ni a māmarense Luti ta ka wa Kanaan bɔnsɔn na jamana rɔ. Luti ye Haran den de ri. Teraki ka a biramusoni Sarayi fanan ta, mɛn ye Iburama muso ri. Alu bɛɛ bɔra Uri so la ka Kanaan bɔnsɔn na jamana sila mira. Uri wo ye Kalide jamana le rɔ. Kɔni alu se mɛn keni Haran, alu ka i sii ye. **32** Teraki si bɛɛ ladenni kera san kɛmɛ fila ni san loolu le ri. A sara Haran ye.

12

Alla kumara Iburama yɛ

1 Nba, Allabatala kumara Iburama yɛ ko: «Iburama, i ye bɔ i la jamana rɔ, ka bɔ i badenmailu tɛma, ka bɔ i fa la lu ma. I ye wa jamana do rɔ, n kɛtɔ mɛn yirakala i la. **2** N di i bɔnsɔn kɛ jamana ba ri ye. N di baraka don i rɔ, ka i tɔɔ bonya. Mɔɔilu ri baraka sɔrɔn i la sababu rɔ. **3** Mɔɔ mɛn ba duwa i yɛ ka i miri kojuma, n di numaya kɛ wo tii yɛ. Mɔɔ mɛn ba i danka, n di tɔrɔya la wo kan. I ri kɛ sababu ri, siyailu bɛɛ ri baraka sɔrɔn n bolo.»

⁴ Iburama wulira ka wa ikomin Allabatala ka a fɔ a yε ja mɛn ma. Luti taara a fε. Iburama bɔra Haran ka wa, ka a tɛrɛn a sɔrɔn da san biwɔrɔnwula ni san loolu bɔ. ⁵ Iburama ka a muso Sarayi ta a ni a kɔrɔcɛ dencɛ Luti a ni a jɔnilu a ni a bolofen bɛɛ. A tun ka fen fen sɔrɔn Haran, a ka wo bɛɛ ta. Alu bɔra wo ja le ma ka wa Kanaan jamana rɔ.

Iburama ni a la mɔɔilu seni ye, ⁶ alu ka jamana rateɛɛ ka wa Sikɛmu, More la jiriju ba lɔni dinkira mɛn dɔ. Wo tuma, Kanaan bɔnsɔn tɛrɛ jamana wo rɔ ye fɔlɔfɔlɔ.

⁷ Awa Allabatala ka a jɛrɛ yiraka Iburama la, ka a fɔ a yε ko: «N di duu jin bɛɛ di i bɔnsɔn ma.» Wo le rɔ, Iburama ka saraka bɔ diya lɔ Allabatala bato kanma, Allabatala mɛn ka a jɛrɛ yiraka a la.

⁸ Iburama bɔra ye ka wa koyinkeilu fan fε, mɛnilu ye Betɛli so telebɔ fan fε. A ka a la faan-inbon lɔ ye, ka Betɛli to a telebe fan fε, ka Ayi to a telebɔ fan. A ka saraka bɔ diya lɔ Allabatala bato kanma ye ka a tara. ⁹ Iburama bɔra ye ka jamana wo rataama ka wa Nɛkɛbi mara.

¹⁰ Nba, wo tuma kɔnkɔ ba ra don jamana kɔndɔ. Wo juuyara kosebɛ. Wo rɔ, Iburama wara Misiran jamana rɔ ka mɛn ye. ¹¹ Alu dontɔla Misiran, Iburama ka a fɔ a muso Sarayi yε ko: «N ka a lɔn ko i kɛni ba le. ¹² Ni Misirankailu ka i yen, alu ri a lɔn ko n muso le i ri. Wo rɔ, alu ri n faa ka i kɛnde to. ¹³ I jaandi, ni an sera ye, i ye a fɔ ko n doomuso le i ri, sa alu ri n damira kojuma ka n to i la ko kosɔn.»

¹⁴ Iburama ni a muso sera Misiran tuma mɛn na, Misirankailu ka a yen ko Sarayi kɛni kosebɛ.

¹⁵ Misiran mansa Ferawuna*la mɔɔbailu ka Sarayi yen tuma mɛn na, alu wara a mankutun fɔ Ferawuna yε. A ka wo mɛn ka mɔɔilu lɔ Sarayi tala ka na a ri a wara. ¹⁶ A ka Iburama mira kojuma Sarayi la ko kosɔn, ka kolofen su bεε di Iburama ma: saailu wo, bailu wo, nisilu wo, jɔɔmεilu wo, falilu wo, a ni jɔnilu.

¹⁷ Kɔni Allabatala ka yankaro juuilu bila Ferawuna ni a la bonkɔndɔmɔɔilu la Iburama muso Sarayi la ko kosɔn. ¹⁸ Wo rɔ, Ferawuna ka Iburama kili ka a fɔ a yε ko: «I ra nfen kε n na ten? Nfenna i ma a fɔ n yε ko i muso le? ¹⁹ Nfenna i ka a fɔ ko i doomuso le? Wo le ka a kε, nde ka a ta ko n ye a kεla n muso ri. Hen, i muso le jin de. A mira, i ye wa a ri!»

²⁰ Ferawuna ka a fɔ a la mɔɔilu yε ko alu ye Iburama ni a muso labɔ Misiran, a ni alu bolofenilu bεε.

13

Luti ni Iburama farara

¹ Iburama ni a muso bɔra Misiran ka wa Nekεbi. A wara a bolofenilu bεε ri. Luti wara a fε. ² Iburama tun da kε fentii ba ri. Kolofen ni wodigbε ni sanin tεrε a bolo a ja ma. ³ A bɔra Nekεbi ka wa Beteli. A tun ka a la faaninbon lɔ dinkira mɛn dɔ kɔrɔman, a sera ye. Dinkira wo tεrε Beteli ni Ayi soilu tε le, ⁴ Iburama tun ka Alla saraka bɔ diya lɔ dinkira mɛn dɔ. A se mɛn kεni ye, a ka Allabatala matara.

⁵ Kolofenilu ni mɔɔilu tun ka siya Luti fanan bolo, mɛn tεrε ye taamala Iburama fε. ⁶ Wo le

* **12:15** Misirankailu alu a fɔla alu la mansa ma le ko Ferawuna.

kosən, dinkira wo dooyara alu fila bolo, baa alu bolofenilu ka siya kosebe. Alu fila tun ti se tola dinkira kelen də. ⁷ Lon do rə, kəle wulira Iburama la kolofen kənəmadenilu ni Luti la kolofen kənəmadenilu tə. Wo tuma, Kanaan bənsən ni Feresikailu fanan siini jamana wo rə ye.

⁸ Wo rə, Iburama ka a fə Luti yε ko: «An kana sən kəle ye wuli ile ni nde tə ma, wala ile la kolofen kənəmadenilu ni nde la kolofen kənəmadenilu tə ma. An ye badenma le ri. ⁹ I ye jamana mafene. Nin bεε tə dinkira le ri wa? An ye fara. Ni bolomaran yan fan fə la le duman i yε, i ye wo ta. Nde ri to bolokinin yan fan fə. Ni bolokinin yan fan fə la le duman i yε, i ye wo ta. Nde ri to bolomaran yan fan fε.»

¹⁰ Luti ka a ja lə ka Juridən ba lεe bεe ragbε. A ka a yen ko ji kə nəɔman dinkira wo rə, ikomin a nəɔman Allabatala la nakə jnuma rə ja men ma, wala ikomin Misiran ye ja men ma ji ko rə. A tərə wo ja haan Sowari so. Dinkira wo ka ji tərə fələ. Tuma wo, Allabatala tun ma Sədəmu ni Kəməri soilu halaki fələ. ¹¹ Nba, Luti ka wo yen ka Juridən ba lεe bεe jnānatənbən ka a kε a ta ri. Wo rə, a bəra Iburama fə ka wa telebə fan fε. Badenma fila wo farara wo ja le ma. ¹² Iburama ka i sii Kanaan bənsən na jamana rə. Luti wara i sii ba lεe soilu fan fε, ka a la faaninbonilu lə Sədəmu so donda la. ¹³ Sədəmukailu tun ka juu kosebe, ka kojuu siyaman ke, ka Allabatala hake ta.

¹⁴ Luti ni Iburama farani kə rə, Allabatala ka a fə Iburama yε ko: «Iburama, i ja lə. Ka bə i lə dinkira ye i ja lawa tele kankan bolo maran fan fε, a ni tele kankan bolo kinin fan fε, telebə fan fε a ni telebe fan fε. ¹⁵ I ja ye jamana men bεe la jnīn, n di wo bεe

di i ni i bənsən ma, ka a kε ai ta ri kadawu! ¹⁶ N di i bənsən siyaya ka alu kε ikomin dununja kijε. Ni mao ri se dununja kijε jatela, i bənsən fanan di se jatela. ¹⁷ I wuli ka jamana rataama, ka a janyan ni a bonya ragbe, baa n ye a bεε dila ile le ma.»

¹⁸ Iburama ka a la faaninbonilu bø, ka wa i sii Mamere la jirijuilu kørø. Dinkira wo ye Heburøn so da la. A ka saraka bø diya wøse raben Allabatala yε.

14

Luti mirara

¹ Wo tuma, Amurafeli ye Sineyari jamana mansaya la. Ariyøki ye Elasari jamana mansaya la. Kedorilameri ye Elamu jamana mansaya la. Tidali ye Koyimu jamana mansaya la. ² Mansa naanin woilu ka alu ladøn ka wa mansa Bera kεle, a ni mansa Birisa ni mansa Sineyabu ni mansa Sømøberi ni mansa men siini Bela so kun na. Bela tøø fanan ko Sowari. Bera siini tøø Sødømu so kun na. Birisa siini tøø Kømøri so kun na. Sineyabu siini tøø Adima so kun na. Sømøberi siini tøø Seboyimu so kun na. ³ Mansa loolu woilu wara i ladøn Sidimu kεnegbe rø, Dalaba Køøjilama ye dinkira men dø bi. ⁴ Alu tun da san tan ni fila kε, alu ye mansa Kedorilameri la fanka kørø. A san tan ni sawana, alu muruntira a ma. ⁵ A san tan ni naaninna, Kedorilameri ni a fe mansailu wulira ka na, ka mansa menilu kεle; Refayikailu menilu siini Asiterøti Karinayimu so la, Sisikailu menilu siini Hamu so la, Emukailu menilu siini Sawe Kiriyatimu so la, ka ye maoilu kεle ka alu se woilu la. ⁶ Alu wara Horilu kεle woilu bara, koyinkema dinkira do rø, Seyiri la jamana rø, ka se woilu la.

Alu ka alu gbən haan Heliparan, so mən ye wula kəndə. ⁷ Wo kə, Kedorilameri ni a dafajəəilu ka ie kəseyi ka na Ənimisipa, mən təə ko Kadəsi. Məə mənilu tərə ye Amaləki bənsən na jamana rə, alu ka woilu kəle ye, ka se woilu la ka ai la jamana bəə ta. Alu sera Amərikailu fanan na, mənilu siini tərə Asarən Tamari so la.

⁸ Wo rə, Sədəmu mansa bəra, a ni Kəməri mansa ni Adima mansa ni Seboyimu mansa ni Bela mansa. Bela wo təə fanan ko Sowari. Mansa woilu bəra ka wa kəle diya Sidimu kənegbə rə. ⁹ Alu wara ka Elamu mansa Kedorilameri kəle, a ni Koyimu mansa Tidali ni Sineyari mansa Amurafeli ni Elasari mansa Ariyəki. Mansa loolu woilu ka mansa naanin kəle. ¹⁰ Nba, Sədəmu mansa ni Kəməri mansa ni alu la məəilu ka i bori alu juuili jəe. Alu siyaman borimantə bera tulubə fasani denkailu rə, baa wo ka siya tərə Sidimu kənegbə rə. Mənilu ma be denka rə, woilu ka i bori foo tindilu kan. ¹¹ Wo rə, Kedorilameri ni a la məəilu wara ka Sədəmu ni Kəməri nanfulu bəə ta, a ni alu la damunun fenilu bəə. Alu ka wo bəə ta ka wə a ri. ¹² Alu ka Iburama badenma Luti fanan mira ka wa a ri, a ni a bolofen bəə, baa ale fanan siini tərə Sədəmu so le kəndə.

Iburama ka Luti kisi

¹³ Məə do borimantə nara ka wo bəə jəafə Iburama yə, a ye fəla mən ma ko Heburu cə. Wo tuma, Iburama siini tərə Mamere la jirijuilu tərəfə. Mamere wo tərə Amərika məə do le ri. A baden-mailu le Esikoli ni Aneri ri. Wo bəə tərə Iburama dənkuruilu le ri. ¹⁴ Iburama badenma mira ko fəra a ye tuma mən na, a ka a la məəilu kili, mənilu kusan kələla. Cə farinman məə kəmə sawa ni məə

tan ni seyin mën bëe sörönni Iburama wara woilu bora, ka mansailu kösaran foo Daan so la. ¹⁵ Su rø, Iburama ka a la mœilu ratala ka be mansailu kan. Iburama ka alu kele ka se alu la, ka alu gben haan Hoba. So wo ye Damasi so tele kankan bolo maran fan fela. ¹⁶ Mansailu tere ra nanfulu mën bëe ta, Iburama ka wo bëe mira alu la ka na a ri. A nara a badenma Luti fanan di, a ni Luti bolofenilu bëe ni muso mënili mirani tere wo ni mœø tœilu bëe.

Melikisedeki ka Iburama kunben

¹⁷ Nba, Iburama ka mansa Kedorilaméri ni a mansa jœönilu kele ka se alu la, ka ban ka i koseyi. A koseyito, Södömu mansa wara a kunben Sawe kënegbë rø, mœilu ye a fola mën ma ko mansa la kënegbë.

¹⁸ Salemu so mansa Melikisedeki nara Iburama kunben ka sɔ buru ni resenji a rø. Alla Körötaniba sarakalasela le wo ri. ¹⁹ A duwara Iburama ye ko: «Alla ye jumaya ke Iburama ye, Alla Körötaniba, mën ka san dan ka duu dan. ²⁰ An ye Alla Körötaniba tando, mën ka i juuili di i ma.» Iburama ka mënili sörön kele rø, a ka wo bëe ja bɔ ka a di Melikisedeki ma.

²¹ Södömu mansa ka a fɔ Iburama ye ko: «N na mœilu laseyi n ma. Koni i ka nanfulu mën mira, i ye wo ta.» ²² Iburama ka a jabi: «N da n bolo köröta ka n kali Allabatala la, Alla Körötaniba, mën ka san dan ka duu dan. ²³ N da n kali wo la ko n te i bolofen si tala, hali jisikari, wala sanbara julu. N te a foyi ta, sa i kana a fɔ ko ile le ka Iburama ke nanfulutii ri. ²⁴ N te foyi tala fo n na mœilu ka mën ke alu balo ri. Koni mënili wara n kɔfe, Aneri wo, Esikoli wo, Mamere wo, fen mënili sörönda kele rø woilu ri alu nin bɔ wo rø.»

15

Alla ni Iburama la teriya

¹ Wo waati taminni kə rə, Iburama ka Allabatala kumakan mən kibarə misaliya rə. A kan ko: «Iburama i kana silan. N di i lantanka fen bəε ma ka i sara kosebe.» ² Iburama ka a jabi: «N Tii Allabatala, den te n bolo. I ri nfen de di n ma wo rə? Damasika mən təo ko Eliyeseri, wo le kətə n na bon cətala ri.» ³ Iburama kan ko: «I ma den si di n ma. Wo rə, n na jən, mən ye n wara yan, wo le kətə n cətala ri.»

⁴ Iburama ka Allabatala kumakan mən jabili rə ko: «Wo kuma te. Cə wo te kəla i cətala ri, fo i jere den, i kətə mən sərənna. Wo le kətə i cətala.»

⁵ Allabatala ka Iburama labə kənəma ka a fə a yə ko: «Iburama, i ja lə san də, ka lolo bəε jate, ni i ri se wo dan lənna.» Allabatala kan ko: «Loloilu siyaman ja mən ma, i bənsən di siyaya wo ja.»

⁶ Iburahima lara Allabatala la kuma la, wo rə Allabatala ka a jate məo telenni ri.

⁷ Allabatala ka a fə a yə ko: «Nde le Allabatala ri, mən ka lə i jərə ka i labə Uri so kəndə Kalide jamana rə. N ka i lana yan de, ka jamana jin di i ma ka a ke i ta ri.» ⁸ Kəni Iburama ka a jabi: «N tii Allabatala, n di se a lənna di ko jamana jin di ke n ta ri?» ⁹ Allabatala kan ko: «Nisi muso kelen mira ka na a di n ma, a ni ba muso kelen ni saaji kelen. Wo bəε ye ke san sawa sawa ri. I ye kanba kelen fanan mira, a ni sokəndəkanbanin kelen.»

¹⁰ Iburama nara woilu bəε di a ma, ka alu faa ka kolofenilu sensen a tema fila ri, kəni a ma kənəilu sensen. A ka kunkurun woilu bilabila ka alu jəaben i jəən na. ¹¹ Duwailu jiira soboilu ma tuma mən na, Iburama ka alu gben.

¹² Nba, tele be tumana, sunœ ba donda Iburama ja rœ. Ka a tœren a ye sunœ rœ, silan juu ni dibi ba sera a ma. ¹³ Allabatala ka a fœ a yœ ko: «Iburama, i ye a lœn ko i bœnsœn di kœ lœndanilu ri jamana gœrœ rœ. Alu ri ke jœnilu ri, ka tœrœ kojuuya haan san kœmœ naanin wa dafa. ¹⁴ Kœni jamana mœn kœtœ alu bilala jœnya rœ, n di kititeœ jamana wo kan. Kiti wa kœ, i bœnsœn di bœ jamana wo rœ nanfulu siyaman di. ¹⁵ Ile kœnin di i la kœrœya diya bœ, ka sa hœre rœ. Alu ri i suu don. ¹⁶ I denilu bœnsœn naaninna ri alu kœseyi yan, baa yan mœœilu, ni woilu ye Amœrikailu le ri, alu la kojuu ma dan natamin fœlœ ka se alu gœben ma.»

¹⁷ Nba, tele bera ka dibi don tuma mœn na, sinkœn sisima ni kala mœlen taminda sobo kunkurunilu tœma. ¹⁸ Wo lon jœre rœ, teriya donda Allabatala ni Iburama tœma. A ka a fœ a yœ ko: «N di duu jœn di i bœnsœn ma, ka bœ Misiran ba ma, ka wa haan ba belebele ba ma, mœn ye Efirati ba ri kœnin. ¹⁹ Dinkira wo ye Kenikailu bolo, a ni Kenisikailu ni Kadimonikailu ²⁰ ni Hœtikailu ni Feresikailu ni Refayikailu ²¹ ni Amœrikailu ni Kanaan bœnsœn ni Kirikasikakailu ni Jebusikailu.»

16

Isumayila sœrœn ko

¹ Iburama muso Sarayi tun ma den sœrœn a yœ. Wo tuma, Misiranka sunkurun do tœre Sarayi bolo jœnya la, mœn tœ ko Hajara. ² Lon do rœ, Sarayi ka a fœ Iburama yœ ko: «N cœ, Allabatala ma sœn n ye den sœrœn. I ye wa i la n na jœn sunkurun Hajara fœ. Ni Alla sœnda, a ri den sœrœn n yœ.»

Iburama sonda Sarayi la kuma ma. ³ Wo rɔ, a muso Sarayi ka a la jɔn Misiranka sunkurun di a ma ka a ke a muso ri, wo ka a t̄erēn Iburama ra san tan ke Kanaan jamana rɔ. ⁴ Iburama wara a la Hajara fε. Hajara ka kɔnɔ ta. Hajara ka a yen tuma mɛn na ko a kɔnɔ ma le, a ma a tii Sarayi jii foyi le ri, fo ka a dooya. ⁵ Wo rɔ, Sarayi ka a fɔ Iburama ye ko: «Ko mɛn ye kela n na, wo bɔni ile le rɔ. N ka n na jɔn di i ma ka a ke i muso ri. Kɔni a ka a yen tuma mɛn na ko a kɔnɔ ma le, a ma n jii foyi le ri. Allabatala, a ye wo kititeε nde ni ile t̄ema!»

⁶ Iburama ka Sarayi jabi: «Ale le wo ri. I la jɔn ye i la fanka le kɔrɔ. Mɛn wa i diya, i ye wo ke a la.» Wo rɔ, Sarayi ka Hajara tɔrɔ kojuuya, foo Hajara ka i borī a kɔrɔ ka wa.

⁷ Allabatala la mɛlɛka ka Hajara yen kɔ do rɔ wula kɔndɔ. Kɔ wo ye Suri sila dafε. ⁸ Mɛlɛka ka a fɔ a ye ko: «Ile, Hajara, Sarayi la jɔnmuso, i bɔni mi? I watɔ mi?» Hajara ka a jabi: «N borini n tii Sarayi le kɔrɔ.» ⁹ Allabatala la mɛlɛka ka a fɔ a ye ko: «I kɔseyi i tii wara, ka wa i fanmajii a ye ka a kan mira.» ¹⁰ Mɛlɛka kan ko: «N di i bɔnsɔn siyaya a ja ma, foo mɔɔ te wo jate lɔn muumɛ!» ¹¹ Habadan Mansala la mɛlɛka ka a fɔ a ye iko tuun ko: «I ja lɔ. I kɔnɔ ma le, i ri dencε sɔrɔn. I ye wo tɔɔ la ko Isumayila, baa Allabatala da i la jusukasi kan namen. ¹² Den wo ri ke iko waa rɔ sofali, mɛn bilani a jere ma. A ti se a la yala a badenma t̄ema. A ni a badenmailu te bɛn.»

¹³ Hajara kan ko: «Allabatala ja yen n na», wo rɔ a ka tɔɔ do la ko: «Alla mɛn kɔrɔtanin ja yen n na.»

¹⁴ Wo le rɔ, kɔkun mɛn ye Kadesi so ni Beredi so te, mɔɔilu ye wo kilila ko Lasayi Rɔyi.

¹⁵ Wo taminni kɔ, Hajara ka dence sɔrɔn Iburama yε. Iburama ka den tɔɔ la ko Isumayila.
¹⁶ Hajara ka Isumayila sɔrɔn tuma mɛn na, Iburama sɔrɔn tun da san biseyin ni san wɔɔrɔ bɔ.

17

Alla ni Iburama la teriya tɔɔmasere

¹ Iburama sɔrɔn ka san bikɔnɔndo ni san kɔnɔndo bɔ tuma mɛn na, Allabatala ka a jerε yiraka a la ka a fɔ a yε ko: «Nde le Alla Sebeetii ri. I ye n na sila taama ka kε mɔɔ telenni ba ri. ² Wo wa kε, n di an na teriya mafa i yε ka i bɔnsɔn siyaya kosebe.»

³ Iburama ka wo mɛn ka a jakɔrɔ ben duu ma. Alla kumara a yε ko: ⁴ «An ye teriya mɛn tala, wo le ye jin di. Jamana siyaman di bɔ i rɔ. ⁵ A te fɔ i ma butun ko Iburama. I kilitɔ le sisɛn ko Iburahima, baa n di i kε jamana siyaman benba ri. ⁶ N di i jiri kosebe. I bɔnsɔn di siyaya ka kε jamanailu ri. Mansailu ri bɔ i bɔnsɔn dɔ. ⁷ An na teriya wo ri tɔ an tɛma a ni i bɔnsɔnilu fanan, mɛnilu bεε natɔ i kɔ. Teriya wo te banna habadan. N di kε i Maari Alla ri, a ni i bɔnsɔn ta. ⁸ I ye londanya la jamana mɛn dɔ bi, n di jamana wo di ile ni i bɔnsɔn bεε ma. Kanaan jamana wo ri kε ile ni i bɔnsɔn ta ri habadan. N di kε i bɔnsɔn na Maari Alla ri.»

⁹⁻¹⁰ Alla ka a fɔ Iburahima yε ko: «I ni i bɔnsɔn bεε ye an na teriya sila taama ka n kan mira. Ai ka kan ka diyagboya ko mɛn kε, wo le ye jin di. Ai cε kelen kelenna bεε ye faaninta kε. ¹¹ Ai wa faaninta kε, wo ri kε an na teriya tɔɔmasere ri nde ni aile tɛma. ¹² Ka bɔ bi ma haan ka wa, denceilu bεε ye faaninta kε alu sɔrɔn tele seyin ma. Hali jɔnilu. Jɔn fen fen wa sɔrɔn i wara, i ye a faaninta kε wo ja le ma. I wa

jɔn fen fen san wodi la siya gbɛrɛilu ma, wo fanan ye faaninta kε ja kelen wo ma. ¹³ Ni a sɔrɔnda i wara, ni i ka a san i la wodigbe la, a bɛɛ ye faaninta kε. Wo le rɔ, n na teriya tɔɔmasere ri kε ai fari ma, ka a yiraka ko teriya wo ri mɛn kadawu. ¹⁴ Ni cɛ mɛn ma faaninta kε ka wo nɔ kε a fari ma, wo ye fara a badenmailu la, baa n kan mɛn diyagboya le, a ma wo kε. Wo rɔ, a ra n na teriya sila bila.»

¹⁵ Nba, Alla ka a fɔ Iburahima yε ko: «I kana a fɔ i muso ma butun ko Sarayi. A tɔɔ le sisɛn ko Saran. ¹⁶ N di baraka don a rɔ. N di a kε, a ri dencɛ sɔrɔn i yε. N di baraka don Saran na kɔ rɔ ka a kε siyailu ma ri. Mansailu ri bɔ a bɔnsɔn dɔ.»

¹⁷ Iburahima ka a jnakɔrɔ bɛn duu ma. Kɔni a ka Alla la kuma mɛn a yelera ka a fɔ a jɛrɛ kɔndɔ ko: «Cɛ mɛn sɔrɔn da san kɛmɛ bɔ, wo kɛtɔ den sɔrɔnna di? Saran fanan da san bikɔnɔndɔ sɔrɔn. Wo ri se moyila den na wa?» ¹⁸ A ka Alla madiya ko: «I jaandi. I ye baraka don Isumayila la ko rɔ, ka i janto a rɔ.»

¹⁹ Alla ka a jabi: «Wo kuma tɛ, kɔni i muso Saran di dencɛ sɔrɔn i yε. I ri a tɔɔ la ko Isiyaka. Teriya ri don n ni Isiyaka tɛma, a ni a bɔnsɔn mɛnilu natɔ a kɔ. Teriya wo ri mɛn kadawu. ²⁰ Mɛn lɔni Isumayila la ko ma, i ka mɛn dali n fɛ, n di wo kε. N di baraka don a la ko rɔ ka den siyaman di a ma, ka a bɔnsɔn siyaya kosebɛ. A ri faama tan ni fila sɔrɔn. N di jamana ba do bɔ a rɔ. ²¹ Kɔni n na teriya ri tɔ n ni Saran dencɛ Isiyaka le tɛma, mɛn Saran di sɔrɔn i yε jin tuma sandɔ.» ²² Alla banda kumala Iburahima yε tumana mɛn na, a bɔra Iburahima fɛ.

²³ Wo lon kelen dɔ, Iburahima ka Isumayi la faaninta kε, ka a la jɔn bεε fanan faaninta kε, menilu sɔrɔnni a wara a ni menilu sanni a bolo. Cεman kelen kelenna men bεε tεrε a wara, Iburahima ka wo bεε faaninta kε ikomin Alla ka a fɔ a yε na men ma. ²⁴ Iburahima jεrε ka faaninta kε ka a tεren a sɔrɔn da san bikɔnɔndɔ ni san kɔnɔndɔ bɔ. ²⁵ A dence Isumayila ka faaninta kε ka a tεren a sɔrɔn da san tan ni sawa bɔ. ²⁶ Wo lon kelen dɔ, Iburahima ni a dence Isumayila fila bεε ka faaninta kε, ²⁷ a ni cεman menilu bεε tεrε Iburahima wara. Jɔn menilu sɔrɔnni a wara, a ni menilu sanni a bolo siya gbereilu ma, woilu bεε ka faaninta kε a fε.

18

Isiyaka sɔrɔn ko

¹ Lon do rɔ, Allabatala ka a jεrε yiraka Iburahima la Mamere la jirijuilu kɔrɔ. Wo ka Iburahima siini tεrε a la faaninbon da la tele kunna rɔ. ² Iburahima ka a ja lɔ ka ce sawa lɔni yen. Alu tun ma jan a la. A ka alu yen tuma men na, a borimantɔ bɔra a la faaninbon da la ka wa alu labεn, ka a majii bake ka alu fo. ³ A ka a fɔ alu yε ko: «N tiili, ai jaandi, ai kana tamin n wara ten. ⁴ Ko ji ye na ka ai sen mako, ka ban ka ai jɔnjɔn lulen na. ⁵ N ye wa damunun fen jiinin a ye damunun ke. Baa, ai ra na ai la baraden wara. Ai ti se bɔla yan wo ja a ma damunun ke. A wa banda damununna a ri sila mira ka wa.» Alu ka Iburahima jabi: «Ale le wo ri, wo te baasi ri.»

⁶ Iburahima borimantɔ donda a la faaninbon na ka a fɔ Saran yε ko: «I kaliya ka fareni muu juma sumanifen ja sawa suman, ka a gbasi ka a kε buru

ri.» ⁷ Iburahima ka a bori ka wa nisi warε rɔ, ka nisiden tɔlɔni do mira, mɛn sobo duman. A ka wo don a la jɔn do bolo. Jɔn wo ka a kaliya ka nisiden kannatε ka a sobo tibi. ⁸ Iburahima ka nɔnɔ sunɔni ni nɔnɔ kɛndε ta, ka nisiden sobo tibini la woilu kan ka wa wo bεe sii lɔndan sawa kɔrɔ. Alu tere ye damununna tuma mɛn na, Iburahima ka a lɔ alu dafε jiri kɔrɔ.

⁹ Alu ka Iburahima majininka ko: «I muso Saran ye mi?» A kan ko: «A ye faaninbon na.»

¹⁰ Kelen kan ko: «N di na bɔ i fε jin tuma sandɔ. Wo ri a tɛrɛn i muso Saran da dencε sɔrɔn.»

Saran siini tere lɔndancε wo kɔfε faaninbon da la, ka a tolo malɔ a la. ¹¹ Wo tuma, Iburahima ni Saran da kɔrɔ kosebε. Den sɔrɔn waati ra tamin Saran kan. ¹² Saran ka kuma wo mɛn tuma mɛn na, a yelera a jere ma, ka a fɔ ko: «Nde kɔrɔni ba le. N ce fanan da cɛmɔɔya kosebε. N di se den sɔrɔnna wo rɔ, ka sewa wo rɔ wa?»

¹³ Wo rɔ, Allabatala ka a fɔ Iburahima yε ko: «Nfenna Saran ye yelela ka sika a den sɔrɔn ko rɔ a kɔrɔya waati? ¹⁴ Allabatala se kajala fen su numan de kɛla? Nin tuma sandɔ, n di na bɔ i fε yan. Wo ri a tɛrɛn i la muso Saran da dencε sɔrɔn.»

¹⁵ Saran silanda ka wuya fɔ ko: «Nde ma yelε de!» Koni Allabatala kan ko: «I yelera le jɔ!»

Iburahima ka Alla tara Sɔdɔmukailu yε

¹⁶ Nba, lɔndan woilu wuli mɛn keni ka wa, Iburahima wara alu bilasila. Alu sera tindi do kan ka alu ja lɔ Sɔdɔmu so fan fε lala. ¹⁷ Allabatala ka a fɔ a jere ma ko: «N ketɔ mɛn kɛla, n di wo dokon Iburahima ma wa? ¹⁸ Baa a ri ke jamatii ba ri, fanka ye mɛn na. Iburahima ri ke sababu ri, siya bεe ri baraka sɔrɔn n bolo. ¹⁹ N da a jnenematɔmɔn,

kosa a ri a denilu ni a bənsən bəε jamari ko alu ye n na sila taama telenbaya rə. Ni alu ka wo kε, n di n na teriya mafa, n ka mən ta Iburahima yε.»

20 Nba, Allabatala ka a fə Iburahima yε ko: «Sədəmukailu ni Kəmərikailu jalakili kan da siyaya. Alu la ko haramunnin a ra wara kosebə. **21** Wo rə, n watə alu ragbela, sa n di a lən ni alu ra kojuu kε ikomin a fəra n jana ja mən ma.»

22 Cε woilu bəra Iburahima tərəfə ka wa Sədəmu fan fə. Kəni Iburahima ləni tora Allabatala jnəkərə. **23** A ka a madon a la ka a fə a yε ko: «Allabatala, i ri jahadi la məə telenilu ni məə telenbalilu bəε jəən kan wa? **24** Ni i ka məə telenni biloolu tərən so kəndə ye, i ri jahadi la so kəndə məəilu bəε kan wa? I ti se so kəndə məəilu tola ye məə telenni biloolu woilu la ko kosən wa? **25** Ka məə telenilu faa məə telenbalilu fə, i tə ko su wo kəla fewu. I tə sənna ka məə teleni ni məə telenbalilu jate kelen di ka jahadi la alu bəε kan. I tə ko su wo kəla fewu! Ile le dunuya bəε kititəela ri, mən ye kojuu ni kojuma faranfaasila.»

26 Allabatala ka Iburahima jabi: «Ni n ka məə telenni biloolu tərən Sədəmu, n di so kəndə məə bəε to ye məə jnuma biloolu woilu la ko kosən.»

27 Iburahima ka a fə a yε ikə tuun ko: «Maari, i ye dijə. N tə foyi ri fo banku, kəni n ye n dajala ka kuma i yε. **28** Ni i ka a tərən məə telenni tə məə biloolu bə don? Ni məə loolu dərən ka məə biloolu jan, i ri jahadi la so bəε kan məə loolu woilu la ko kosən wa?» Allabatala ka a jabi: «Ni n ka məə telenni binaanin ni loolu tərən so kəndə, n tə jahadi la so kan.» **29** Iburahima kumara a yε ikə ko: «Ni məə telenni ma tamin məə binaanin kan

don?» Allabatala kan ko: «Məə binaanin woilu la ko kosən, n tə jahadi la so kan.» ³⁰ Iburahima kan ko: «Maari, i jaandi, i kana diminya n ma, kəni n ye kumala ikə. Ni i ka məə telenni bisawa dərən terən so kəndə don?» Allabatala kan ko: «Ni n ka məə telenni bisawa terən ye, n tə jahadi la so kan.» ³¹ Iburahima kan ko: «Maari, ye n dijə. N ye n dajala ka kuma i yə ikə. Ni i ka a terən ko məə telenni tə tamin məə muwan kan don?» Allabatala ka a jabi: «N tə jahadi la so kan məə muwan woilu la ko kosən.» ³² Iburahima kan ko: «Maari, i kana diminya n ma. N na kuma dan de jin di. Ni məə telenni muumə kəra məə tan di don?» Allabatala kan ko: «N tə jahadi la so kan məə tan woilu la ko kosən.»

³³ Allabatala banni kumala Iburahima fe, a wara. Iburahima ka i koseyi ka wa a wara.

19

Sədəmu ni Kəməri soilu Jahadi na

¹ Nba, m^ɛl^ɛka fila wo sera S^ɔd^ɔmu wura f^ɛ. Luti t^ɛre siini so donda la. A ka alu yen tuma m^ɛn na, a wulira ka wa alu lab^ɛn ka majii bake ka alu tuwa.

² A kan ko: «N tiilu, ai jaandi, ai ye dijn̄e ka na
jiya n wara. Ai ye ai sen mako ka sii yan. S̄oɔma
jona, n di sila di ai ma, sa ai ri wa ai la taama
r̄o.» M̄elekailu ka Luti jabi: «Een. An di sii k̄enema
yan.» ³ K̄oni Luti kumara alu ye ka a magbeleya,
foo alu s̄onda ka wa jiya a wara. A la m̄oɔilu ka
buru fununbali ni damunun ba raben. Luti ka wo
b̄ee sii a la l̄ondanilu k̄or̄. Alu ka damunun ke.

⁴ Ka a teren alu ma i la fələ, Sədəmukailu bəra fan bee rə ka na bon naminin. Kamareñilu wo, məəbakərəilu wo, alu bee nara. ⁵ Alu ka alu kan

nabə Luti ma ko: «Cε men nani i wara yan su jin də, alu ye mi? I ye alu lana an ma. An ye a fə ka an la alu fε.»

⁶ Luti bəra bon na, ka bon da tuun ləndanilu ma.

⁷ A ka fə: «N badenmailu. Ai jaandi, ai kana kojuu nin ke. ⁸ N denmuso fila ye yan, wo si ma cε lən fələ. N di woilu lana ai ma ka alu di ai ma. Fen fen wa diya ai yε, ai ye wo ke alu la. Kəni ai kana foyi ke cε ninilu la, baa alu nani ləndanya le la n wara.»

⁹ So kəndo məɔilu ka a fə i jəən yε ko: «Cε jin tε foyi le ri fo ləndan, kəni sisen a ye a fə ka ke an na kuntii ri.» Alu ka a fə Luti yε ko: «I bə sila la an tema. Ni i ma i bə an yərə, an di men ke i la, wo ri juuya i la ləndanilu ta ri.» Alu ka Luti tuntun fanka la ka sudunya bon na sa alu ri da kadi ka don. ¹⁰ Kəni cε fila woilu ka da laka ka alu boloilu labə ka Luti mira. Alu ka a ladon bon na ka da səətuma men na, ¹¹ alu ka məɔilu bεε ja fuyenya bon da kərə. Fen fen tərə don ko rə bon na, woilu bεε ja fuyenyara, kanberen wo, məɔbakərə wo, woilu bεε. Wo rə, alu ka bon da jinin ka kajna.

¹² Cε fila wo ka a fə Luti yε ko: «I la məə doilu ye so kəndo yan wa? I ye a bεε labə so kəndo. I biran wo, i denceilu wo, i denmusoilu wo, i la məə bεε labə, ¹³ baa an kətə so jin bεε halakila le. Alu jalakili kan da siyaya Allabatala jana. Wo rə, ale le ka an lə alu halakila.»

¹⁴ Nba, Luti bəra ka wa kuma a biranilu yε, menilu ka a denmusoilu mamira. A ka a fə alu yε ko: «Ai ye wuli. An ye an borı ka bə so kəndo. Allabatala kətə so halakila le!» Kəni, Luti biranilu ka a kuma jate yεləmako le ri.

¹⁵ Səəma da la, mələka woilu ka a fə Luti yε ka a magbəleya a yε ko: «I kaliya! I ye i muso ni i

demuso fila ta ka wa. Ni wo tε, ai ri halaki so jahadi rø.» ¹⁶ Koni, Luti ka a la sumaya. Wo rø, alu ka a mira a bolo ma, a ni a muso ni a denmuso fila ka wa alu ri so kɔkan. Allabatala kinikinira alu ma wo ja le ma. ¹⁷ Alu bɔ men keni so kɔndo, méléka kelen ka a fɔ alu yε ko: «Ai ye ai bori ka wa ka ai jεre kisi. Ai kana ai kɔfεnε. Ai kana ai lɔ kεnεgbε yɔrø si rø. Ai ye i bori ka wa koyinkε kan, sa ai kana halaki.»

¹⁸ Luti ka fɔ: «εε, n tii. I jaandi. ¹⁹ I ra ban ka n kisi, kɔni n ti se n borila foo koyinkε kan. Sani n ye se ye, n di jahadi sɔrɔn. ²⁰ I ja lɔ. I ma so wo yen, men ma jan yan na. So wo ka doo. N di se wo sɔrɔnna. N tii, i jaandi. N ye n bori ka wa so misen wo la, sa n di kisi.»

²¹ Méléka kan ko: «Ale le wo ri. N da dijε wo ma. I kan so men ma wo ri, n tε jahadi la wo kan. ²² Koni ai ye i kaliya ka wa don ye. Ni ai ma se ye, n ti se foyi kεla.» So men Luti ka a fɔ a ma ko a dooman, so wo tɔɔ lara ko Sowari.

²³ Luti donda Sowari so kɔndo ka a tεrεn tele ra yεlε. ²⁴ Wo tuma, Allabatala ka ta tinbiriki lama lajii Sɔdɔmu ni Kɔmɔri kan ikomin sanci kisε. Allabatala jεre le ka wo lajii ka bɔ sankolo rø. ²⁵ Wo rø, Allabatala ka so woilu bεε janin, a ni kεnεgbε bεε. Mɔɔilu bεε halakira, a ni jiri ni bin bεε. ²⁶ Alu watɔla, Luti muso ka kɔfεnε dinkira men dɔ, a yεlεmanda ka ke kɔɔ kaba ri.

²⁷ Wo sɔɔma da la jona, Iburahima wara kuma diya wo rø, a ni Allabatala tun kumara i jɔɔn fε dinkira men kɔnin. ²⁸ A ka a ja lɔ ka Sɔdɔmu ni Kɔmɔri soilu ragbε, a ni kεnεgbε bεε. A ka sisi

wulitəla yen. Sisi bɔra ikomin ta wa jiri mira furu kɔndo.

²⁹ Nba, Alla ka kɛnegbe so bɛɛ halaki tuma mɛn na, a ka a miri Iburahima ma ka Luti kisi ta la halakili ma. Ta wo ka so bɛɛ halaki, Luti siini tere dinkira mɛn do.

Luti ni a denmuso fila la ko

³⁰ Luti ma sɔn ka to Sowari ka a masɔrɔn a silanni. Wo rɔ, a ka a denmuso fila ta ka wa alu ri koyinke kan. Alu ka alu sii falan na ye. ³¹ Londo rɔ a denmuso kɔrɔmamɔɔ ka a fɔ a doomuso ye ko: «An fa ra kɔrɔya. Ce fanan tɛ yan, mɛn di an furu, ikomin a ye kɛla dunuja fan bɛɛ rɔ ja mɛn ma. ³² An ye dɔlɔ di an fa ma. A wa a min ka a ja laminin, an di an la a fe, sa an di den sɔrɔn, sa an fa bɔnsɔn kana tunun dunuja ma.» ³³ Alu ka dɔlɔ di alu fa ma su wo rɔ. A ka a min foo ka a ja laminin. A denmuso kɔrɔmamɔɔ wara a la a fe. Luti ma a la tumana lɔn. A ma a wuli tumana fanan lɔn.

³⁴ Wo sɔɔma da la, Luti denmuso kɔrɔmamɔɔ ka a fɔ a doomuso ye ko: «Su rɔ, n ka n la n fa fe. Su ba ko, an ye dɔlɔ di a ma ikɔ. A wa a min ka a ja laminin, ile ri wa i la a fe, sa an fa bɔnsɔn kana tunun dunuja ma.» ³⁵ Alu ka dɔlɔ di alu fa ma su wo rɔ ikɔ. A ka a min foo ka a ja laminin. A denmuso doomamɔɔ wara a la a fe. Luti ma a la tumana lɔn. A ma a wuli tumana fanan lɔn.

³⁶ Nba, Luti denmuso fila bɛɛ ka kɔnɔ ta Luti fe ja wo le ma. ³⁷ A denmuso kɔrɔmamɔɔ ka dence sɔrɔn ka a tɔɔ la ko Mowabu. Mowabu bɔnsɔn mɛn ye ye bi, wo benba le wo ri. ³⁸ A doomuso fanan ka dence sɔrɔn, ka a tɔɔ la ko Benami. Amoni bɔnsɔn men ye ye bi, wo benba le wo ri.

20

Ko mën taminda Iburahima ni Abimeleki tëma

¹ Nba, Iburahima bëra Mamere ka wa Nekebi, ka taa i sii Kadësi a ni Suri so fila tëma. Ka a teren a ye Kerari, ² Iburahima ka a fɔ ye mɔɔilu ye Saran na ko rɔ ko: «N doomuso le.» Wo le rɔ, Kerari mansa Abimeleki ka a la mɔɔilu lɔ Saran mirala kosa a ri a ke a la muso ri. ³ Koni su do rɔ, Alla ka a jere yiraka Abimeleki la sibo rɔ, ka a fɔ a ye ko: «Abimeleki i ja lɔ. A te mën i ri faa dε, baa i nɔ muso mën mirala jin di, a furunin de.»

⁴ Wo ka a teren, Abimeleki tun ma a la Saran fe fɔlɔ. Wo rɔ, a ka Alla jabi: «Faama, i ri se n na jamana halakila hali an ma kojuu ke wa? ⁵ A cε le ma a fɔ n ye ko a doomuso le jin di wa? Muso fanan ma a fɔ ko ale kɔrɔcε le wa? N kɔnin ka ko jin ke jusu gbεya le la. N ma kojuu ke.»

⁶ Alla ka Abimeleki jabi sibo kelen wo rɔ ko: «N ka a lɔn ko i ka ko jin ke jusu gbεya le rɔ. Wo le rɔ, nde le ka a ke, i ma i la a fe fɔlɔ ka ko haramunnin ke. ⁷ Nba, cε wo muso laseyi a ma. N na nabijuma de a ri. A ri madiyali ke i ye sa i kana faa. Ni i ma a muso laseyi a ma, i ye la a la ko i ri faa fewu, i ni i la mɔɔ bεε!»

⁸ Sɔɔma da la jona, Abimeleki ka a la mɔɔilu kili ka ko wo bεε nafɔ alu ye. Alu ka wo mën ka silan kojuuya. ⁹ Abimeleki ka Iburahima kili ka a fɔ a ye ko: «Cε, i ka nfen ke an na jin de ten? N na kojuu su juman kɛla i la fo i ra kojuu jin jɔɔn nase nde ni n na jamana mɔɔilu ma? I ra mën kɛla n na jin, mɔɔ ma kan ka wo ke i mɔɔjɔɔn na habadan! ¹⁰ I ka ko jin ke nfenna?»

¹¹ Iburahima ka a jabi: «N tere ye n mirila le ko n te mao soren jamana pin do, men silanni Alla ye. N ko yan maoilu ri n faa n na muso koson. Wo le ro, n ka a fo i ye ko n doomuso le. ¹² Wo bee ni a ta, n doomuso bere bere le a ri. An bee ye fa kelen de la, koni an te na kelen na. N ka a furu ka a ke n muso ri. ¹³ Alla ka n nabon fa wara tuma men na n ka wa taama ro, n ka a fo Saran ye ko: «I ka kan ka numaya men ke n ye wo ro, wo le ye pin di. An wa wa yoro yoro, i ye a fo ye maoilu ye ko «N koroce le a ri.»»

¹⁴ Abimeleki ka Iburahima muso Saran naseyi a ma, ka saailu ni bailu ni nisiilu la a kan, a ni jenilu. ¹⁵ A ka a fo Iburahima ye ko: «N na jamana ragbe. A yoro men wa diya i ye, i ye wa i sii ye.»

¹⁶ A ka a fo Saran ye ko: «A ragbe! N da wodigbe waa kelen di i koroce ma ka a yiraka ai wara mao bee la ko i ma kojuu ke. Mao bee ri a lon ko i ra jo soren.»

¹⁷ Iburahima ka Alla tara Abimeleki ye. Wo ro, Alla ka Abimeleki lakendya, a ni a la muso ni a la jenmuso bee, wo le ro ai ri se den soren ik tuun ¹⁸ baa Allabatala tun da densorenbaliya jankaro le bila Abimeleki muso bee la Iburahima muso Saran mira koson.

21

Isiyaka soren ko

¹ Allabatala hinara Saran na ikomin a tun ka a fo ja men ma. A ka lahidi men ta a ye folo, a ka wo mafa. ² Wo ro, Iburahima la cemao'baya waati ro, Saran ka kono ta ka dence soren a ye, waati men foni Alla bolo koromanna. ³ Saran ka dence men soren,

Iburahima ka wo tɔ̄ la ko Isiyaka*. ⁴ Isiyaka sɔ̄rɔ̄n tele seyin, Iburahima ka a faaninta kε, ikomin Alla ka a jamari a yε ja mɛn ma fɔ̄lɔ̄. ⁵ Isiyaka sɔ̄rɔ̄nda ka a t̄erɛn Iburahima sɔ̄rɔ̄n da san kεmε bɔ̄. ⁶ Saran kan ko: «ɛɛ! Alla ra n nasewa foo n da jañalen ka yεlε baki. Ko jin ba fɔ̄ mɔ̄j mɛn yε, wo fanan di sewa ka yεlε n fε.» ⁷ Saran kumara ikɔ̄ ko: «Yon tun di a fɔ̄ Iburahima yε ko Saran di sin di den ma wa? Kɔni n da dence sɔ̄rɔ̄n a yε, ka a t̄erɛn a ra cεmɔ̄oya kosebε.»

Hajara ni a den gbenda

⁸ Nba, den bonyara. Ie ka a da bɔ̄ sin na lon mɛn dɔ̄, Iburahima ka tolon ba kε. ⁹ Misiranka muso Hajara ka dence mɛn sɔ̄rɔ̄n Iburahima yε, wo t̄ere ye Isiyaka mayelela. Saran ka wo yen ¹⁰ ka a fɔ̄ Iburahima yε ko: «I ye jɔ̄nmuso wo ni a dence gben. N dence Isiyaka le dɔ̄rɔ̄n di kε i cεtala ri. A dence tε kε i cεtala ri fewu!»

¹¹ Saran na kuma wo gbara Iburahima la kosebε, ka a masɔ̄rɔ̄n Isumayila fanan ye a den de ri. ¹² Kɔni Alla ka a fɔ̄ a yε ko: «Iburahima, wo kana gba i la i dence ni i la jɔ̄nmuso la ko. Saran ba fen fen jinin i fe, i ye wo ke a yε, baa n ka bɔ̄nsɔ̄n mɛn lahidi ta i yε, bɔ̄nsɔ̄n wo bɔ̄tɔ̄ Isiyaka le rɔ̄. ¹³ Kɔni n di i la jɔ̄nmuso dence bɔ̄nsɔ̄n fanan siyaya ka a kε jamatii ri ka a masɔ̄rɔ̄n a bɔ̄ra ile le rɔ̄.»

¹⁴ Wo duu sa gbəni, Iburahima ka buru ta ka a di Hajara ma, ka ji kε jikεfen gbololama kɔ̄ndɔ̄ ka wo fanan di a ma. A ka a den di a ma ko alu ye wa. Hajara bɔ̄ra Iburahima wara wo rɔ̄ ka wa a mataama wula kɔ̄ndɔ̄, Béri Seba so kɔ̄kan. ¹⁵ Alu ka alu mataama wula kɔ̄ndɔ̄ haan ji banda jikεfen

* **21:3** Isiyaka kɔ̄rɔ̄ ye le ko a ye yεlεla

kondə. Ji banda tuma mən na, Hajara ka a den to jirinin do lulen na. ¹⁶ A ka a mabə a den na ko bijə səməndiya ko kelen jatela ka a sii, baa a ka a miri ko a tə a fə ka a den faatəla yen. A ka a sii ye ka kasi kojuuya. ¹⁷ Kəni Alla ka den kasi kan mən. Wo rə, Alla la məleka ka a kan nabə Hajara ma ka bə sankolo rə. A kan ko: «Hajara, nfen kəni? I kana silan. Alla ra i den kasi kan mən. ¹⁸ I wuli ka wa den bolo mira. N di a bənsən siyaya ka a kə jamana ba ri.»

¹⁹ Alla ka Hajara ja laka. A ka kələn do yen. A wara jikəfen nafa ji rə ka na a di den ma. Den ka ji min. ²⁰ Alla tora den fə. A kunbayara, ka a sii wula kondə ka a kə bijəfilila ri. ²¹ A siini tərə Paran wula kondə. A na ka Misiranka muso do furu ka wo di a ma.

Iburahima ni Abimeləki la teriya

²² Nba, lon do rə Abimeləki ka a la kəledeñ kuntii Pikəli ta ka wa Iburahima wara. A ka a fə Iburahima ye ko: «Alla ye i fə i la ko bəə rə. ²³ Wo rə, n ye a fə i ye i kali Alla la yan bi, ko nde ni n denilu, a ni n mamarenilu, ko i tə an si janfa. I ye ləndan de ri n na jamana rə yan. N ka ȳumaya mən kə i ye wo rə, n da wo kə. Wo ja kelen ma, i ka kan ka ȳumaya wo kə n ye, i ye wo kə. I ye an na jamana mən də bi, i ka kan ka ȳumaya mən kə wo la məəilu ye, i ye wo fanan kə.» ²⁴ Iburahima kan ko: «Ale le wo ri, n da n kali wo la.» ²⁵ Kəni Iburahima ka Abimeləki jalaki kələn do la ko rə, baa Abimeləki la jənilu tun da wo mira fanka la. ²⁶ Abimeləki ka Iburahima jabi: «N ma a lən n na jən mən ka kələn mira. Ile ma foyi fə n ye. N ma a lən fo bi.»

²⁷ Iburahima ka a la saa doilu bɔ, a ni a la bailu a ni a la nisilu bɔ ka a di Abimeleki ma, alu la teriya rɔ. ²⁸ Iburahima ka saadeni musoman wɔrɔnwula gberɛ fanan bɔ a la saa kuru rɔ. ²⁹ Abimeleki ka a majininka ko: «I ka saaden musoman wɔrɔnwula nin bɔ nfenna ko rɔ?» ³⁰ Iburahima kan ko: «Saadeni wɔrɔnwula nin mira. Alu ye kɛ an sere ri ka a yiraka ko nde le ka kɔlɔn nin sen.» ³¹ Wo le rɔ, alu ka dinkira wo tɔɔ la ko Béri Seba†, baa Iburahima ni Abimeleki ka alu kali alu joɔn ye dinkira wo le rɔ.

³² Alu ka alu kali alu joɔn ye tuma men na, Abimeleki ni a la kɔledeñ kuntii Pikoli ka alu kɔseyi alu wara Filisiti jamana rɔ.

³³ Iburahima ka tamarisi ju turu Béri Seba ka Allabatala bato, Maari men te banna kɔnin.

³⁴ Iburahima menda Filisiti jamana wo rɔ ka waati jan kɛ ye.

22

Alla ka Iburahima kɔrɔbɔ a dence la ko rɔ

¹ Nba, waati wo taminni kɔ rɔ, Alla ka Iburahima kɔrɔbɔ. A ka a kili ko: «Iburahima.» Iburahima kan ko: «Naamun.» ² Alla kan ko: «I ye Isiyaka ta, i dence kelen pe, men duman i ye. I ye wa a ri Morija mara rɔ. N di koyinkɛ do yiraka i la ye. I ye wa koyinkɛ wo kan ka Isiyaka kɛ saraka ri ka n sɔ a la ye. I ye a faa ka a janin ka a kɛ buuri ri.»

³ Wo Duusa gbəni, Iburahima wulira jona ka lɔɔ tɛe Alla sɔlifen janin kanma ka a la fali rabɛn. A ka a la jɔncɛ fila kili, a ni a dence Isiyaka. Alu bɛɛ ka sila mira ka wa. Alla ka dinkira men ko fɔ a

† **21:31** Béri Seba kɔrɔ ye le ko Teriya Kɔlɔn

yε, alu wara ye. ⁴ Alu ka tele sawa kε taaman na. Iburahima ka a ja lɔ wula jan na ka dinkira wo yen. ⁵ Iburahima ka a fɔ a la jɔnilu yε ko: «N ni n dence wato koyike wo kan ka Alla bato. Ai ye an makɔnɔ fali dafε yan. An natɔ.»

⁶ Iburahima ka Alla sɔlifen janin lɔɔ sii a dence Isiyaka kun ma, ka a la muru ta, a ni takisε. Alu fila wara alu jɔɔn fε. ⁷ Isiyaka ka a fɔ a fa yε ko: «N fa.» Iburahima kan ko: «Naamun.» Isiyaka kan ko: «Takisε ye an bolo, lɔɔ fanan ye an bolo. Saadennin ye mi, an ye mɛn kela saraka ri ka a di Alla ma?» ⁸ Iburahima ka a jabi: «N den, Alla ri an mako ja ka saadenin ko jɔnanabɔ.» Alu fila tora wa la i jɔɔn fε.

⁹ Dinkira mɛn ko fɔni a yε Alla bolo, alu sera ye. Iburahima ka saraka bɔ diya lɔ ka lɔɔ la wo kan. Wo keni, a ka a dence Isiyaka sidi ka a lala saraka bɔ diya kan lɔɔ kun na. ¹⁰ A ka a la muru ta ko a ye a dence kannateɛla.

¹¹ Kɔni Allabatala la mɛlɛka tora sankolo rɔ ka a kan nabɔ Iburahima ma ko: «Iburahima, Iburahima!» Iburahima kan ko: «Naamun.» ¹² Mɛlɛka kan ko: «I kana i bolo lase i den ma de! I kana foyi kε a la. N da a lɔn sisɛn ko i silanni Alla yε, ka a masɔrɔn i ma i ban ka i dence kelen pe di Alla ma.»

¹³ Iburahima ka a ja lɔ ka saaji do yen. A mirani a kere ma tunin do rɔ. Iburahima wara saaji wo mira ka a kε saraka ri Allabatala sɔ kanma a dence nɔ rɔ. A ka a faa ka a janin ka a kε buuri ri. ¹⁴ Iburahima ka dinkira wo tɔɔ la ko: «Allabatala di mɔɔ mako ja.» Wo le rɔ, mɔɔilu ye a fɔla bi ko: «Allabatala di mɔɔ mako ja a la koyinke kan.»

¹⁵ Allabatala la mɛlɛka tora sankolo rɔ ka Iburahima kili a sijna filana rɔ, ¹⁶ ka a fɔ a yε ko:

«Allabatala kan ko: «I ma i ban i dencε kelen pe faala ka a kε saraka ri ka a di n ma. Ikomin i ra wo kε, n da n kali n jεrε tøø la, ko ¹⁷ i ri baraka. N di i bønsøn siyaya iko lolo ye sankolo røøna mεn ma, wala køøji da la kijøø siyaman yε na mεn dø. I bønsøn di se alu juuilu la, foo ka woilu la soilu mira alu la. ¹⁸ Wo ri ke sababu ri, siya bεε ri baraka sørøn n bolo i bønsøn fε, baa i ra n kan mira ka a kε.»»

¹⁹ Nba, Iburahima ni a dencε ka alu køseyi ka wa a la jønilu tøøn ye. Alu bεε ka sila mira ka wa Bεri Seba. Iburahima ka a sii ye le ka mεn.

²⁰ Waati wo taminni, a føra Iburahima yε ko a badenma cε Nakøri muso Milika fanan da dencεilu sørøn. ²¹ A dencε føløma tøø ko Usi. A dencε filana tøø ko Busi. A dencε sawana tøø ko Kemuheli. Kemuheli wo ye Aramu fa le ri. ²² Milika dencε naaninna tøø ko Kesedi, ka Haso tuun wo la, ka Pilidasi tuun wo la, ka Yidilafe tuun wo la, ka ban ka Betuwøli tuun wo la. ²³ Betuwøli wo le denmuso le Rebeka ri. Milika ka dencε seyin wo le sørøn Iburahima badenma cε Nakøri yε. ²⁴ Nakøri muso filana, mεn tøø ko Rehuma, wo fanan ka dencεilu sørøn a yε. Wo dencεilu tøø le ten: Tebaki, Kahamu, Tahasi a ni Mahaka.

23

Saran na sayø

¹ Saran ka san kεmε ni san muwan ni wørønwula bøtuma mεn na, ² a sara Kanaan jamana Kiriyati Ariba so køndø, mεn tøø bi ko Heburøn. Iburahima ka a sii Saran suu kun na a ka kasi.

³ Iburahima børa a muso Saran suu dafε, ka wa kuma Hetika yε, ⁴ a kan ko: «Nde ye løndan de ri ai

wara yan. Ai ye dinkira do san n ma, sa n di a kε kaburu so ri ka n muso suu don ye.»

⁵ Hεtika ka Iburahima jabi: ⁶ «An fa, i tolo malɔ an kan na. Ile ye Alla la faamaden de ri an tεma yan. An na kaburu so dinkira mεn ba diya i yε, i ye i la suu don ye. An si te an ban wo ma ka an na duu di i ma. I ye i muso suu don.»

⁷ Iburahima ka a wuli ka a majii Hεtikailu jana. ⁸ A ka a fɔ alu yε ko: «Nba, ni ai sonda n ye n muso sutura, aijaandi, ai ye Sokari dence Efurɔn madiya n yε. ⁹ Falan mεn ye a bolo Makipela, a la sεnε kɔnkɔ fe kɔnin, a ye wo san n ma. A sankɔ wa kε wodi mεn di, n di wo di a ma ai jnakɔrɔ yan, sa dinkira wo ri kε n na kaburu so ri.»

¹⁰ Wo ka a tεren Efurɔn jεre siini Hεtika tεma so donda la ye, baa ale fanan tεre Hεtika de ri. A ka Iburahima jabi jama bεε jana ko, ¹¹ «An fa, i tolo malɔ n kan na. N di sεnε ni falan bεε di i ma ka a la a jnɔɔn kan. N ye a bεε dila i ma ka n badenmailu kε a sere ri. Wa, i muso suu don.» ¹² Iburahima ka a majii so kɔndɔ mɔɔ bεε jana. ¹³ A ka a fɔ Efurɔn yε wo bεε jnakɔrɔ ko: «I jaandi, i tolo malɔ n na. N di sεnε jn̄in sankɔ di i ma. I ye a mira, sa n di wa n muso suu don ye.» ¹⁴ Efurɔn ka a fɔ Iburahima yε ko: ¹⁵ «N na faama, i tolo malɔ n na. Sεnε jn̄in sankɔ te tamin wodigbe kilo naanin a ni tala la. Wo ri nfen ja nde ni ile tεma? Wa i muso suu don.»

¹⁶ Efurɔn ka sεnε sankɔ mεn fɔ, Iburahima sonda wo ma. A ka wodigbe wo suman Hεtika bεε jana ka a di Efurɔn ma, wodigbe kilo naanin a ni tala la, ka bεn julailu la sumanni ja ma.

¹⁷ Wo rɔ, Iburahima ka Efurɔn na sεnε san a ma, sεnε mεn tεre Makipela, Mamere fan fε. Sεnε wo ni

a falan ni a jiri b^{ee} haan ka wa se sene dan na, ¹⁸ wo b^{ee} kera Iburahima ta ri. Hetika men b^{ee} siini tere laden do so donda la ye, woilu kera alu sere ri.

¹⁹ Iburahima bora ye ka a wa a muso Saran suu don falan na Makipela, Mamere fan fe Kanaan jamana. Mamere wo too le fanan ko Heburon. ²⁰ Wo le koson, sene wo ni a falan b^{ee} kera Iburahima ta ri, ka a ke a la kaburu so ri. A ka wo san Hetika de ma.

24

Isiyaka ka Rebeka furu

¹ Nba, Iburahima koryara kosebe, Allabatala tun ka baraka don a la ko b^{ee} ro. ² Lon do ro, a ka demenba kili, men ye a la nanfulu kunnasiila ri, a ka a fo a ye ko: «I bolo la n woro kore ka lahidi ta n ye ka i kali. ³ An siini Kanaan bonsen de tema yan, koni n ye a fe i ye i kali Allabatala too ro, men ye sankolo ni duukolo tii ri, ko i te Kanaan bonsen denmuso si furu ka a di n dence ma. ⁴ I ye i kali ko i ri wa n fa jamana ro, ka wa denmuso do furu n dence Isiyaka ye n badenmailu wara.»

⁵ Demenba wo kan ko: «Ni denmuso ma son ka na nde kofe yan don? N ye wa i dence ri i fa jamana ro wa?»

⁶ Iburahima kan ko: «Een de! I kana wa n dence ri ye fewu! ⁷ Allabatala Alla, men ye sankolo tii ri, wo ka n nabon fa so la, ka n nabon soron jamana ro. A kumara ka a kali n ye ko a ri jamana nin di n bonsen ma. Ale le jere keto a la meleka bilala i ne ka wa n fa jamana ro, sa i ri muso do soron n dence ye. ⁸ Ni muso ma son ka na i kofe, wo kalili kunko ri bo i ma, koni i kana wa n dence ri de!» ⁹ A demenba

ka a bolo la a tii Iburahima woro kɔrɔ ka a kali ko a ri wo bɛɛ keɛ.

¹⁰ Wo rɔ, Iburahima la dəmənba ka jɔɔmɛ tan ta a tii la jɔɔmɛilu rɔ ka wa Nakɔri la so la, Aramu Naharayimu mara rɔ. A tii la fen jnuma ba doilu wara a kun ma. ¹¹ A se mɛn kɛni ye, a ka jɔɔmɛilu lala kɔlɔn da la so kɔkan. A donda wura da le fe, musoilu ye wala ji ta diya kɔlɔn da la waati mɛn dɔ.

¹² A ka Alla tara ko: «Allabatala, n tii Iburahima Maari Alla, i jaandi, i ye n na sila diya n na bi. I ye jnumaya keɛ n tii Iburahima ye. ¹³ N lɔni kɔlɔn da la yan, so kɔndɔ sunkurunilu ri na ji ta diya yan sisen. ¹⁴ N ba a fɔ sunkurun mɛn ye ko: ‹I la jitafen najii ka n sɔ ji rɔ, n ye n min›, ni wo ka n sɔ, ka ban ka n na jɔɔmɛilu fanan namin, nba sunkurun wo ye keɛ i la baaraden Isiyaka muso ri, i jɛrɛ ka mɛn nateɛ a ma. Ni wo bɛɛ kɛra, n di a lɔn ko i ra jnumaya keɛ n tii ye ka a masɔrɔn i ra keɛ a Maari Alla ri.»

¹⁵ Sani a ye ban Alla matarala, Rebeka nara ka a tɛrɛn a la jitafen ye a kamannakun kan. Rebeka ye Betuwɛli denmuso le ri. Betuwɛli ye Milika dencɛ le ri. Milika ye Nakɔri la muso le ri, Iburahima kɔrɔcɛ kɔnɛn. ¹⁶ Sunkurun wo kɛji kosebɛ. A ma cɛ lɔn fɔlɔ. A wara ji ta diya, ka a la jitafen nafa ka a kɔseyi. ¹⁷ Iburahima dəmənba ka i bori ka wa a laben, ka a fɔ a ye ko: «N na, i jaandi, i ye n sɔ ji rɔ, n ye n min.»

¹⁸ Sunkurun ka a kaliya ka a la jitafen majii, ka cɛ wo jabi: «N fa, i min.» A ka a la jitafen mira a bolo la ka cɛ sɔ ji rɔ. ¹⁹ A banni ji minna, sunkurun kan ko: «I lɔ, n di wa ji ta ka i la jɔɔmɛilu fanan sɔ ji rɔ. A bɛɛ ye alu min ka wasa.» ²⁰ A ka i kaliya

ka a la jitafen najii ka ji kε kolofen na jiminfen kondø ka i bori ka wa ji ta ikø. A tora ji tala ka na haan jøømeilu bεε banda alu minna. ²¹ A tεε ye baara wo kan tuma mεn na, cε wo ka a lø ka a mafεnε. A ma foyi fø. A ka sunkurun kørøsi ka a løn ni Allabatala da a la sila diyala.

²² Nøømε bεε banda ji minna tuma mεn na, cε ka nundølafen sanin do labø, mεn sumannin di karamun loolu bø. A ka bololafen sanin fila fanan nabø, mεn sumannin di karamun kεmε a ni karamun tan ni loolu bø. ²³ A ka sunkurun majininka ko: «Hakε to, yon denmuso ye ile ri? I fa ri søn ka nde ni n taamajøønilu jiya a wara wa?» ²⁴ Rebeka ka a jabi: «Nakøri ni Milika dencε Betuweli, wo denmuso le nde ri. ²⁵ Ai ri jiya diya sørøn an wara. Bin ni fira siyaman ye an bolo fanan ka a di i la jøømeilu ma.»

²⁶ Cε ka wo mεn ka a tin birin ka Allabatala bato. ²⁷ A kan ko: «N di Allabatala tando, n tii Iburahima Maari Alla, a ma ban a la kaninteya ma. Allabatala le ka a lø n jøørø ka n na n di n tii Iburahima badenmailu ma yan.»

²⁸ Sunkurun ka a bori ka wa a bεε jøøfø møøilu yε a na wara. ²⁹ Wo ka Rebeka kørøcε do tεren ye, mεn tøø ko Laban. Wo ka wo bεε mεn tuma mεn na, a børa ka a bori ka wa cε wo kø køløn da la, ³⁰ baa Laban tun ka nundølafen ni bololafen yen a doomuso bolo la. Rebeka ka a dantεeli mεn kε, Laban tolo tεren ye wo bεε la. A sera køløn da la, ka cε løni tεren a la jøømeilu dafε. ³¹ Laban ka a fø a yε ko: «N fa, ile, Allabatala ka baraka don ile mεn na kø rø, nfenna i løni køkan yan? An ye wa lu ma. N da dinkira rabøn i yε, ka dinkira fanan dabøn i la jøømeilu yε.»

³² Wo rɔ, cε wara Laban kɔ fε lu ma. Alu sisen ye, Laban ka jnɔmεilu la donin bεε lajii, ka bin ni fira di alu ma. A nara ji di cε ni a taamajnɔɔnilu ma. Alu ka alu sen mako. ³³ A ka damunun sii alu kɔrɔ. Kɔni cε kan ko: «N tε damunun kela fɔlɔ, fo n ye dantεeli ke fɔlɔ.» Laban ka a jabi: «Ale le wo ri. I ye dantεeli fɔlɔ ke.»

³⁴ Cε kan ko: «N ye Iburahima dεmenba le ri. ³⁵ Allabatala ka baraka don n tii la wo rɔ kosebε ka a kε nanfulutii ri. A ra saa ni ba ni nisiilu di a ma, a ni wodigbε ni sanin, a ni jɔnilu, a ni jnɔmεilu ni faliilu. ³⁶ N tii Iburahima muso Saran ka dence sɔrɔn a yε a la musokɔrɔbaya waati rɔ. N tii ra a bolofen bεε di a dence wo le ma. ³⁷ Nba, lon do rɔ, n tii ka a fɔ n ye ko n ye n kali a yε ko a siini Kanaan bɔnsɔn wara mεn dɔ nin, ko n kana sɔn ka wo denmuso si furu a dence yε. ³⁸ Ko n ye wa a fa jamana rɔ ka muso jninin a dence yε a badenmailu wara. ³⁹ N ka a mapininka ko ni denmuso ma a sɔn ka na n kɔ fε don? ⁴⁰ A ka n jabi a ye taamala ka bεn Allabatala mεn kan ma, wo jere ri a la mεleka bila n jε ka n na sila diya n na, kosa n di muso furu a dence yε a badenmailu wara a fa jamana rɔ. ⁴¹ N tii kan ko n ba se a fa la jamana rɔ, ko ni a badenmailu ka i ban muso dila n ma, ko n na kalili kunko ri bɔ n ma wo rɔ. Ko kalili kunko wo tε bɔ n ma ja gbεrε si ma fo wo ba kε.

⁴² «Nba, n se mεn kεni kɔlɔn da la bi, n ka Alla matara ko: «Allabatala, n tii Iburahima Maari Alla, i jaandi, i ye n na sila diya n na. ⁴³ N lɔni kɔlɔn da la yan. Sunkurun mεn ba na ji ta diya yan, ni n ka a fɔ wo yε ko: «Na, i ye i la jitafen najii ka n sɔ ji rɔ,» ⁴⁴ ni a ka n jabi: «Do min, n ye wa do fanan ta ka na a di i la jnɔmεilu ma,» nba sunkurun wo ye

ke n tii la dence la muso ri, Allabatala jere ka men natee a ma.» ⁴⁵ Nba, sani n ye ban madiyali kela n kəndə, n ka Rebeka natəla yen. A la jitafen ye a kamannakun kan. A wara jitafen wo lafa. N ka a fə a ye ko: «N na, n sə ji rə.» ⁴⁶ A ka a kaliya ka jitafen majii a kamannakun na ka a fə ko: «I min. N di i la nəomeilu fanan sə ji rə.» Wo rə, n ka n min. N banni n minna, a ka n na nəomeilu fanan sə ji rə. ⁴⁷ N ka a majininka ko: «Yon denmuso ye ile ri?» A kan ko: «Nakəri ni Milika dence Betuweli denmuso le nde ri.» N ka nundəlafen don a nun də, ka a bololafen bila a bolo la. ⁴⁸ N ka n tin birin ka Allabatala bato, n tii Iburahima Maari Alla kənin. N ka wo tando ka a masərən a ka a lə n nərə ka na n di n tii Iburahima badenmailu wara, ka alu denmuso sərən n tii dence yε. ⁴⁹ Nba, ni alu ye a fε ka kaninteya yirika n tii la, ai ye wo fə n yε. Ni ai fanan ti se wo kəla, ai ye wo fə n yε, kosa n ka kan ka men ke, n ye wo ke.»

⁵⁰ Laban ni Betuweli ka a jabili ke ko: «Ko jin bəni Allabatala jere le rə. An ti se wo masəsəla. ⁵¹ Rebeka le jin di. A ta, i ye wa a ri. A ye ke i tii dence la muso ri, ikə Allabatala a ra a latee ja men ma.» ⁵² Iburahima dəmenba ka jabili wo men tuma men na, a ka a nakərə ben duu ma ka Allabatala bato. ⁵³ A ka wodigbə masidilifen ni sanin masidilifen labə ka woilu di Rebeka ma, a ni faanin. A ka fen juma bailu di a kərəcə ni a na fanan ma.

⁵⁴ Wo rə, kuma wo banni, cε ni a taamajəənilu ka damunun ke, ka alu min, ka su si. Alu kununni səoma da la, cε ka a fə Rebeka la məəilu yε ko, «Ai ye sila di n ma sa n di n kəseyi n tii wara.» ⁵⁵ Rebeka

kɔrɔcɛ ni a na ka jibili kɛ ko: «A to sunkurun ye tele tan jɔɔn kɛ an fɛ yan fɔlɔ. Wo ba tamin, a ri wa.» ⁵⁶ Cɛ kan ko: «Ai jaandi, ai kana n nanɔɔ butun, baa Allabatala a ra n na sila diya n na. Ai ye a to n ye kɔseyi n tii wara jona.» ⁵⁷ Alu ka a jabi: «Nba, an ye sunkurun kili ka a majininka.» ⁵⁸ Alu ka Rebeka kili ka a majininka ko: «I ri taa cɛ jin kɔfɛ sisén wa?» A kan ko: «N di wa.»

⁵⁹ Wo rɔ, alu ka alu badenma muso Rebeka bila ka wa Iburahima dəmənba ni a taamajɔɔnilu kɔfɛ. Jɔnmuso mən ka a mamira, wo wara Rebeka malɔ. ⁶⁰ Alu watɔla, Rebeka wara mɔɔilu duwara a yɛ. Alu kan ko: «An badenma muso, Alla ye i bɔnsɔn siyaya ka a kɛ mɔɔ waa siyaman siyaman di, Alla ma wo kera. Alla ye alu se alu juuili la, Alla ma wo kera.» ⁶¹ Rebeka ni a la jɔnmusoilu ka alu raben ka yele jɔɔmeli kan, ka alu bila Iburahima dəmənba kɔfɛ. A wara Rebeka ri wo ja le ma.

⁶² Wo ka a təren, Isiyaka ra bɔ Béri Lasayi Rɔyi fan fɛ, Nekəbi mara rɔ. ⁶³ Lon do rɔ, Isiyaka wara a mataamala diya wula kɔndɔ wura da fɛ. A ka a ja lɔ ka jɔɔmeli natɔla yen. ⁶⁴ Rebeka ka a ja lɔ ka Isiyaka yen tuma mən na, a jiira ka bɔ a la jɔɔmɛ kan. ⁶⁵ A ka Iburahima dəmənba majininka ko: «Mən bɔtɔ wula rɔ ka na an kunben jin, yon de wo ri?» Cɛ kan ko: «N tii le wo ri.» Wo rɔ, Rebeka ka a la kunnabirin kɛ a kun na.

⁶⁶ Nba, cɛ tun ka fen fen kɛ a la taama rɔ, a ka wo bɛɛ jafɔ Isiyaka yɛ. ⁶⁷ Isiyaka wara Rebeka ri a na Saran na faaninbon na, ka a furu ka a kɛ a muso ri. Isiyaka ka Rebeka kanin kosebɛ, a diyara a yɛ. Wo rɔ, Isiyaka jusu sumara a na la saya ko rɔ.

25

Iburahima la saya

¹ Nba, Iburahima ka muso gberε furu, men tɔɔ ko Ketura. ² Wo ka denceilu sɔrɔn Iburahima yε: Simiran, Jokisan, Medan, Madiyan, Sisibaki a ni Suwahi. ³ Iburahima dencε Jokisan fanan ka dencε fila sɔrɔn: Seba ni Dedan. Dedan denceilu kεra Asirikailu ni Letusikailu ni Lemikailu le ri. ⁴ Iburahima dencε Madiyan denceilu le ten: Efa, Efεri, Henɔki, Abida a ni Elida. Wo bεε ye Ketura bɔnsɔn de ri.

⁵ Iburahima ka a cεε bεε di Isiyaka le ma, ⁶ kɔni a ka a muso tɔilu denceilu fanan sɔ fen doilu rɔ. Sani a ye sa, Iburahima ka woilu lawa telebɔ jamana rɔ, ka alu mabɔ a dencε Isiyaka la.

⁷ Iburahima si san bεε ladenni kεra san kεmε ni san biwɔrɔnwula ni san loolu le ri. ⁸ A ka a la kɔrɔya diya bɔ kosεbε ka sa ka la a benbailu kan. ⁹ A dencε fila, menilu ye Isiyaka ni Isumayila ri, woilu ka a suu don Makipela falan na, Mamere fan fe. Dinkira wo tεre ye Hetika Sokari dencε Efurɔn bolo kεrɔman na, ¹⁰ kɔni Iburahima ka wo le san a ma. A ni a muso Saran suu donda ye.

¹¹ Iburahima sani kɔ rɔ, Alla ka baraka don a dencε Isiyaka la kɔ rɔ. Isiyaka siini tεre Beri Lasayi Rɔyi le la.

Isumayila bɔnsɔn

¹² Nba, Iburahima dencε Isumayila bɔnsɔn de jin di, Saran na jɔnmuso Misiranka Hajara a ka men sɔrɔn Iburahima yε. ¹³ Isumayila denceilu tɔɔ le jin di, ka bεn alu sɔrɔn waati ma. A dencε fɔlɔ tɔɔ ko Nebayɔti, ka Kedari tuun wo la, ka Adibεli tuun wo la, ka Mibisamu tuun wo la, ¹⁴ ka Misima tuun

wo la, ka Duma tuun wo la, ka Masa tuun wo la,
¹⁵ ka Hadadi tuun wo la, ka Tema tuun wo la, ka
 Seturi tuun wo la, ka Nafisi tuun wo la, ka Kedima
 tuun wo la.

¹⁶ Isumayila denceilu le wo ri, menilu kera
 faama tan ni fila le ri, ka alu sii kabilia tan ni fila
 kun na, bεε ni alu la so. ¹⁷ Isumayila ka san kemε
 ni san bisawa ni san wərənwula le sərən, ka sa ka
 la a benbailu kan. ¹⁸ A bənsən siini tere Asiri so sila
 la, Misiran telebə fan fe, Habila ni Suri soilu təma.
 Alu ni alu badenma tere ma i sii i jnəən fe.

¹⁹ Nba, Iburahima dence Isiyaka bənsən de jin
 di. Iburahima ka Isiyaka sərən. ²⁰ Isiyaka sərən ka
 san binaanin bə tuma men na, a ka Rebeka furu.
 Rebeka fa le tere Betuweli ri. Betuweli ye Aramu
 bənsən do le ri ka bə Padani Aramu. Rebeka
 kərəcə le tere Aramu bənsən Laban di. ²¹ Isiyaka
 ka Allabatala matara a muso ye ka a masərən a
 tere densərənbali le ri. Allabatala ka a la tarali kan
 mira, Rebeka ka filani kənə ta. ²² Ka a terən alu ma
 sərən fələ, denilu bilara i jnəən na alu na kənə rə.
 Rebeka kan ko: «Nfenna jin ye kəla n na?» A wara
 Allabatala majininka ko wo ma. ²³ Allabatala ka a
 jabi:

«Jamana fila le ye i kənə.

Jamana fila ri bə i kənə rə.

Kelen fanka ri bonya kelen ta ri.

Kərəmaməə ri ke doomaməə la baaraden de ri.»

²⁴ Nba, Rebeka moyi lon seni, a moyira filani le
 la. ²⁵ Men fələma sərənda, wo wulenni de tere, si le
 tere ye a fari ma. Wo rə alu ka wo təə la ko Esawu.
²⁶ Wo kə rə, a dooce nara, a kərəcə sen tintiri mirani
 a bolo. Alu ka wo təə la ko Yakuba. Rebeka ka alu
 sərən ka a terən Isiyaka sərən da san biwəərə bə.

27 Denilu bonyara ka ke kanberen di. Esawu kera donso fadiman di, waa ro taama diyara a ye. Koni, Yakuba kera mo masumanin di, a tun te a mabola faaninbon na kosebe. **28** Esawu duman ter Isiyaka ye, ka a masoron a tere ye sobo soronna Esawu le sababu le ro. Yakuba duman ter Rebeka ye.

29 Lon do ro, Yakuba ter ye sooso tibila. Esawu konkoto ba nara ka bo wula kondjo. **30** A ka a fo Yakuba ye ko: «Kenk ba le n na jin. I jaandi, i ye n so i la sooso wulen do. N ye a damun.» Nba, kuma wo kera sababu ri, moosilu ka a fo Esawu ma ko Edemu*.

31 Yakuba ka a jabi: «Ni i ka i la kormamoya di n ma folo, n di i so.» **32** Esawu kan ko: «Kenk ket n faala. Kormamoya ye nfen jala n ma?» **33** Yakuba ka a jabi: «I kali Alla la folo.» Esawu ka a kali a ye, ka a la kormamoya falen Yakuba ma wo jna le ma. **34** Wo ro Yakuba ka a so sooso ni buru ro. Esawu ka a damun ka ji min ka a wuli ka wa.

Nba, a kera ten de. Esawu ma a la kormamoya jate foyi ri.

26

Isiyaka wara Filisitilu la jamana ro

1 Nba, wo be taminni ko ro, konk donta jamana kondjo. Koni konk men donta Iburahima la waati ro, wo ni jin te kelen di. Isiyaka wara Filisitilu la mansa Abimelki wara, Kerari so la. **2** Allabatala bora gbe ro Isiyaka ye, ka a fo a ye ko: «I kana wa Misiran! N ket jamana men yirakala i la, i ye wa i sii ye. **3** I ye men jamana wo ro folo. N di to i fe,

* **25:30** Edemu koro ye le ko wuleman

ka baraka don i la ko rɔ, ka yɔrɔ jin bεε di i ni i bɔnsɔn ma. Wo rɔ n di n na lahidi mafa, n ka men ta i fa Iburahima yε. ⁴ Ko lolo ka siya ja men ma, n di i bɔnsɔn siyaya wo ja ma, ka duu jin bεε di alu ma. Siyailu bεε ri baraka sɔrɔn n bolo i bɔnsɔn na sababu rɔ. ⁵ N di baraka don i la ko rɔ, ka a masɔrɔn Iburahima ka n kan mira ka a kε. N ka men fɔ a yε, a ka wo bεε kε. A ka n na jamarili ni n na sariya bεε latelen.» ⁶ Wo rɔ, Isiyaka ka a sii Kerari ye.

⁷ Ye cεilu tun ba Isiyaka majininka a muso la ko ma, a ri a fɔ ko a doomuso le. A silanni tere a fola alu yε ko a muso le, sa alu kana a faa ka Rebeka ta, baa Rebeka kεjni ba le tere.

⁸ Nba, Isiyaka menda Kerari. Lon do rɔ, Filisiti la mansa Abimeleki ka a ja labɔ a la bon na ka Isiyaka ni a muso Rebeka yen. Alu ye tolon kela i jɔɔn fe. ⁹ Abimeleki ka Isiyaka kili ka a fɔ a yε ko: «I muso le jin di jɔ! Nfenna i ka a fɔ an yε ko i doomuso le?» Isiyaka ka a jabi: «N ka a fɔ ka a masɔrɔn a tere n kɔndɔ ko ai ri n faa ka a ta.» ¹⁰ Abimeleki kan ko: «I ka nfen ko kε an na jin de ten? Ni n na jamana mɔɔ do tun ka a la i muso fe wo rɔ don? Ni wo tun kera, i tun di an lɔ ko haramunnin kela ri!»

¹¹ Abimeleki ka a jasere mala a la mɔɔ bεε yε ko: «Mɔɔ men ba a maa Isiyaka la, wala a muso la, n di wo tii faa.»

¹² Nba, wo san kelen Isiyaka ka suman sεnε jamana wo rɔ. A la suman sɔnda kosebe, a ka suman si men foyi, a ka wo jɔɔn kεmε sɔrɔn, baa Allabatala ka baraka don a la suman dɔ. ¹³ Isiyaka bolofen siyayara, foo ka a kε nanfulutii ba ri. ¹⁴ Saa ni ba ni nisi ni jɔnilu tere a bolo. Wo rɔ, a

la ko jangboya ka Filisitilu sərən. ¹⁵ Wo bolo ma, alu ka bəə ke a la kələn bəə kəndə fo ka alu ja. A fa Iburahima la jənilu le tun ka kələn woilu sen a la tele rə.

¹⁶ Abimeləki ka Isiyaka kili ka a fə a ye ko: «I ye bə an wara yan. I fanka ka bon an ta ri.»

Filisitilu ka Isiyaka kəle a la kələnilu fə

¹⁷ Wo rə, Isiyaka bəra ye ka wa a la faaninbon lə Kerari kənegbe rə, ka a sii dinkira wo rə. ¹⁸ A fa Iburahima tun ka kələn menilu sen dinkira wo rə a tele rə, Filisitilu nara ka woilu bəə lafa a la saya kə rə. Isiyaka ka kələn wo bəə rabə ko kura. A fa tun ka təə men la kələnilu la, Isiyaka ka təə kelen kelenna kələnilu la alu la.

¹⁹ Lon do rə, Isiyaka la jənilu ka kələn do sen kənegbe rə ka se ji ma. ²⁰ Kerari kolofen kənəmadenilu nara ka Isiyaka la kolofen kənəmadenilu kəle, ka a fə ko: «Kələn jin ye an ta le ri.» Isiyaka ka kələn wo təə la ko Eseki, ka a masərən alu kelera a fe. ²¹ Isiyaka la jənilu ka a kələn dəgbərə sen. Kəni Kerarikailu nara ka alu kəle wo fanan fe. Isiyaka ka wo təə la ko Sitina. ²² A ka yərə wo bila ka wa yərə gberə, ka kələn gberə sen ye iko. Məə si ma alu keləla wo fe. Wo rə, Isiyaka ka wo təə la ko Rehoboti. A kan ko: «Sisen Allabatala da dinkira di an ma. An di sabati jamana jin kəndə.»

²³ Isiyaka bəra ye ka wa Bəri Seba. ²⁴ Su wo rə, Allabatala bəra gbe rə a ye, ka a fə a ye ko: «Nde ye i fa Iburahima Maari Alla le ri. I kana silan, baa n ye i fe. N di jumaya ke i ye ka i bənsən siyaya n na baaraden Iburahima la ko kosən.»

²⁵ Isiyaka ka Alla saraka bɔ diya lɔ ye Allabatala bato kanma. A ka a la faaninbon lɔ dinkira wo rɔ. A la jɔnilu ka kɔlɔn gbere sen.

Abimeleki ni Isiyaka ka lahidi sidi

²⁶ Lon do rɔ, mansa Abimeleki ni a lalila Ahusati ni a la kεleden kuntii Pikɔli bɔra Kerari ka na Isiyaka wara. ²⁷ Isiyaka ka alu majininka ko: «Waati taminni, ai ka n tɔrɔ ka n gbɛn ka n nabɔ ai la jamana rɔ. Nfenna ai nani n wara yan sisen?»

²⁸ Alu ka a jabi: «An da a yen ko Allabatala ye i fε. An ye teriya sidi an jɔɔn tɛma, ka bɛn kan kelen ma. ²⁹ Ikomin an ma kojuu kε i la, i fanan tɛ kojuu kε an na. An ka kojuma le kε i yε. I bɔra an tɔrɔfɛ here le rɔ. An da a yen sisen ko Allabatala ra baraka don i la ko rɔ.» ³⁰ Isiyaka ka tibili ba kε alu yε. Alu ka damunun kε ka alu min.

³¹ Wo duusa gbe jona, alu ka alu kali i jɔɔn yε ko alu tɛ kojuu kε i jɔɔn na. Wo banni, Isiyaka ka sila di alu ma. Alu bɔra here le rɔ ka wa.

³² Nba, wo lon kelen, Isiyaka la jɔnilu bɔra kɔlɔn sen diya ka na a fɔ a yε ko: «An da kɔlɔn sen ka se ji ma.» ³³ Isiyaka ka kɔlɔn wo tɔɔ la ko Seba. Wo le ka a kε, so wo tɔɔ lara ko Beeri Seba haan bi.

Esawu musoilu

³⁴ Nba, Esawu sɔrɔn ka san binaanin bɔ tuma men na, a ka Hetiika sunkurun fila furu. Kelen tɔɔ ko Yuditi. Wo fa tere Beeri le ri. A tɔ kelen tɔɔ ko Basimati. Wo fa tere Elɔn de ri. ³⁵ Muso woilu la ko ka Isiyaka ni Rebeka jusu tɔrɔ kosebe.

¹ Nba, Isiyaka kɔrɔra kosebε. A ja tere te fen na sa la wula rɔ. Lon do rɔ, a ka a dence fɔlɔ Esawu kili ko: «N dence.» Esawu ka a jabi: «Naamun.» ² Isiyaka kan ko: «A ragbε, n da kɔrɔ. N ma n sa waati lɔn. ³ I ye i la donsoya muran ta, i la bijɛkala ni i la bijɛ, ka wa sobo jinjin wula kɔndɔ. I ye na sobo di n ma. ⁴ Suman mɛn duman n yε, i ye wo tibi ka a sii n kɔrɔ. N di wo damun ka duwa i yε sani n ye sa waati mɛn dɔ.»

⁵ Jaa, Isiyaka ka mɛn fɔ a dence Esawu yε, Rebeka tolo tere ye wo bɛε la. Esawu bɔra ka wa sobo jinjin diya wula kɔndɔ tuma mɛn na, ⁶ Rebeka ka a fɔ a dence Yakuba yε ko: «N da i fa kumakan mɛn. A ra a fɔ i kɔrɔce Esawu yε ko: ⁷ i ye na sobo ri. Ko suman mɛn duman n yε, ko i ye wo tibi ka a sii n kɔrɔ. Ko n di wo damun ka duwa i yε Allabatala jana sani n ye sa waati mɛn dɔ.» ⁸ Rebeka kan ko: «Nba, n dence, i tolo malɔ. N ye mɛn fɔla i yε, i ye wo kε. ⁹ Wa badennin numa fila mira ba kuru rɔ ka na alu ri. Suman mɛn duman i fa yε, n di wo tibi. ¹⁰ N ba ban wo tibila, i ri wa a di i fa ma. A ri wo damun ka duwa i yε sani a ye sa waati mɛn dɔ.»

¹¹ Yakuba ka a na jabi: «Kɔni i ka a lɔn ko n kɔrɔce Esawu fari fan bɛε ye si le ri. Si don te nde ma. ¹² Ni n fa ka a maa n na don? Ni wo kera, a ri n jate janfate ri. N te duwa si sɔrɔn, fo danka.» ¹³ A na kan ko: «N dence, Alla ye a kε danka wo kana i mira fo nde. N ka mɛn fɔ, i ye wo kε dɔrɔn. Wa bailu mira ka na alu ri.»

¹⁴ Yakuba wara ba fila mira ka na alu di a na ma. A na ka a fa diyanan tibili kε. ¹⁵ Esawu la faanin numa tere ye a na bolo bon na. Rebeka ka faanin wo ta ka wo don a dence doomani Yakuba bolo. A

ka a bila a ma. ¹⁶ Rebeka ka ba gbolo ta ka Yakuba bolokailu masidi. A ka a kan fanan masidi, si tun tε a fan mεnilu ma. ¹⁷ A ka suman tibini wo don Yakuba bolo, ka buru la a kan, a tun ka mεn gbasi.

¹⁸ Yakuba wara wo ri a fa wara, ka a fa kili ko: «N fa.» Isiyaka kan ko: «Naamun. N dencε juman de kan?» ¹⁹ Yakuba ka a fa jabi: «I dencε fεlø Esawu le kan. I ka mεn fε n yε, n da wo kε. I wuli ka i sii ka n na sobo damun, sa i ri duwa n yε.» ²⁰ Isiyaka ka a fε a dencε yε ko: «εε, n dencε! I ra kaliya. I ka sobo sɔrɔn jona di?» Yakuba kan ko: «Allabatala, i Maari Alla, wo le ka n harijee fulen.» ²¹ Isiyaka kan ko: «N dencε, i madon n na yan. N ye n bolo maa i la ka a lɔn ni Esawu le ile ri.» ²² Yakuba ka a madon a fa la. A fa ka a maa a la ka a fε ko: «I kan bɔni Yakuba kan na, kɔni i boloilu ye Esawu boloilu le ri.» ²³ Isiyaka filira Yakuba ma, ka a masɔrɔn si tεrε ye a boloilu ma iko Esawu boloilu tεrε ye ja mεn ma, wo bolo ma a duwara a yε.

²⁴ Isiyaka ka Yakuba majininka ko: «Tuja le wa, ko n dencε Esawu le ile ri?» Yakuba ka a jabi «Nde le.» ²⁵ Isiyaka kan ko: «Suman di n ma. N di i la sobo damun ka duwa i yε.» Yakuba ka suman sii a kɔrɔ. A ka damunun kε. Yakuba nara resenji fanan di. A ka wo min. ²⁶ Isiyaka banda damununna ka a fε a yε ko: «N den, i madon n na ka n sunbu.» ²⁷ Yakuba ka a madon a la ka a sunbu. Isiyaka ka a la faanin suma mεn tuma mεn na, a ka a duwa a yε ko: «N dencε suma ye ikomin sεnε suma duman ja mεn ma, Allabatala ka baraka don sεnε mεn dɔ.

²⁸ N dencε, Alla ma i la sεnεkε duu jnumaya ka sanci numa lana a kan,
Alla ma wo kεra.

Ka i la suman ni i la r_εs_εnji siyaya kos_εb_ε,
 Alla ma wo kera.
 29 Ka m_εo ilu bila i la fanka k_εr_ε,
 Alla ma wo kera.
 Ka siyailu lana ka alu majii i k_εr_ε,
 Alla ma wo kera.
 Ka i lasii i badenmailu kun na,
 Alla ma wo kera.
 Ka i na la den b_εe lana ka alu majii i k_εr_ε,
 Alla ma wo kera.
 M_εo m_εn ba i danka,
 Alla ma t_εr_εya lara wo kan.
 M_εo m_εn ba duwa i y_ε,
 Alla ma n_εumaya kera wo y_ε.»

Esawu kan ko Isiyaka ye duwa a fanan y_ε

30 Nba, Isiyaka banni duwala Yakuba y_ε, Yakuba b_εra a fa t_εr_εfe. A ma m_εn bak_ε wo k_ε r_ε, a k_εr_εc_ε Esawu nara ka b_ε donsoya diya wula k_εndo. 31 A ka suman duman tibi, ka wa a di a fa ma. A ka a f_εa fa y_ε ko: «N fa, i ye i wuli. I ye i dence la sobo damun, ka duwa n y_ε.» 32 A fa kan ko: «Yon de kan?» A ka a jabi: «Nde le kan, i dence f_εl_ε Esawu.» 33 Isiyaka y_εr_εy_εr_εra kojuuya. A kan ko: «Yon wara sobo faa ka wo tibi ka na a sii n k_εr_ε? N ka wo damun ka duwa a tii y_ε sani i ye na. N da duwa a y_ε, n ti se wo y_εle m_εanna butun.»

34 Nba, Esawu ka a fa la kuma wo m_εn tuma m_εn na, a jusu kasira. A kulera kojuuya ka a f_εa fa y_ε ko: «N fa, i ye duwa n fanan y_ε!» 35 Isiyaka ka a jabi: «I dooce le nara janfa r_ε ka i la duwawu s_εr_εn.»

³⁶ Esawu kan ko: «Men ka a too la ko Yakuba*, jo ye wo fe, baa a ra janfa don n ma sija fila. A too benni a ma fewu! A ka n na kɔrɔmamɔɔya mira n na ka wo ke a ta ri. A ra n na duwawu fanan ta. N fa, i ma duwa si bila n ye wa?» ³⁷ Isiyaka ka a jabi: «A ragbe! N da a lasii i kun na, ka a badenma to bεε ke a la baaraden di. N da suman ni resenji siyaman baraka don a la ko rɔ. N dence, n ye nfen ke i ye?» ³⁸ Esawu ka a fa madiya ikɔ tuun ko: «N fa, duwa kelen pe wo le tereñ i bolo wa? I ye duwa n fanan ye.» Esawu kulera ka woyo ka kasi kosebe. ³⁹ A fa ka a fɔ a ye ko: «Duu numa ye yɔrɔ men dɔ, sanci numa ye na la a kan, i ri janyan wo la. ⁴⁰ I ri i balo sɔrɔn i la fanmuru le la. I ri ke i dooce la baaraden de ri, kɔni i ba murunti tuma men na, i ri i jerε bo a la fanka kɔrɔ.»

Yakuba ka i bori ka wa a barince wara

⁴¹ Nba, Isiyaka ka duwawu men ke Yakuba ye, wo kera sababu ri, Yakuba gboyara Esawu ye. Esawu ka a miri ko: «N fa la sa waati a ra sudunya. Ni a sara, an ba ban a suu don na, n di n dooce Yakuba faa.»

⁴² Esawu miri tereñ ye men di, wo fɔra Rebeka ye. Wo rɔ, a ka a dence Yakuba kili ka a fɔ a ye ko: «I tolo malɔ. A loo ye i kɔrɔce Esawu la ka i faa ka a la mɔne bo i rɔ. ⁴³ N den, i ye n kan mira ka a ke. I bori sisen ka wa n kɔrɔce Laban wara Haran. ⁴⁴ I ye men a wara ye dooni, foo i kɔrɔce jusu ye ban sumala. ⁴⁵ I kɔrɔce la diminya ba mala, i ka men ke a la, a ri jina wo kɔ rɔ. Wo ba ke, n di kela di i ma

* **27:36** Yakuba kɔrɔ ye le ko sen tintiri a fɔna gbere ye ko janfate

ko i ye na. Ni wo tε n kana bənə ai fila bεε la ko rɔ lon kelen dɔ.»

⁴⁶ Nba Rebeka ka a fɔ Isiyaka yε ko: «N kɔrɔ, Esawu ka Hεtika sunkurun mənilu furu jin, woilu ra n sεe kojuuya, foo ka dunuja loo bɔ n na. Ni Yakuba fanan ka Hεtika sunkurun do ta, mən ye woilu jɔɔn di, wo ri n tɔrɔ wo ja jere jere ma. Saya ka fisa wo ri paaɔn!»

28

¹ Wo rɔ, Isiyaka ka Yakuba kili ka duwa a yε, ka a fɔ a yε ko: «I kana muso ta Kanaan bənsən denmusoilu rɔ de! ² Wa i benba Betuweli wara Padami Aramu, ka i barince Laban denmuso do furu. ³ Alla Seebætii ye baraka don i la ko rɔ ka i jiri ka i bənsən siyaya. Alla ye jama siyaman bɔ i rɔ. ⁴ Alla ka baraka mən kε i benba Iburahima la ko rɔ, a ye baraka wo jɔɔn kε i ni i bənsən na ko rɔ, kosa jamana jin di kε i ta ri, i yɔrɔ mən dɔ jin di i ye ləndan de ri haan bi, baa Alla ka jamana jin di Iburahima le ma.»

⁵ Isiyaka ka Yakuba lawa Padani Aramu, ko a ye wa Laban wara, mən ye Aramu bənsən Betuweli dence ri. Laban de Yakuba ni Esawu na Rebeka kɔrɔce ri.

Esawu ka muso gberεfuru

⁶ Nba, Esawu ka a yen ko Isiyaka ra duwa Yakuba yε ka a lawa Padani Aramu, ko a ye muso do ta ye. A ka a yen fanan ko a fa ra duwa Yakuba yε tuma mən na, a ka a fɔ a yε ko a kana muso ta Kanaan bənsən denmusoilu rɔ de! ⁷ Esawu ka a yen fanan ko Yakuba ka a fa ni a na kan mira ka wa Padani Aramu. ⁸ Esawu ka a lən wo le rɔ ko Kanaan bənsən sunkurun ma di a fa Isiyaka yε.

⁹ Wo rɔ, a wara Isumayila wara, mɛn ye Iburaḥima dencɛ ri. A ka wo denmuso do furu ka a la a musoilu kan. Sunkurun wo tɔɔ le ko Mahalati. A kɔrɔcɛ tɔɔ ko Nebayɔti.

Yakuba sibora

¹⁰ Nba, Yakuba bɔra Beri Seba ka wa Haran. ¹¹ A ye sila kan tuma mɛn na, a sera dinkira do rɔ ka si ye, baa su tun da ko a ma. A ka a la, ka kabakurun do ta ka a don a kun kɔrɔ a sunɔɔra. ¹² Ka a tɔ sunɔɔ rɔ a ka sankale do yen sibo rɔ. Wo lɔni duu ma, a kun seni foo bandakolo ma. Alla la melekailu ye jii ni yelela sankale wo ma. ¹³ Allabatala jere kan ko: «Nde le Allabatala ri, i benba Iburaḥima ni i fa Isiyaka Maari Alla. I lani duu mɛn kan jin de, n di wo di i ni i bɔnsɔn ma. ¹⁴ I bɔnsɔn di siyaya iko duukolo kijɛ, ka jenseñ ka wa telebɔ ni telebe rɔ, ka wa tele kankan bolo maran ni tele kankan bolo kinin dɔ. I ni i bɔnsɔn di ke sababu ri, siyailu bɛɛ di baraka sɔrɔn n bolo. ¹⁵ I tolo malɔ. N ye i fɛ tuma bɛɛ rɔ. I wa kɛ wa la yɔrɔ yɔrɔ rɔ, n di i latanka kojuu ma. N di i kɔseyi ka i lana jamana jin dɔ iko. N tɛ bɔ i fɛ haan n da n lahidi mafa, mɛn n da ta i yɛ.»

¹⁶ Yakuba kunura sunɔɔ rɔ tuma mɛn na, a ka a fɔ ko: «Allabatala ye dinkira jin dɔ yan. N tun ma a lɔn.» ¹⁷ Yakuba silanda. A kan ko: «Dinkira masilannin de jin di de! Dinkira jin te foyi di fo Alla la bon! Sankolo don dinkira ri tɛrɛ yan.»

¹⁸ Yakuba wulira sɔɔma da la jona. A tun ka kabakurun mɛn don a kun kɔrɔ, a ka wo ta ka a lalɔ ka a ke tɔɔmasere ri ka tulu kɛ a kan. ¹⁹ A ka dinkira wo tɔɔ la ko Beteli. A tɔɔ fɔlɔ le tɛrɛ ko Lusi.

²⁰ Yakuba ka dakan ta Alla ye ko: «Ni Alla tora n fɛ ka n natanka n na taama jin dɔ, ka suman ni firiyabɔ di n ma, ²¹ sa n di n kɔseyi hɛrɛ rɔ ka na

n fa so la, ni i ka wo b $\varepsilon\epsilon$ k ε ten, Allabatala ri k ε n Maari Alla ri. ²² N da kabakurun m $\varepsilon\en$ nalo ka a k ε t ε omasere ri yan, wo ri k ε Alla la bon di. I wa fen fen di n ma, n di wo ja di i ma.»

29

Yakuba sera a barince Laban wara

¹ Yakuba ka sila mira ka wa teleb \circ jamana r \circ . ² A seni y \circ r \circ do r \circ , a ka k \circ l \circ n do yen wula r \circ . Saa kuru sawa lani t ε re k \circ l \circ n da la. Wo ye laminna k \circ l \circ n wo le r \circ . K \circ l \circ n wo da tuunni kabakurun m $\varepsilon\en$ na, wo ka bon t ε re koseb ε .

³ Kolofen k \circ n \circ madenilu alu wa alu la saa b $\varepsilon\epsilon$ lad ε n tuma m $\varepsilon\en$ na, alu ri kabakurun makurukuru ka a lab \circ k \circ l \circ n da la, ka saa ie lamin. Saa wa ban alu minna tuma m $\varepsilon\en$ na, alu ri kabakurun makurukuru ka k \circ l \circ n da latunun a la iko.

⁴ Yakuba ka kolofen k \circ n \circ madenilu majininka ko: «N badenmailu, ai b \circ ni mi?» Alu ka a jabi: «An b \circ ni Haran de.» ⁵ Yakuba kan ko: «Ai ka Laban l \circ n wa, Nak \circ ri mamaren?» Alu ka a jabi: «An ka a l \circ n.» ⁶ Yakuba ka alu majininka ko: «Tana t ε a la ye?» Alu kan ko: «Tana si t ε a la ye. I ma a denmuso Raseli yen? A nat ε la a la saailu ri.»

⁷ Yakuba kan ko: «Ai ja l \circ . Tele ka jan f \circ l \circ , saailu lad ε n waati ma se f \circ l \circ . Ai ye saailu lamin ka wa alu ri bin damun diya.» ⁸ Kolofen k \circ n \circ madenilu ka a jabi: «An ti se wo k ε la, foo saa b $\varepsilon\epsilon$ wa ban nala f \circ l \circ . Alu wa na, an di kabakurun makurukuru ka a b \circ k \circ l \circ n da la ka saailu lamin.»

⁹ Yakuba ye kumala kolofen k \circ n \circ madenilu f ε tuma m $\varepsilon\en$ na, Raseli nara a fa la saailu ri. Ale le t ε re ie k \circ n \circ maden de.

¹⁰ Yakuba ka a barince Laban denmuso Raseli ni a la saailu yen tuma mën na, a wara kabakurun makurukuru ka a bɔ kələn da la, ka a barince la saailu lamin. ¹¹ Yakuba ka Raseli sunbu ka sewa kosebe fo ka kasi. ¹² A ka a fɔ Raseli yε ko, a ye a fa doomuso Rebeka den de ri. Raseli borimantɔ wara wo fɔ a fa yε. ¹³ Laban ka a doomuso dence Yakuba la ko mën tuma mën na, a ka a bori ka wa a kɔfε. A seni a tɔrɔfε, a ka a bolo mininminin a kan ma ka a sunbu, ka wa a ri lu ma. Yakuba ka danteeli kε Laban yε. ¹⁴ Laban ka kuma wo mën tuma mën na, a ka a jabi: «An bεε ye buruju kelen de ri ja!» Yakuba ka karo kelen kε Laban tɔrɔfε.

¹⁵ Lon do rɔ, Laban ka a fɔ Yakuba yε ko: «N badenma le i ri fewu, kɔni wo bεε ni a ta, i ma kan ka baara kε n yε ni n ma i sara. I sara ka kan ka kε mën di, i ye wo fɔ n yε.»

¹⁶ Wo ka a təren, denmuso fila ye Laban bolo. Kɔrɔmamao tɔɔ ko Leya. A doomuso tɔɔ ko Raseli.

¹⁷ Leya jakise tere ye kεni, kɔni Raseli kεni ja bεε ma. ¹⁸ Raseli diyara Yakuba yε kosebe. Wo rɔ, a ka Laban jabi: «N di san wɔrɔnwula kε baara la i yε yan, kosa i ri i denmuso filana Raseli di n ma.»

¹⁹ Laban kan ko: «N wa a di ile ma, wo ka fisa a dini ri mɔɔ gberε ma. To n tɔrɔfε yan.»

²⁰ Wo rɔ, Yakuba ka san wɔrɔnwula kε baara la Raseli sɔrɔn kanma, kɔni Raseli ladiyajε kosɔn san wɔrɔnwula wo kera a jana iko tele dandɔ

²¹ San wɔrɔnwula dafanin, Yakuba ka a fɔ Laban yε ko: «N muso di n ma sisen. Waati mën fɔni, wo ra dafa. N ye a fε an ye dεn.»

²² Nba, Laban ka a siijɔɔn bεε kili ka tibili ba kε, ²³ kɔni su wo rɔ, a ka a denmuso Leya ta ka wa a di Yakuba ma. Yakuba ni Leya dεnda. ²⁴ Laban

ka a la jønmuso do di Leya ma ka a kε a la jøn di. Jønmuso wo tøo ko Silipa. ²⁵ Duu sa gbøni, Yakuba ka Leya le yen ye! A wara a fø Laban yε ko: «I nø nfen de kela n na jøn ten? N ka baara ke i yε Raseli le sørøn ko rø. Nfenna i ra n janfa?» ²⁶ Laban ka a jabi: «Ka doomamø furu kørømuso jø, wo te kela an wara yan. ²⁷ I sabari ka lookun jøn dafa Leya la kønø bon na. Wo wa tamin, n di Raseli fanan di i ma. Wo rø, i ri san wørønwula gberø ke n yε.»

²⁸ Yakuba sønda wo ma. A ka lookun wo dafa Leya fe. Wo taminni, Laban ka a denmuso Raseli fanan di a ma. ²⁹ Laban ka a la jønmuso Bilaha di Raseli ma ka a kε a la jønmuso ri. ³⁰ Yakuba ni Raseli dønda. Raseli diyara a yε ka tamin Leya kan. Yakuba ka san wørønwula ke baarala Laban yε ikø tuunni.

³¹ Allabatala ka a yen ko Leya ma duman Yakuba yε kosebe, tuma mën na, a ka den sørøn nøøya Leya yε, køni Raseli tøre ye densørønbali le ri.

³² Leya ka kønø ta ka dencø sørøn. A kan ko: «Allabatala ra n na tørøya yen. N di diya n cø yε sisøn.» Wo le rø, a ka den tøo la ko Rubøn*. ³³ A ka kønø ta ikø tuunni ka dencø sørøn. A kan ko: «Allabatala ra a men ko n ma duman n cø yε. Wo rø, a ra den jøn fanan di n ma.» Wo le rø, a ka den wo tøo la ko Simeyøn†.

³⁴ Leya ka kønø ta ikø tuunni ka dencø sørøn. A kan ko: «Sisøn køni, n cø ri i fasa n ma, ka a masørøn

* ^{29:32} Rubøn kørø ye le ko «i ja lø, dencø le» † ^{29:33} Simeyøn kørø ye le ko Alla ye n kan mønna

n da dence sawa sørən a yε.» Wo le rɔ, a ka den wo tɔɔ la ko Lebi†.

³⁵ A ka kɔnɔ ta ikɔ tuunni ka dence sørən. A kan ko: «Sisen, n di Allabatala tando.» Wo le rɔ, a ka den wo tɔɔ la ko Yahuda§. Wo kɔ, a ka den sørən madooya.

30

Yakuba den tɔilu

¹ Nba, Raseli ka a yen tuma mɛn na ko a ma den sørən Yakuba yε, a kɔrɔmuso la keleya ka a mira. A ka a fɔ Yakuba yε ko: «I ye den di n fanan ma. Ni wo tε n di faa.» ² Yakuba jusu bɔra. A ka a fɔ a yε ko: «N ye Alla le jɔɔn jala wo rɔ wa? Ale le ma i lakanya den sørənna wa?» ³ Raseli kan ko: «Nba, n na jɔnmuso Bilaha ta, i ye si a fε, sa a ri den sørən n yε, sa n fanan di kε denbatii ri.»

⁴ Wo rɔ, Raseli ka a la jɔnmuso Bilaha di Yakuba ma, ka a kε a muso ri. Yakuba ni wo sira. ⁵ Bilaha ka kɔnɔ ta Yakuba la, ka dence sørən a yε. ⁶ Raseli kan ko: «Alla ra jo di n ma. N ka mɛn fɔ, a ra wo mɛn ka n sɔ dence la.» Wo le rɔ, Raseli ka den wo tɔɔ la ko Daan*.

⁷ Raseli la jɔnmuso Bilaha ka kɔnɔ ta Yakuba la ikɔ, ka a dence filanan sørən a yε. ⁸ Raseli kan ko: «Nde ni n kɔrɔmuso bilani tere an jɔɔn na kojuuya. Sisen, n kɔnin da se a la.» Wo le rɔ, a ka den wo tɔɔ la Nefitali†.

⁹ Nba, Leya ka a yen tuma mɛn na ko a tε kɔnɔ ta la butun, a ka a la jɔnmuso Silipa ta ka a di Yakuba

† **29:34** Lebi kɔrɔ ye le ko masidi § **29:35** Yahuda kɔrɔ ye le ko

bato * **30:6** Daan kɔrɔ ye le ko n da jo sørən † **30:8** Nefitali kɔrɔ ye le ko n da sɛdon

ma ka a ke a muso ri. ¹⁰ Silipa ka kōnō ta. A ka dence sōrōn Yakuba yē tuma mēn na, ¹¹ Leya kan ko: «N da kunnadiya.» Wo le rō, a ka den wo tō la ko Kadi†.

¹² Silipa ka kōnō ta iko tuunni. A ka a dence filanan sōrōn Yakuba yē tuma mēn na, ¹³ Leya kan ko: «εε, n da sewa kosebē. Musoilu ri a fō n ma sisēn ko mōō jālenni le n di.» Wo le rō, a ka den wo tō la ko Aséri§.

¹⁴ Suman ka waati, Ruben wara jiri lulu doilu terēn sene rō. A ka lulu woilu bō ka na alu di a na ma. Raseli ka jiri lulu woilu yen Leya bolo tuma mēn na, a kan ko: «I jaandi, i ye n sō i dence la janman basi jiri lulu doilu rō.»

¹⁵ Kōni Leya ka a jabi: «I ra n cē bō n bolo kōni wo ma i wasa, ko di? I ri n dence la janman basi jiri lulu fanan bō n bolo wa?» Raseli kan ko: «Ale le wo ri. Ni i ka n sō i dence la janman basi jiri lulu rō, n na cē Yakuba ri si i fe su jin dō.» Leya sōnda wo ma.

¹⁶ Wura fe, Yakuba nara ka bō sene rō. Leya ka i bori ka wa a kunben, ka a fō a yē ko: «I sitō nde le wara bi. N da i sōrōn n dence la janman basi jiri lulu la.» Yakuba sira Leya fe su wo rō. ¹⁷ Alla tolo tere ye Leya la tarali kan na. Wo rō, Leya ka kōnō ta ka a dence looluna sōrōn Yakuba yē. ¹⁸ Leya kan ko: «Alla ra n sara ka a masōrōn n ka n na jōnmuso di n cē ma.» Wo le rō, a ka dence wo tō la ko Isakari*.

¹⁹ Leya ka kōnō ta iko tuunni ka a dence wōōrōna sōrōn Yakuba yē. ²⁰ A kan ko: «Alla ra ko ba ke n yē. N cē ri n bonya sisēn, ka a masōrōn n da dence

† **30:11** Kadi kōrō ye le ko kunnadiya § **30:13** Aséri kōrō ye le ko sewa

* **30:18** Isakari kōrō ye le ko sara

wɔɔrɔ sɔrɔn a yε.» Wo le rɔ, a ka den wo tɔɔ la ko Sabulɔn†.

²¹ Wo kɔ rɔ, a ka denmuso fanan sɔrɔn, ka wo tɔɔ la ko Dina.

²² Nba, Alla hankili tora Raseli la ko kɔ, ka a la tarali kan namen, ka den ko nɔɔya a yε. ²³ Wo rɔ, a ka kɔnɔta ka dence sɔrɔn. A kan ko: «Alla ra maloya bɔ n na. ²⁴ Allabatala ye dence gberε la jin kan.» Wo le rɔ, a ka den wo tɔɔ la ko Yusufu‡.

Yakuba kera nanfulutii ri.

²⁵ Nba, Raseli ka Yusufu sɔrɔn tuma mɛn na, Yakuba ka a fɔ Laban yε ko: «Sila di n ma. N ye n kɔseyi n wara. ²⁶ I ye n musoilu ni n denilu di n ma. N ka baara kε i yε, woilu le la ko rɔ. I ye alu di n ma, sa n di wa. N da baara mɛn kε i yε, i jεrε ka wo lɔn.» ²⁷ Laban ka a jabi: «N fa, i sabari. N da jaŋjininnin kε ka a yen ko Allabatala ka baraka don n ko rɔ ile le la ko kosɔn. ²⁸ Wo rɔ, i sara ka kan ka bɛn mɛn na, i ye wo fɔ n yε. N di wo di i ma.»

²⁹ Yakuba ka a jabi: «Nde ka baara kε i yε ja mɛn ma, i jεrε ka wo lɔn. I la kolofenilu siyayara ja mɛn ma nde bolo, i ka wo fanan lɔn. ³⁰ N nara kolofen mɛn tɛrɛn i bolo, woilu ma siya tɛrɛ, kɔni sisen, alu ra siyaya ka kε kolofen kuru ba ri. Allabatala ka baraka don i la ko rɔ nde le la ko kosɔn. Wo rɔ, n tɛ baara kε n jεrε yε sisen, ka n na denbaya balo wa?»

³¹ Laban kan ko: «N ye nfen di i ma ka a kε i sara ri?»

Yakuba ka a jabi: «I kana foyi di nde ma, kɔni ni i ka ko kelen pe jin kε n yε, n di to yan ka i la saailu gbɛn ka alu kanda. ³² I ye dijɛ, n ye wa i la kolofen

† ^{30:20} Sabulɔn kɔrɔ ye le ko bonya ‡ ^{30:24} Yusufu kɔrɔ ye le ko ka do la a kan

bεε kɔrɔsi bi. N wa kolofen finman mεnilu yen, n di woilu bɔ a rɔ, a ni kolofen manjεenman. Woilu ri kε n sara ri. ³³ Lon do natɔ, ni i ka n na kolofen kɔrɔsi i ri a lɔn ni n telenni wala n telenni tε. Ni i ka ba do yen n bolo, mεn manjεenman tε, i ri a lɔn ko n da wo sonya ile ma. Ni i ka saa do yen n bolo, mεn finni tε, i ri a lɔn ko n da wo sonya ile ma.» ³⁴ Laban kan ko: «Ale le wo ri. I ka a fɔ na mεn ma, a ri kε wo na ma.»

³⁵ Wo lon kelen, Laban wara bakɔrɔn manjεenman ni bamuso manjεenman bεε bɔ a la kolofenilu rɔ. Fen fen, ni gbe ye a rɔ, a ka wo bεε bɔ alu rɔ. A ka saa finilu la woilu kan ka a bεε karifa a dencεilu la. ³⁶ Alu ka tele sawa taama kε kolofen woilu ri ka alu mabɔ Yakuba la fewu! Yakuba tora Laban na kolofenilu gbεnna ka alu lakanda.

³⁷ Nba, Yakuba ka jiribolo kεndε doilu tεε jiri su sawa la, pepiliye, amande[§], a ni pilatani. A ka jiribolo kεndε woilu fara doilu bɔ alu ma ka jiribolo woilu manjεen. ³⁸ A ka jiribolo kεndε manjεennin woilu bilabila bailu la jiminfen kɔndɔ, sa bailu wa na alu min diya, alu ri jiribolo manjεennilu yen, baa bailu ye yεlεla i nɔɔn kan i min waati le. ³⁹ Alu wa yεlε i nɔɔn kan jiribolo woilu nε, alu ri den manjεenilu sɔrɔn.

⁴⁰ Yakuba ka saamusoilu bɔ kolofen tɔilu rɔ, ka alu bila Laban na saa manjεenilu ni finmanilu nakɔrɔ, sa alu ri Laban na saa woilu yen. Wo rɔ, Yakuba la saa woilu ka den manjεenman ni den finmanilu sɔrɔn. Wo bolo ma, Yakuba ka kolofen

§ **30:37** Amande ye jiriden damunta le ri.

kuru sɔrɔn a jεrε ye. A ma sɔn a ta ni Laban ta ye basan.

⁴¹ Ni kolofen tɔlɔnninilu nara ka i min, Yakuba ri jiribolo manjueenilu bila jiminfen kɔndɔ alu nakɔrɔ. Wo rɔ, alu ri yεlε i jnɔn kan jiribolo dafε, ⁴² kɔni ni kolofen baraninilu nara ka i min, Yakuba te jiribolo bila jiminfen kɔndɔ alu jnakɔrɔ. Wo bolo ma, kolofen baranin denilu kera Laban ta ri, kɔni kolofen tɔlɔnni denilu kera Yakuba ta ri.

⁴³ Nba, Yakuba kera fentii ri wo ja le ma. A ka kolofen misen siyaman sɔrɔn. A ka jɔnilu fanan sɔrɔn, a ni jnɔomeilu ni falilu.

31

Yakuba ka a dokon ka bɔ Laban wara

¹ Laban denceilu tere ye a fɔla ko: «Yakuba ra an fala nanfulu bεε ta. A ra a jεrε kε fentii ri wo rɔ an fa bolofen dɔ.» Wo kuma fɔra Yakuba ye. ² Yakuba ka Laban nakɔrɔsi ka a yen ko Laban tere ye a mirila a ma ja mεn ma fɔlɔ, a te a mirila a ma wo ja ma butun.

³ Lon do rɔ, Allabatala ka a fɔ Yakuba ye ko: «I kɔseyi i fa so la, ka wa i badenmailu tεma. N di to i fe.» ⁴ Wo rɔ, Yakuba ka kela di Raseli ni Leya ma ko alu ye na a tεren wula kɔndɔ, a la kolofen ye yɔrɔ mεn. ⁵ Alu seni ye, Yakuba ka a fɔ alu ye ko: «N da a yen ai fa ja rɔ ko a tere ye mirila n ma ja mεn ma fɔlɔfɔlɔ, a te mirila n ma wo ja ma butun, kɔni n fa Maari Alla ra to n fe. ⁶ Ai jεrε ka a lɔn ko n da baara kε ai fa ye n fanka bεε la. ⁷ Hali wo, ai fa ka n janfa, ka do bɔ n sara la ko tan, kɔni Alla ma sɔn a ye kojuu kε n na. ⁸ Ni ai fa ka a fɔ ko finman ni gbεman ye kolofen mεnilu rɔ, ko woiliu ri kε n sara

ri, nba, kolofen bεε ra kε finman ni gbεman di. Ni a ka a fɔ ko kolofen mεnilu manjεennin, ko woilu ri kε n ta ri, nba, kolofen bεε ri manjεeen. ⁹ Alla le ka ai fa la kolofenilu bɔ a bolo ka alu di nde ma.»

¹⁰ Yakuba ka a fɔ a musoilu yε ikɔ tuun ko: «Kolofen ye yεlεla i jnɔɔn kan waati mεn na, n sibora. N ka a yen sibo rɔ ko bakɔrɔn mεnilu ye yεlεla bamusoilu kan, wo bεε manjεennin de. ¹¹ Wo waati rɔ, Alla la mεlεka ka a fɔ n yε ko: ‹Yakuba.› N kan ko: ‹Naamun.› ¹² A kan ko: ‹Bakɔrɔn mεnilu ye yεlεla bamusoilu kan, i ye woilu kɔrsi. A bεε manjεennin de. A ye wo ja le ka a masɔrɔn Laban ka fen fen kε i la, n ka wo bεε yen.› ¹³ A kan ko: ‹Alla le nde ri, mεn ka a jεrε yiraka i la Beteli. I ka tulu kε kabakurun kan dinkira mεn dɔ ka a kε tɔɔmasere ri, ka i dakan ta n yε. Nba, sisen, i wuli ka bɔ jamana jnɔ dɔ, ka i kɔseyi i fa so la.›»

¹⁴ Rasεli ni Leya ka a jabi: «An tε foyi sɔrɔnna yan an fa la cεerɔ a la saya kɔrɔ. ¹⁵ An fa jεrε tε an jatela foyi ri sisen fo siya gbεre mɔɔ. A ra an san, ka an furu fen bεε damunun ka a ban.› ¹⁶ Alu kan ko: «Alla ra nanfulu mεn bεε mira an fa la ka a di i ma, an ta le wo bεε ri, a ni an denilu. Nba, Alla ka mεn fɔ i yε, i ye wo kε fasayi.›»

¹⁷ Wo rɔ, Yakuba wulira ka a musoilu ni a denilu layεlε jnɔɔmεilu kan, ka sila mira ka wa. ¹⁸ A ka a la kolofen bεε bila a jnε ka wa a fa Isiyaka wara, Kanaan jamana rɔ. A ka a la kolofenilu ni a bolofen bεε ta, a tun ka fen fen sɔrɔn Padani Aramu.

¹⁹ Alu watɔla, Rasεli ka a fa Laban na jooilu sonya ka wa alu ri a bolo. A ka woilu sonya a fa kɔ ma, baa Laban wani tεrε a la saailu si mali diya.

²⁰ Yakuba ka Aramu bɔnsɔn Laban janfa wo ja le ma. A ma a sara a la fo ka a dokon a ma ka wa.
²¹ A ka a bolofen bεε ta ka a bori. A ka Efirati ba tεε, ka wa Kiliyadi koyinke jamana fan fε.

Laban ka Yakuba kɔsarān

²² Yakuba wa tele sawanan lon, a fɔra Laban yε ko Yakuba ra a bori.

²³ Laban ka a badenmailu laden ka wa Yakuba kɔ. Alu ka tele wɔrɔnwula kε a kɔsaranna. Alu ka Yakuba tεren Kiliyadi koyinke yɔrɔ rɔ, ²⁴ kɔni sani alu ye i jɔɔn yen, Alla ka a jεrε yiraka Aramu bɔnsɔn Laban na sibo rɔ, ka a fɔ a yε ko: «Laban, i ye a kε kojuma. I kana Yakuba danka, i kana duwawu kε a yε!»

²⁵ Nba, Laban wara Yakuba tεren tumana mεn na, Yakuba tun da a la faaninbonilu lɔ koyinke do le kan. Laban ni a bɔdenmailu ka alu la faaninbonilu lɔ Kiliyadi koyinkeilu kɔrɔ. ²⁶ Laban wara ka a fɔ Yakuba yε ko: «I ka nfen de ko kε n na nin ten? I ra janfa don n ma ka n denmusoilu ta ikomin jɔn ye mirala kεlε rɔ ja mεn ma. ²⁷ Nfenna i ka i dooko n ma ka i bori? I mɔ i sara n na fo ka n janfa. Ni wo tε, n tun di tolon ba kε i yε. An tun di sewa ka donkilila, ka dundun fɔ, ka kora fɔ ka i bilasila. ²⁸ Hali ka n denmusoilu ni n mamarenilu kɔndɔn, i ma wo fεrε di n ma. I na nfen nalonmaya ko kela jin di? ²⁹ An ye yɔrɔ mεn dɔ jin, a se ye n yε ka kojuu kε i la, kɔni su taminni, i fa Maari Alla kumara n yε sibo rɔ. A kan ko: «Laban, i ye a kε kojuma. I kana Yakuba danka, i kana duwawu kε a yε.» ³⁰ Nba, n ka a lɔn ko i kunfani ba le tεrε ka wa i fa so la, kɔni nfenna i ka n na jooilu sonya?» ³¹ Yakuba ka Laban jabi: «N ka n bori ka a masɔrɔn n silanni tεrε i jε. A tεrε ye n kɔndɔ ko i ri

i denmusoilu bɔ n bolo fanka la ³² kɔni i la jooilu ta fan fɛ, ni i ka woilu tərən mɔɔ men bolo yan, wo tii ri faa de! An badenmailu siini yan ka ke an sereilu ri. Wa i ḥalankalan an na dinkira bɛɛ rɔ. Ni i ka i la fen do yen, i ye a ta.» Yakuba tun ma a lɔn ko Raseli le ka a fa Laban na jooilu sonya.

³³ Laban wara a ḥalankalan Yakuba la faaninbon na, ka bɔ ye ka wa a ḥalankalan Leya la faaninbon na, ka bɔ ye ka wa a ḥalankalan jɔnmuso fila la faaninbonilu la. A ma fen si yen ye. A bɔra ye ka wa a ḥalankalan Raseli la faaninbon na. ³⁴ Jaa, Raseli le tun ka a fa la jooilu dookoma jɔɔmɛ siifen kɔrɔ, ka a sii a kan. Laban ka a ḥalankalan fan bɛɛ rɔ bon na, kɔni a ma foyi yen. ³⁵ Raseli ka a fɔ a yɛ ko: «N fa, i ri hake to. N ye musoilu la landa karɔyen na bi. Wo rɔ, n ti se n wulila.» Laban ka a la jooilu jinin fan bɛɛ rɔ, kɔni a ma alu yen.

³⁶ Wo rɔ, Yakuba jusu bɔra Laban kanma fo ka a kɛlɛ loo tere ye a la. A ka a fɔ a yɛ ko: «I ra n kɔsaran ten nfenna? N ka kojuu su juman de ke i la? N ka hake su juman ta i la? ³⁷ Nba, i ra i ḥalankalan ka n bolofen bɛɛ mafɛnɛ sisɛn, i ka i la fen su juman yen? I ka men yen, wo labɔ an badenma bɛɛ jana yan, sa alu ri kititee an tema. ³⁸ Nde ka san muwan ke i wara. I la saamusoilu ni i la bamusoilu fen fen kɔnɔ ma tijan. N ma i la saaji si mafaa ka a damun. ³⁹ Wara wa men mira ka wo faa, n tɛ wo yiraka i la. N jere ri wo jɔɔn sara. Men wa sonya su rɔ, a ni men wa sonya tele rɔ, i ri a fɔ ko n ye wa wo jɔɔn jinin. ⁴⁰ Tara gbara n na tele rɔ. Nɛnɛ ka n mira su rɔ. N ma se sunoola. ⁴¹ N ka san muwan ke i wara. N ka san tan ni naanin ke baarala i yɛ i denmuso fila ko kosɔn. N ka san wɔɔrɔ ke baarala

ka kolofen doilu sɔrɔn, kɔni i ka do bɔ n sara la sjna tan. ⁴² N benba Iburahima Maari Alla, n fa silanni Maari Alla mɛn ye kɔnin, ni wo tun ma kɛ n fe, sa i ra n bolokolon gbɛn a to, kɔni Alla ka n na tɔrɔya le yen. N ka baara mɛn kɛ, ale le ka wo lɔn. Wo le kosɔn, a ka kititeɛ ile ni nde tɛ su taminni jin dɔ.»

⁴³ Laban ka Yakuba jabi: «Muso jin ye n denmusoilu le ri. Alu den ye n mamaren de ri. Kolofen jin ye n na kolofen de ri. I ja yen fen fen na jin, n ta le wo bɛɛ ri, kɔni n ti se n denmusoilu ni n mamarenilu bɔla i bolo butun. ⁴⁴ Wo rɔ, an ye bɛn kan kelen ma an ni i jnɔɔn tɛma, sa sereya ri kɛ nde ni ile tɛma.»

⁴⁵ Yakuba ka kabakurun do ta ka a lalɔ ka a kɛ tɔɔmasere ri. ⁴⁶ A ka a fɔ a badenmailu yɛ ko: «Ai ye na kabakurun di.» Alu ka kabakurun ta ka a ton i jnɔɔn kan. Wo kɛni, alu bɛɛ ka i ladɛn ka damunun kɛ kabakurun ton tɔrɔfe. ⁴⁷ Laban ka kabakurun ton wo tɔɔ la ko Sekari Sahaduta. Yakuba ka a tɔɔ la ko Kalèdi. ⁴⁸ Laban kan ko: «Kabakurun ton mɛn ye sereya le ri nde ni ile tɛma bi.» Wo le kosɔn yɔrɔ wo tɔɔ lara ko Kalèdi. ⁴⁹ A ye kilila fanan ko Misipa, ka a masɔrɔn Laban ka a fɔ Yakuba yɛ ko: «An wa fara, Allabatala ye an fila bɛɛ kɔrɔsi. ⁵⁰ Ni i ka kojuu kɛ n denmusoilu la, ni i ka muso gberɛilu ta, hali n ma ko lɔn a rɔ, Alla ja yen an fila bɛɛ la. I kana jnina wo kɔ rɔ.»

⁵¹ Laban ka a fɔ Yakuba yɛ ko: «I ja lɔ kabakurun ton jin dɔ, ka i ja lɔ kabakurun jin dɔ, n ka mɛn lɔ ka a kɛ tɔɔmasere ri. ⁵² Kabakurun ton jin di kɛ sereya ri. Kabakurun lɔni jin fanan di kɛ sereya ri. Wo rɔ, n kana tamin alu la ka wa i kɛle. I fanan kana tamin alu la ka na n kɛle. ⁵³ I benba

Iburahima ni n benba Nakɔri a ni alu failu Maari ri kititee nde ni ile tεma.»

Yakuba ka a kali Alla la, a fa Isiyaka silanni mɛn yε. ⁵⁴ Yakuba ka kolofen do faa ka Alla sɔ wo rɔ koyinkε kan ye, ka a janin ka a badenma bεe kili ko alu ye na damunun kε. Alu ka damunun kε ka si koyinkε kan ye.

32

Yakuba ka kela lawa Esawu ma

¹ Wo sɔɔma da la jona, Laban wulira ka a den-musoilu ni a mamarenilu kɔndɔn ka duwa alu yε, ka ban ka sila mira ka a kɔseyi a wara.

² Yakuba ni a la mɔɔilu ka sila mira ka wa. Alu watɔla, Alla la melɛka doilu nara bɛn Yakuba la. ³ A ka alu yen waati mɛn na, a kan ko: «Dinkira jin ye Alla la daa make diya le ri.» Wo rɔ, a ka dinkira wo tɔɔ la ko Mahanimu.

⁴ Yakuba ka keladenilu lawa a jε a kɔrɔcε Esawu ma Seyiri la jamana rɔ, Edɔmu mara rɔ kɔnin. ⁵ A ka alu kelaya ko: «Ai ye wa a fɔ n tii Esawu yε ko a la jɔnce Yakuba kan ko n wani tere Laban wara. Ko n tun da mɛn ye, kɔni sisen n da n kɔseyi. ⁶ Ko nisi ye n bolo, a ni fali, a ni saa, a ni ba, a ni jɔnilu. Ko n ye kela la wala a ma, sa n na ko ri diya n tii Esawu yε.» ⁷ Keladenilu wara kela wo fɔ Esawu yε. Alu ban mɛn kɛni kela fɔla, alu ka alu kɔseyi Yakuba ma ka a fɔ a yε ko: «An wara i kɔrɔcε Esawu tereñ ye. A natɔ i labenна. Cε kɛmɛ naanin ye a bolo.»

⁸ Yakuba silanda kojuuya foo ka a kɔnɔ rakaliya. A ka a la mɔɔilu ratala ka alu kε kuru fila ri, ka a la saa a ni ba a ni nisi a ni jɔɔmɛilu fanan dataala wo

na ma. ⁹ A tεre ye a mirila ko: «Ni Esawu nara be kuru kelen kan, a to kelen di i bori ka bo a bolo.»

¹⁰ A ka Alla tara ko: «εε Allabatala, n benba Iburahima ni n fa Isiyaka Maari, ile le ka a fo n yε ko n ye n koseyi n fa so la, ka wa n badenmailu tεma. I kan ko i ri here ke n yε ye. ¹¹ I la kaninteya ka bon nde ma. N ka Juriden ba tee foləman, foyi tεre te n bolo, fo n na taama gbeleke dorɔn, koni bi, n na mɔɔilu ra siyaya kosebε, foo ka ke kuru fila ri. ¹² I jaandi, i ye n bo n korɔcε Esawu bolo. N silanni a jε. A kana na be n kan, ka n na denilu ni ie nailu faa. ¹³ I jεrε le ka a fo ko i ri here ke n yε ka n bɔnsən siyaya iko kɔɔji kijε, mɔɔ te wo men dan lonna.»

¹⁴ Yakuba banda Alla matarala ka su si dinkira wo rɔ. A ka a la kolofen doilu jenemateməmən, ka alu sanba a korɔcε Esawu ma. ¹⁵ A ka bamuso kemε fila ni bakorɔn muwan bo, ka saamuso kemε fila ni saaji muwan la woilu kan. ¹⁶ A ka jɔɔmemuso bisawa ni woilu sinmindenilu fanan bo. Ka la woilu bεε kan, a ka nisimusо binaanin ni tora tan fanan bo, a ni falimusо muwan ni falice tan. ¹⁷ A ka kolofen woilu ke kuru doilu ri, bεε ni a ta. A ka kuru kelen kelenna bεε karifa a la jɔn kelen kelenna la. A ka a fo alu yε ko: «Alu ye wa n jε, ka tee ladon kolofen kuruilu tεma.» ¹⁸ A ka a fo jɔn fɔlɔ yε ko: «I wa n korɔcε Esawu yen, a ri i majininka ko: «I tii ye yon di? I watɔ mi ten? Kolofen jinilu ye yon ta ri?» ¹⁹ A wa jininkali ke ten, i ye a jabi: «I la jɔnce Yakuba ta le. A ka alu lana ile le ma, ko ka a tii Esawu sanba. A jεrε natɔ kɔ fε.»»

²⁰ Yakuba ka kuma kelen wo fo jɔn filanan yε, a ni jɔn sawanan, a ni a to bεε, kolofen kuruilu karifani menilu la. A ka a fo alu yε ko: «Ai wa n

kɔrɔcɛ Esawu yen, ai ye jabili kelen wo di a ma. ²¹ Ai ye a fɔ a yε fanan ko a la jɔnce Yakuba natɔ le jin di.» Yakuba ye a mirila ko: «Ni n ka a ladiya kolofenilu la fɔlɔ, a jusu ri suma. Wo rɔ, an wa an jɔon yen, n na ko ri diya a yε.» ²² Nba, Yakuba ka sanba fen woilu lawa a ne, kɔni ale jere ka su si dinkira wo rɔ ye.

Yakuba ka sɛedon

²³ Su kelen wo rɔ, Yakuba wulira. A ka a muso fila ni a la jɔnmuso fila, a ni a dencɛ tan ni kelen, natamin Jabɔki ba kɔma. ²⁴ A ka alu latamin ba kɔ, ka ban ka a bolofenilu bɛɛ fanan natamin. ²⁵ Yakuba kelen pe tora ba fan kelen wo fɛ. Su wo rɔ, cɛ do nara be Yakuba kan. Alu ka sɛedon foo ka kɛnɛ bɔ. ²⁶ Cɛ wo ka a yen ko a ti na lasela Yakuba la waati mɛn na, a ka Yakuba gbasi a worokudu rɔ. Wo rɔ, Yakuba woro kolo mukara. ²⁷ Cɛ kan ko: «I ye n bila. Kɛnɛ bɔtɔ le.» Yakuba ka a jabi: «N tɛ! Nii ma baraka don n dɔ, n tɛ i bila fewu!» ²⁸ Cɛ kan ko: «I tɔɔ di?» A ka a jabi: «N tɔɔ le Yakuba.» ²⁹ Cɛ kan ko: «I tɔɔ tɛ wo ri butun. I tɔɔ le sisen ko Isirayeli, ka a masɔrɔn i ni Alla ra sɛedon, i ni mɔɔillu ra sɛedon, wo bɛɛ rɔ fanka ye i bolo.»

³⁰ Yakuba ka a fɔ a yε ko: «I jaandi, i tɔɔ fɔ n yε.» Cɛ kan ko: «Nfenna i ye n tɔɔ majininkala?» A ka baraka don Yakuba la ko rɔ. ³¹ Yakuba ka wo dinkira tɔɔ la ko Penuyeli. Wo kɔrɔ le ko: «N da Alla yen ja ni ja, kɔni n ma faa.»

³² Yakuba bɔra Penuyeli telebɔ waati. A tɛre ye taamala ka jii a sen kelen ma ka a masɔrɔn a sen da muka. ³³ Nba, Yakuba gbasira a worokudu le rɔ wo ja le ma. Wo le ka a kɛ, Isirayeli ka tɛ kolofen worokudu fasa damunna, haan bi.

33

Yakuba ni Esawu ka ijøøn bøn

¹ Nba, Yakuba ka a ña lɔ ka Esawu natøla yen. Cε mao kεmε naanin ye a køfε. Wo rɔ, Yakuba ka a denilu ratala Raseli ni Leya tεma, a ni jønmuso fila tεma, bεε ni a na. ² A ka jønmusoilu ni alu den bila ñε fe, ka Leya ni a denilu tuun woilu la, ka Raseli ni Yusufu bila kɔ fe. ³ A jεrε taminda ñε fe. A wara ka i majii bake sijna wørønwula, ka i madon a kørøcε Esawu la. ⁴ Esawu ka i bori ka na a labεn. A ka a to a kan ka a sunbu. Alu fila bεε kasira. ⁵ Esawu ka a ña lɔ ka Yakuba musoilu ni a denilu yen. A kan ko: «Menilu nani i fe ñin di, yon de woilu ri?» Yakuba kan ko: «N tii, Alla kininkininda n ma ka den menilu di n ma, woilu le ten.»

⁶ Jønmusoilu ni alu deni ka ai madon ka ai majii ka a fo. ⁷ Leya ni a denilu fanan nara ka alu majii. A laban, Raseli ni Yusufu nara ka alu majii.

⁸ Esawu ka Yakuba majininka ko: «N bønda kolofen kuru siyaman di. Wo kørø ye nfen di?» Yakuba ka a jabi: «N tii, n ka alu lawa i ma, kosa n na ko ri diya i yε.» ⁹ Esawu kan ko: «N doo, fen siyaman ye nde fanan bolo. I bolofenilu ye to i bolo.» ¹⁰ Køni Yakuba kan ko: «I jaandi. Ni n na ko ra diya i yε, i ye woilu mira. N ña la i kan sisen, wo le iko n da n ña la Alla kan ka a masørøn i ra n damira koñuma. ¹¹ I jaandi. N ka i sanba fen menilu la, i sabari ka woilu mira. Alla ra kininkinin n ma. N bolofen ka siya, n døseni tε foyi la.» Yakuba ka wo magbøleya kosebø foo Esawu dijøera wo ma.

¹² Esawu ka a fɔ a yε ko: «An ye wa. N di wa i malɔ.» ¹³ Yakuba ka a jabi: «N tii, i jεrε ka a lɔn ko denilu la ko ka gbelen. Fanka tε alu la. Kolofenilu ni alu sinmindenilu ye n bolo fanan. N kana jina woilu kɔ. Ni n ka taama lakaliya tele kelen kɔrɔ dɔrɔn, wo te bɛn. Kolofenilu ri faa. ¹⁴ N tii, i ye wa n jnε sisen. N di wa dooni dooni, ka bɛn kolofenilu ni denilu taama ja ma. N di i tεrɛn Seyiri la jamana rɔ.» ¹⁵ Esawu kan ko: «Ale le wo ri. N na mɔɔ doilu ri to n kɔ ka i malɔ.» Yakuba kan ko: «N tii, i kana i jεrε tɔrɔ butun. Ni n diyara i yε, wo ri n wasa.»

¹⁶ Wo rɔ, Esawu ka sila mira wo lon kelen ka wa Seyiri la jamana rɔ.

¹⁷ Kɔni Yakuba wara Sukɔti. A ka a la bon lɔ ye, ka gba lɔ a la kolofenilu yε. Wo le kosɔn, alu ka dinkira wo tɔɔ la ko Sukɔti.

Yakuba sera Sikɛmu so kɔndɔ

¹⁸ Yakuba bɔra Padani Aramu ka wa. A juma donda Sikɛmu so kɔndɔ, mɛn ye Kanaan jamana rɔ. A seni ye, a ka a la faaninbon lɔ so kɔkan. ¹⁹ A la faaninbon lɔni dinkira mɛn, a ka wo dinkira san Sikɛmu fa Hamɔri bɔnsɔn de ma. A ka a san wodigbe kɛmɛ le la. ²⁰ A ka Alla saraka bɔ diya lɔ dinkira wo rɔ, ka wo tɔɔ la ko Alla ye Isirayɛli Maari le ri.

34

Dina ni Sikɛmu la ko

¹ Nba, Leya ka denmuso mɛn sɔrɔn Yakuba yε, wo tɔɔ le tεrε ko Dina. Lon do rɔ, Dina wara bɔ diya sunkurunilu fε so kɔndɔ. ² Kanberen do tεrε ye, mɛn tɔɔ ko Sikɛmu. Wo fa le Hifika Hamɔri ri, mɛn

ye jamanatiiya la. Sikemu ka Dina yen waati men na, a ka a mira fanka la ka a la a fe ka a ratijan.

³ Yakuba denmuso Dina diyara Sikemu ye kosebe. A ka a kanin. Wo ro, Sikemu kumara a ye kojuma, kosa a la ko ri diya sunkurun ye. ⁴ Sikemu ka a fo a fa Hamori ye ko: «I ye sunkurun nin furu n ye.»

⁵ A fo'ra Yakuba ye ko Sikemu ra a denmuso ratijan. Wo tuma, a dencsilu ye kolofen dafé wula kondø. Wo ro, Yakuba ma foyi fo ka alu makønø.

⁶ Sikemu fa Hamori nara bo Yakuba fe, ka na kuma a ye. ⁷ Yakuba dencsilu nara ka bo wula kondø. A fo'ra alu ye tuma men na ko Sikemu ra alu doomuso ratijan, alu dunyara ka mone kojuuya, baa Sikemu na men kela, kojuu ba le wo ri Isirayeli la mojilu wara. Mo te wo kela muume! ⁸ Hamori ka a fo Yakuba ye ko: «I denmuso duman n dence Sikemu ye kosebe. N ye ai madiyala, ai ye a di n ma, a ye ke a muso ri. ⁹ An ye ke furujøonmailu ri. Ai ye ai denmusoilu di an ma. An fanan di an denmusoilu di ai ma. ¹⁰ Ai di to an fe an wara yan. Jamana bee labilani ai ye. Ai ye i sii yan ka a julaya ke. Ai ye duu san ka a ke ai ta ri.»

¹¹ Sikemu ka a fo Dina fa ni a korocceilu ye ko: «Ai jaandi, ai ye hina n na. Ai ye dije n ye. Ai wa fen fen ninin n fe, n di wo bo ka a di ai ma. ¹² Ai ye furu nanfulu ba ni wodi siyaman fo. N di wo bee bo ikomin ai ka a fo na men ma, sa ai ri denmuso di n ma ka a ke n muso ri.»

¹³ Ikomin Sikemu tun da ban alu doomuso ratijanna, Yakuba dencsilu ka Sikemu ni a fa Hamori jabi janfa kuma la. ¹⁴ Alu kan ko: «Ka an doomuso di kojiibali ma, wo te ben. Maloya ko ba

le wo ri an wara. ¹⁵ An te sən wo ma foo ai cəman bəε ye a wara foo wo bəε wa faaninta kε ikomin an bəε faaninta kəni ja mən ma. ¹⁶ Ni wo kəra, an di an denmusoilu di ai ma. An fanan di ai denmusoilu furu. An di an sii ai təma yan ka kε məo kelen di. ¹⁷ Ni ai kənin ma sən faaninta ke ko ma, an di an denmuso mira ka wa a ri.»

¹⁸ Kuma wo diyara Haməri ni a dencə Sikəmu ye. ¹⁹ Sikəmu bəra ye i kərə ka wa ko wo rabən, baa Yakuba denmuso duman a yε kosebə. Sikəmu wo bonyani tərə ka tamin məo bəε kan a fa wara. ²⁰ Haməri ni a dencə Sikəmu wara ladən diya so donda la ka kuma so kəndə məo ilu yε. ²¹ Alu kan ko: «Məo mən ye an dujəənilu le ri. An ye dijə alu ye to an na jamana kəndə ka julaya ke an na jamana rə, baa an na jamana ka bon, an bəε ri kun a kəndə. An di alu denmusoilu furu ka an denmusoilu di alu ma. ²² Kəni ko do ye an təma. Ni cə bəε ma sən ka faaninta kε, iko alu bəε faaninta kəni ja mən ma, alu te sən ka alu sii an təma ka an ke məo kelen di. ²³ Ni alu ka alu sii an təma yan, alu la kolofen ni alu bolofen bəε te kε an ta ri wa? An ye sən faaninta ke ko wo ma, sa alu ri to an təma yan.»

²⁴ So kəndə məo ilu bəε sənda Haməri ni a dencə Sikəmu la kuma wo ma. Wo rə, cə mənilu tərə ye so kəndə, wo bəε faanintara.

²⁵ Nba, alu la faaninta kε tele sawana lon, ka dimin to alu kan, Yakuba dencə fila, Simeyən ni Lebi kənin, mənilu ni Dina ye fa kelen ni na kelen na, woilu ka alu la fanmuruilu ta ka na be so kəndə məo ilu kan, məo ilu men hankili te kəle wo ma. Alu nara don so kəndə məo ilu jənəma, ka cə ilu bəε faa.

²⁶ Alu ka Hamɔri ni a dence Sikɛmu fanan faa, ka alu doomuso Dina ta Sikɛmu la bon na ka wa a ri.

²⁷ Yakuba dence tɔ̄ilu nara fureilu lani t̄erɛn ye tuma mɛn na, alu ka so kɔndɔ mɔɔilu bolofen bɛɛ ta, ka a masɔrɔn Sikɛmu ka alu doomuso ratijan.

²⁸ Alu ka saa ni ba ni nisi ni falilu ta. Alu ka fen mɛnilu yen so kɔndɔ a ni seneilu rɔ, alu ka wo bɛɛ ta. ²⁹ Alu ka nanfulu bɛɛ mira, ka musoilu ni denilu bɛɛ mira. Fen fen t̄ere ye bon na so kɔndɔ, alu wara wo bɛɛ ri.

³⁰ Yakuba ka a fɔ Simeyɔn ni Lebi yɛ ko: «Ai ka mɛn ke jin di, wo ri kɛ ko ba ri n kun na. Ai ra n gboya yan mɔɔilu yɛ, Kanaan bɔnsɔn ni Feresikailu kɔnin. N na mɔɔilu ma siya. Ni yan mɔɔilu ka alu ladɛn ka be an kan, n ni n na denbaya bɛɛ ri faa.» ³¹ Alu ka a jabi: «A ka an doomuso jate iko sunkurunba. Wo bɛnni wa?»

35

Yakuba wara Beteli

¹ Lon do rɔ, Alla ka a fɔ Yakuba yɛ ko: «I ye wa i sii Beteli. I wa se ye, i ye saraka bɔ diya do lɔ Alla yɛ, mɛn ka a jɛrɛ yiraka i la wo lon ka a t̄erɛn i boritɔ i kɔrɔce Esawu kɔrɔ.»

² Wo rɔ, Yakuba ka a fɔ a la denbaya ni a la mɔɔilu bɛɛ yɛ ko: «Joo mɛnilu ye ai bolo, ai ye wo bɛɛ lafili. Ai ye ai jɛrɛ seniya, ka ai la faanin sənimani lu bila ai kan na. ³ An bɔtɔ yan ka wa Beteli. N watɔ saraka bɔ diya do lɔla Alla yɛ ye, mɛn ka n na tarali lame n ka n dɛmen n na tɔrɔya waati rɔ. A ra to n fe n na taama bɛɛ rɔ.»

⁴ Joo menilu t̄ere ye alu bolo, alu nara wo bɛɛ di Yakuba ma, a ni tololafen mɛnilu t̄ere ye alu tolo la. Yakuba ka denka sen jiriju do kɔrɔ Sikɛmu so dafɛ,

ka wo fen bεε dokon. ⁵ Alu wulira ka wa tuma mεn na, Alla ka silan ba bila ye mɔɔilu la so bεε kɔndɔ. Wo le ka a kε, mɔɔ si ma bɔ ka bila Yakuba ni a denceilu kɔ.

⁶ Yakuba ni a la mɔɔilu sera Lusi, so mεn tɔɔ bi ko Beteli. Wo ye Kanaan de rɔ. ⁷ Yakuba ka saraka bɔ diya lɔ Alla yε ye, ka a tɔɔ la ko Beteli, baa a ka a bori a kɔrɔcε Esawu jε tuma mεn na, Alla ka a jεrε yiraka a la dinkira wo le rɔ.

⁸ Wo tuma, Debora sara, mεn tun ka Rebeka lamɔ. Alu ka wo suu don jiriju do kɔrɔ Beteli so dafε, ka jiri wo tɔɔ la ko An Ye Kasila Jiri Nin Kɔrɔ.

⁹ Yakuba nara Beteli kɔ bɔ Padani Aramu tuma mεn na, Alla ka a jεrε yiraka a la ikɔ tuunni, ka kuma ka baraka don a la ko rɔ. ¹⁰ Alla ka a fɔ a yε ko: «I tɔɔ le tere ko Yakuba, kɔni i tɔɔ te ten butun ko Yakuba. I tɔɔ le sisɛn ko Isirayeli.» Alla ka a tɔɔ la ko Isirayeli wo na le ma. ¹¹ Alla ka a fɔ a yε ikɔ tuunni ko: «Alla Sebeetii le nde ri. I ye jiri ka siyaya. Jamana siyaman di bɔ i rɔ. I bɔnsɔn doilu ri kε mansailu ri. ¹² N ka duu mεn di Iburahima ni Isiyaka ma, n di wo di i ma. I bɔnsɔn mεnilu natɔ i kɔ, n di a di woilu fanan ma.»

¹³ Alla kumara Yakuba yε dinkira mεn na, a wara. ¹⁴ Yakuba ka tɔɔmasere kabakurun do lɔ dinkira wo rɔ, Alla kumara a yε dinkira mεn dɔ kɔnin. A ka resenji labɔn kabakurun wo kan, ka Alla sɔ wo rɔ. A ka tulu fanan nabɔn a kan. ¹⁵ Alla kumara a yε dinkira mεn na, Yakuba ka wo dinkira tɔɔ la ko Beteli.

Raseli la sayə ko

¹⁶ Alu bɔra Beteli ka wa. Alu tun ma sudunya Efirata la tuma mεn na, Raseli moyi lon sera. A la tin gbelyara kosebε. ¹⁷ A ye tin kan tuma mεn na,

tinkərəsilali ka a fə a yε ko: «I kana silan, i ra dence
kura sərən.»

¹⁸ Kəni Rasəli ma bə a rə. A satəla ka a den təə la
ko Benoni*. A sanin kərə, Yakuba ka den təə la ko
Beniyaminu†.

¹⁹ Nba, Rasəli sara. Alu ka a suu don Efirata sila
da la. Efirata wo təə le bi ko Bətilehəmu. ²⁰ Yakuba
ka təəmasere kabakurun do lə Rasəli kaburu kan.
Kabakurun wo ləni ye haan bi.

Yakuba denceilu

²¹ Isirayəli ni a la məɔilu bəra ye ka wa ai la
faaninbonilu lə Mikidali Edəri kəma.

²² Ai siini ye tuma mən na, Rubən ka i la Bilaha
fə, mən ye a fa Isirayəli muso do ri. Rubən ka mən
kə, wo fəra a fa Isirayəli yε.

Yakuba denceilu tərə məɔ tan ni fila le ri. ²³ Leya
ka Rubən de fələ sərən, ka Simeyən tuun wo la, ka
Lebi tuun wo la, ka Yahuda tuun wo la, ka Isakari
tuun wo la, ka Sabulən tuun wo la. Rubən tərə
Yakuba den fələ le ri. ²⁴ Rasəli denceilu tərə ye
Yusufu ni Beniyaminu ri. ²⁵ Rasəli la jənmuso Bi-
lahə ka Daan ni Nefitali sərən. ²⁶ Leya la jənmuso
Silipa ka Kadi ni Aseri sərən. Nba, woilu le Yakuba
denceilu le ri, a musoilu ka mən sərən a yε Padani
Aramu.

Isiyaka la saya ko

²⁷ Nba, Yakuba sera a fa Isiyaka wara Mamere,
Kiriyati Ariba so da la. Bi, məɔilu ye a fəla Kiriyati
Ariba le ma ko Heburən. Iburahima siini tərə
dinkira wo le rə. Isiyaka fanan siini tərə ye le.
²⁸ Isiyaka sərən ka san kəmə ni san biseyin bə tuma

* ^{35:18} Benoni kərə ye le ko «tərəya dence» † ^{35:18} Beniyaminu
kərə ye le ko «bolokininma dence»

men na,²⁹ a sara ka la a benbailu kan. A kɔrɔra ka a la kɔrɔya diya bɔ. A dencɛ fila Esawu ni Yakuba ka a suu don.

36

Esawu ka i mabɔ Yakuba la

¹ Esawu bɔnsɔn de jin di. Mɔɔilu ye a fɔla Esawu le ma ko Edɔmu. ² Esawu ka Kanaan bɔnsɔn sunkurun doilu furu. Do tɔɔ ko Ada, men tere Hetika Elɔn denmuso le ri. Do fanan tɔɔ ko Olibama, men tere Ana denmuso le ri. A benba tere Hifi do le ri, men tɔɔ ko Sibeyɔn. ³ Esawu ka Basimati fanan furu, Isumayila denmuso kɔnin. Basimati kɔrɔce tɔɔ ko Nebayɔti.

⁴ Ada ka Elifasi sɔrɔn Esawu ye. Basimati ka Reweli sɔrɔn a ye. ⁵ Olibama ka Jesi ni Jalamu ni Kore sɔrɔn. Esawu dencɛilu le woiliu ri, a musoilu ka menilu sɔrɔn a ye Kanaan jamana rɔ.

⁶ Nba, lon do rɔ, Esawu wara jamana gberɛ rɔ ka a mabɔ a dooce Yakuba la. A ka a musoilu ta, a ni a dencɛilu ni a denmusoilu a ni a la mɔɔ tɔilu bɛɛ. A ka a la kolofen ni a bolofen fanan bɛɛ ta, a tun ka men bɛɛ sɔrɔn Kanaan jamana rɔ. A ka wo bɛɛ mira ka wa yɔrɔ gberɛ rɔ, ⁷ baa a ni a dooce Yakuba bolofenilu ka siya tere kosebe. Wo kera sababu ri alu fila ma se tola iŋɔɔn kan yɔrɔ kelen dɔ. Alu siini tere jamana men dɔ, wo dooman tere alu fila bolo ka a masɔrɔn alu la kolofenilu wara kojuuya. ⁸ Wo rɔ, Esawu bɔra ye ka wa i sii koyinkɛma yɔrɔ do rɔ, Seyiri la jamana rɔ. Mɔɔilu ye a fɔla Esawu ma ko Edɔmu.

⁹ Esawu le kera Edɔmu bɔnsɔn bɛɛ benba ri, menilu siini Seyiri la koyinkɛma jamana rɔ. A bɔnsɔn de jin di. ¹⁰ Esawu dencɛilu le ten: Elifasi,

Esawu muso Ada dencε. Reweli, Esawu muso Basimati dencε.

¹¹ Esawu dencε Elifasi dencε ilu le ten: Teman, Omar, Sefo, Katamu a ni Kenasi.

¹² Esawu dencε Elifasi ka jønmuso do fanan ta. Wo tøø ko Tima. Ale le ka Amaleki sørøn a yε. Esawu muso Ada bønsøn de woilu ri.

¹³ Esawu dencε Reweli dencε ilu le ten: Nahati ni Seraki ni Sama ni Misa ri. Esawu muso Basimati bønsøn de woilu ri. ¹⁴ Esawu muso Olibama, wo tøø Ana denmuso le ri. A benba tøø Sibeyøn de ri. Olibama ka dencε mënili sørøn Esawu yε, woilu le tøø Jesi ni Jalamu ni Kore ri.

¹⁵ Nba, mënili køra kabilatii ri Esawu bønsøn dø, woilu le ten. A dencε følø Elifasi dencε woilu rø, mënili køra kabilatii ri, woilu le ten: Teman, Omar, Sefo, Kenasi, ¹⁶ Kore, Katamu a ni Amaleki. Kabilatii mënili børa Elifasi rø Edømu bønsøn na jamana rø, woilu le le tøø jøn di. Esawu la muso Ada bønsøn de woilu ri.

¹⁷ Esawu dencε Reweli dencε mënili køra kabilatii ri, woilu le ten: Nahati, Seraki, Sama a ni Misa. Kabilatii mënili børa Reweli rø Edømu bønsøn na jamana rø, woilu le tøø jøn di. Esawu muso Basimati bønsøn de woilu ri.

¹⁸ Esawu muso Olibama dencε mënili køra kabilatii ri, woilu le ten: Jesi, Jalamu a ni Kore. Esawu muso Olibama dencε mënili køra kabilatii ri, woilu le tøø jøn di. Olibama tøø Ana denmuso le ri.

¹⁹ Nba, woilu le Esawu dencε ri, a ni kabilatii. Edømu bønsøn de woilu ri.

Seyiri dencε ilu

²⁰ Nba, Esawu ka Hori Seyiri dencε ilu mënili tøøn Edømu bønsøn na jamana rø, woilu le ten

Lotan, Sobali, Sibeyən, Ana, ²¹ Disən, Esəri a ni Disan. Seyiri denceilu le woilu ri, mənilu kera Horilu la kabilabatii ri Edəmu bənsən na jamana rə. ²² Lotan denceilu le tərə Hori ni Həman ri. Lotan doomuso le tərə Timə ri. ²³ Sobali denceilu le ten: Aliban, Manahati, Ebali, Sefo a ni Onamu. ²⁴ Sibeyən denceilu le tərə Aja ni Ana ri. Ana wo tərə ye a fa la falilu gbenna tuma mən na, ale le fələfələ ka ji kaliman yen bə duu rə wula kəndə ye. ²⁵ Ana dence le tərə Disən di. A denmuso tərə Olibama ri. ²⁶ Disən denceilu le ten: Həmədan, Esiban, Itiran a ni Keran. ²⁷ Esəri denceilu le tərə Bilan ni Saban ni Akan di. ²⁸ Disan denceilu le tərə Usi ni Aran di.

²⁹ Nba, Horilu la kabilabatii le ten: Lotan, Sobali, Sibeyən, Ana, ³⁰ Disən, Esəri a ni Disan. Mənilu kera Horilu la kabilabatii ri Seyiri la ja-mana rə, woilu le tərə jin di.

Edəmu mansailu

³¹ Sani mansa ye a sii Isirayəlika kun na, mansa mənilu tərə ye mansaya la Edəmu bənsən na ja-mana rə, woilu le jin di. ³² Beyəri dence Bela kera mansa ri Edəmu bənsən na jamana kun na. A siini tərə so mən na, wo le təə ko Dinhaba. ³³ Bela sani, Seraki dence Jobabu kera mansa ri a nə rə. Wo siini tərə so mən na, wo le təə ko Bəsira. ³⁴ Jobabu sani, Usamu siira mansaya la a nə rə. Ale bəra Temanka jamana le rə. ³⁵ Usamu sani, Bedadi dence Hadari siira mansaya la a nə rə. Wo le ka Madiyan bənsən kələ Mowabu bənsən na jamana rə ka se alu la. A siini tərə so mən na, wo le təə ko Abiti. ³⁶ Hadari sani, Samula siira mansaya la a nə rə. Ale bəni Masirekan de. ³⁷ Samula sani, Sawuli le kera mansa ri a nə rə. Wo bəra Rehoboti, mən

ye ba da la. ³⁸ Sawuli sani, Akibori dence Bahali Hanani siira mansaya la a nō rō. ³⁹ Akibori dence Bahali Hanani sani, Hadari siira mansaya la a nō rō. Ale siini tere so men na, wo le tōo ko Pawu. A muso tōo le ko Matabēli. Matabēli tere Matiredi denmuso le ri. A benba le tere Masabu le ri.

⁴⁰ Nba, kabilabatii mēnilu bōra Esawu denilu rō, woilu tōo le jin di, a bēe ni a la mōgilu, a bēe ni a la duu. Alu tōo le ten: Tima, Aliba, Jetēti, ⁴¹ Olibama, Ela, Pinon, ⁴² Kenasi, Teman, Misari, ⁴³ Madiyeli a ni Iramu. Woilu le kera kabilabatii ri Edōmu bōnsōn na jamana rō, a bēe ni a la duu. Esawu le kera Edōmu bōnsōn bēe benba ri.

37

Yusufu la siboilu kan

¹ Nba, Yakuba ka i sii Kanaan jamana rō, a fa siini tere dinkira men dō kōnin. ² Yakuba dence ilu la ko le jin di.

Yusufu sōrōn ka san tan ni wərənwula bō tuma men na, a tere ye saai ni bailu gbenna a kōrōce ilu fe. A tere ye a fa la jōnmuso ilu Bilaha ni Silipa dence ilu demenna. Dence woilu tere ye ko benbali mēnilu kela la, Yusufu tere ye wo bēe jafōla a fa yē.

³ Yusufu duman tere Isirayeli yē ka tamin a den tō bēe la ka a masōrōn a ka Yusufu sōrōn a la cēmōobaya waati le rō. Wo rō, Yakuba ka durukiba numa manjēenman do di Yusufu ma. ⁴ Yusufu kōrōce ilu ka a yen ko a duman alu fa yē ka tamin alu tō bēe la. Wo rō, Yusufu gboyara alu yē foo alu ka alu ban kuma numa fōla a yē.

⁵ Lon do rō, Yusufu sibora. A ka wo jafō a kōrōce ilu yē tuma men na, do lara a la gboyajē kan.

⁶ A ka a fō alu yē ko: «Ai ye i tolo malō n na sibo kan

na! ⁷ N sibora an bεε ye sene rɔ. An tere ye suman kala ka a lasidi. Wo yoroni bεε, n ta sumansidi ka i wuli ka i lo. Ai la sumansidilu nara n ta laminin ka i majii a kɔrɔ.» ⁸ A kɔrɔceilu ka a jabi: «A ye di? A loo ye i la ka i sii an kun na ka ke an na mansa ri wa?» A gboyara alu ye ikɔ tuunni ka tamin foloman na a la sibo ni a la kumailu kosɔn.

⁹ Yusufu sibora ikɔ. A ka wo fanan nafɔ a kɔrɔceilu yε. A kan ko: «Ai la tolo malɔ n na. N da sibo ikɔ tuun. N ka tele yen a ni karo ni lolo tan ni kelen. Wo bεε ka i majii n kɔrɔ.»

¹⁰ A ka sibo nafɔ a fa ni a kɔrɔceilu ye tuma men na, a fa jamanda a ma ko: «Sibo su numan de wo ri? I ye a fe nde ni i na ni i kɔrɔceilu bεε ye na an majii i kɔrɔ wa?» ¹¹ A la ko nangboya ka a kɔrɔceilu mira, kɔni a fa tere ye i mirila sibo wo ma waati bεε rɔ.

Yusufu kɔrɔceilu ka a san

¹² Nba, lon do rɔ Yusufu kɔrɔceilu wara alu fa la kolofenilu gbɛn diya Sikemu. ¹³ Isirayeli ka a fɔ Yusufu ye ko: «I kɔrɔceilu ra wa kolofenilu gbɛn diya Sikemu. N ye a fe i ye wa bɔ ye.» Yusufu kan ko: «Ale le wo ri.»

¹⁴ Yakuba ka a fɔ a ye ko: «Wa bɔ alu fe. Ni alu kɛndɛ, ni ko te kolofenilu fanan na, i ye na wo fɔ n yε.» Wo rɔ, a ka Yusufu lawa ka bɔ Heburɔn kɛnegbe rɔ.

A se men keni Sikemu, ¹⁵ a tere ye a mataamala wula kɔndo. Ce do ka a tereñ ye ka a majininka ko: «I ye nfen jininna?» ¹⁶ Yusufu kan ko: «N ye n kɔrɔceilu le jininna. Alu ye kolofenilu gbenna. I ka alu diya lɔn wa?» ¹⁷ Ce kan ko: «Alu ra bɔ yan. N ka alu kan men ko alu watɔ Dotan.» Yusufu bɔra

ye ka wa alu kɔ. A ka alu tereṇ Dotan. ¹⁸ A kɔrɔceilu ka a natɔla yen foo yɔrɔ jan. Sani a ye se alu ma, a kɔrɔceilu ka janfa don a ma ko alu ri a faa. ¹⁹ Alu ka a fɔ i nɔɔn yε ko: «Ai ja lɔ, sibotii wo natɔ la le ten! ²⁰ An ye an wuli ka a faa. An ye a lafili kɔlɔn jaran kɔndɔ ka a fɔ ko wara juu le ka a faa ka a damun. A la sibo ri kε men di wo rɔ, an di wo yen.»

²¹ Ruben ka kuma wo men tuma men na, a loo tere ye a la ka Yusufu kisi alu ma. A kan ko: «An kana a faa. ²² Ai kana a jeli labɔ. Ai ye a lafili kɔlɔn jaran jin kɔndɔ wula kɔndɔ yan, ai kana ko kε a la.» Ruben ka wo fɔ kosa a ri wa alu kɔfe ka Yusufu layeļe kɔlɔn dɔ ka wa a di a fa ma.

²³ Nba, Yusufu se men keni alu ma, alu ka a la durukiba juma manjneenman wo bɔ a kan na. ²⁴ Alu ka a mira ka a lafili kɔlɔn do kɔndɔ. Kɔlɔn wo jani le tere, ji tun te a kɔndɔ. ²⁵ Alu siini tere damununna tuma men na, alu ka alu ja lɔ ka jula doilu tamintɔla la yen. Woilu tere ye Isumayila bɔnsɔn de ri. Alu bɔtɔ Kiliyadi ka wa Misiran. Wusulan ni tulu suma duman ni latikɔlɔn tere ye alu la nɔɔmeilu la donin dɔ.

²⁶ Yahuda ka a fɔ a badenmailu yε ko: «Ni an ka an dooce faa ka a dokon, an di tɔnɔ su juman sɔrɔn wo la? ²⁷ An ye a san Isumayila bɔnsɔn julailu ma. An jere kana a faa. An dooce le. An bεε ye badenma le ri.» A badenmailu sɔnda wo ma.

²⁸ Wo rɔ, Madiyan bɔnsɔn julailu tamintɔla, Yusufu kɔrɔceilu ka a layeļe kɔlɔn kɔndɔ, ka a san Isumayila bɔnsɔn woilu ma wodigbe muwan na. Woilu ka a san ka wa a ri Misiran.

²⁹ Nba, Ruben nara kɔlɔn da la alu kɔfe, kɔni a ma Yusufu tereṇ kɔlɔn kɔndɔ. Wo gbara a la

kojuuya foo a ka a la duruki rafarafara. ³⁰ A wara a dooceilu t̄erēn ye ka a fō alu yē ko: «Kanberen t̄e kōlōn kōndō ye butun! N ye wala di?»

³¹ Wo rō, alu ka baakorōn do faa ka Yusufu la durukiba ta ka a bila wo jeli rō. ³² Alu wara durukiba di alu fa ma ka a fō ko: «An ka durukiba nin t̄erēn wula rō. I ye a ragbē ni i dence ta le.»

³³ Yakuba ma fili a ma. A kan ko: «N dence la duruki le jō. Wara juu ra a faa ka a damun. Eε, n dence Yusufu! Wara ra a rafarafara.»

³⁴ Yakuba ka a la duruki rafarafara jusukasi kosōn, ka landa faanin bila a kan na ikomin landa faanin. A ka tele siyaman ke kasila kojuuya a dence la saya ko rō. ³⁵ A denceilu ni a denmusoilu t̄erē ye nala ko alu ye alu fa jusu sumala. Kōni a ma sōn a jusu suma ko ma. A kan ko: «N kasimantō ri to n dence la ko la haan n di faa.» Yusufu fa kasira ten de a la saya ko rō.

³⁶ Nba, Madiyan bōnsōn julailu sera Misiran ka Yusufu san Ferawuna n̄emōo Potifari ma. Potifari t̄erē Ferawuna la kandalilailu la kuntii le ri.

38

Yahuda ni Tamari la ko

¹ Nba, a ma mēn bake, Yahuda bōra a baden-mailu t̄ema, ka wa a sii Adulamuka do t̄or̄fe mēn t̄ōo ko Hira. ² Yahuda ka Kanaan bōnsōn sunkurun do yen ye, mēn fa t̄ōo ko Suwa. A ka sunkurun wo furu. Alu denda. ³ Muso ka kōnō ta ka dence sōrōn Yahuda yē. Yahuda ka den wo t̄ōo la ko Eri. ⁴ A ka kōnō gbere ta, ka dence sōrōn. A ka wo t̄ōo la ko Onan. ⁵ A ka kōnō gbere ta ikō tuun ni, ka dence sōrōn. A ka wo t̄ōo la ko Sela. Den wo sōrōnda ka Yahuda t̄erēn Akēsibū so kōndō.

6 Waati wo taminni kɔ, Yahuda ka muso do furu Eri yε, a dence fɔlɔ kɔnin. Muso wo tɔɔ le tere ko Tamari. **7** Koni, Eri kera mɔɔ juu le ri Allabatala jana. Wo rɔ, Allabatala ka a faa.

8 Yahuda ka a fɔ a dence Onan yε ko: «I ye i numɔɔmuso ta, i kɔrɔce muso kɔnin. Ai ye dɛn, sa den di sɔrɔn i kɔrɔce yε, sa i kɔrɔce bɔnsɔn kana tunun.»

9 Koni Onan ka a yen ko ni den wo sɔrɔnda, a te jate ale ta ri, fo a kɔrɔce ta ri. Wo rɔ, Onan ni muso wo wa dɛn, a te sɔnna a siji ye don a rɔ. A ri wo bεε ke duu ma, kosa a kana bɔnsɔn di a kɔrɔce ma. **10** Onan tere ye men kela, wo ma diya Allabatala yε. Wo rɔ, Allabatala ka ale fanan faa.

11 Yahuda ka a fɔ Tamari yε ko: «I kana sii cε gberε kun. I wa, to i fa wara fo n dence Sela wa se i furu ma.» Yahuda ka wo fɔ ka a masɔrɔn a silanni ka Tamari di Sela ma, baa Sela kana faa ikomin a kɔrɔce ilu faara ja men ma. Tamari wara a fa wara wo rɔ.

12 Waati wo taminni kɔ, Yahuda muso sara, Suwa denmuso kɔnin. Yahuda la jusukasi sumara tuma men na, a wara Timaha, mɔɔilu tere ye a la saailu si malila dinkira men dɔ. A duŋɔɔncε Adulamuka Hira wara a fe. **13** A fɔra Tamari yε ko a birance Yahuda watɔ a la saailu si mali diya Timaha. **14** Tamari ka a lɔn ko a numɔɔce Sela ra se furu ma, kɔni a birance Yahuda ma sɔn a ye sii wo kun. Wo rɔ, Tamari ka a la landa faanin bɔ a fari ma, ka a la bitiran birin a kun na, ka a ja latunun. A wara ka a sii a jere ma Enayimu so donda la, Timaha sila la ye.

15 Yahuda tamintɔ ka Tamari siini yen. A ka a jate jatɔmuso le ri, ka a masɔrɔn Tamari tun da a

na matunun. ¹⁶ Yahuda filira a ma fewu! A ma a lən ko a biranmuso le. A wara a fɔ a yε ko: «N ye a fe ka n la i fε.» Tamari kan ko: «Ni n dijera, i ri nfen di n ma?» ¹⁷ Yahuda ka a jabi: «N di badenni kelen bɔ n na bailu rɔ ka a lana i ma.» Tamari kan ko: «I ri nfen bila a kun kɔrɔ sani i ye ba lana n ma?» ¹⁸ Yahuda kan ko: «N ye nfen di i ma?» Tamari ka a jabi: «I tɔɔ tɔ̃masere ye fen mɛn kan, i ye wo ni a julu di n ma, ka i la gbeleke la woilu kan.» Yahuda ka wo bεe di a ma. Alu dɛnda. Wo rɔ, Tamari ka kɔnɔ ta Yahuda fe. ¹⁹ Tamari ka a kɔseyi a wara. A ka bitiran bɔ a kun na ka a la landa faanin bila a kan na ikɔ.

²⁰ Yahuda ka badenni lawa muso ma a dujɔɔnce Adulamuka bolo, kosa a ka fen mɛnilu di muso ma, a dujɔɔnce ye woilu mira ka na. Cε wo wara, kɔni a ma muso yen. ²¹ A ka cε doilu majininka Enayimu ko: «Jatɔmuso mɛn tɛrε ye a siila sila la yan so donda la, a ye mi?»

Alu ka a jabi: «An ma jatɔmuso si yen yan fɔlɔ.»

²² Cε ka a kɔseyi ka a fɔ Yahuda yε ko: «N ma muso wo tɛrɛn ye. Ye cɔ̃ilu kan ko alu ma jatɔmuso si yen ye fɔlɔ.» ²³ Yahuda kan ko: «Baasi tε wo ri. Fen woilu ye to a bolo. An kana an jɛrε lamaloya a nininna. Kɔni n ka baden nawa a ma. Ni i ma a yen, a ma ban?» ²⁴ Nba, karo sawa taminni kɔ rɔ, a fɔra Yahuda yε ko a biranmuso Tamari ra jatɔya kε. Ko sisen, ko a ra kɔnɔ ta. Yahuda ka kuma wo mɛn tuma mɛn na, a kan ko: «Ai ye wa a labɔ kɛnɛma ka a janin!»

²⁵ Mɔɔilu wara Tamari mira. Alu ye a labɔla kɛnɛma tuma mɛn na, a ka kela lawa a birance ma ko: «Mɛn ka kɔnɔ la n na, a la fenilu le jin di. I ye

tɔɔmasere fen jin ni a julu ragbɛ, ka gbeleke fanan dagbɛ ni i ka woilu tii lɔn.»

²⁶ Yahuda ka wo fenilu ragbɛ ka a yen ko a ta le. A kan ko: «Muso jin telenni ka tamin nde la, baa n tun ka kan ka a di n dencɛ Sela le ma ka a kɛ a muso ri, kɔni n ma sɔn wo ma.» Yahuda ma a la Tamari fɛ wo kɔ.

²⁷ Nba, a moyi waati sera tuma mɛn na, den kera filani ri. ²⁸ A moyitɔla, den kelen ka a bolo labɔ. Tinkɔrɔsilali ka a bolo mira ka kari wulen do sidi a la ka a fɔ ko: «Nin de ye fɔlɔ ri.» ²⁹ Kɔni den ka a bolo ladon ikɔ tuunni. A filani-jnɔɔn bɔra. Tinkɔrɔsilali le kan ko: «Ile le ra sila bɔ jɔ!» Wo rɔ, a ka wo tɔɔ la ko Pɛresi*.

³⁰ A doomanin bɔra a kɔ, kari wulen sidini wo bolo la. Alu ka wo tɔɔ la ko Seraki†.

39

Yusufu sanda Potifari ma

¹ Nba, Isumayila bɔnsɔn jula woilu wara Yusufu ri Misiran ka a san Ferawuna la jɛmɔɔ Potifari ma. Potifari tɛrɛ mansa la kandalilailu la kuntii le ri. ² Allabatala tora Yusufu fɛ ka a la ko bɛɛ sabati. A tɛrɛ ye baarala a tii Potifari la bon na, Misiranka wo kɔnin.

³ A tii ka a yen ko Allabatala ye Yusufu fɛ ko bɛɛ rɔ, baa a wa a bolo bila fen fen dɔ, Allabatala di wo bɛɛ sabati. ⁴ Yusufu diyara a tii yɛ. Wo rɔ, a ka Yusufu kɛ a jɛrɛ dɛmɛnba ri, ka a lasii a la mɔɔilu bɛɛ kun na, ka a kɛ a la nanfulu kunnasiiba ri. ⁵ Kɛbi Misiranka cɛ wo ka Yusufu lasii a la nanfulu ni a la mɔɔ bɛɛ kun na, Allabatala ka jumaya kɛ a

* ^{38:29} Pɛresi kɔrɔ ye le ko a gberenda † ^{38:30} Seraki kɔrɔ ye le ko kari wulen

yε ka ko bεε sabati a wara ka a masərən Yusufu la ko rɔ. Allabatala ka Potifari bolofen bεε ɲumaya, mənilu ye so kəndo, a ni mənilu ye sənə rɔ.

⁶ Potifari ka a la ko bεε to Yusufu bolo. A ma a jere tɔrɔ foyi la fo a tere ye mənilu damunna.

Yusufu tere ye kanberen kəjanin de ri. A fari dafanin a kan. A ɲada fanan kəni.

Potifari muso ɲabɔra Yusufu la

⁷ Lon do rɔ, Potifari muso ɲabɔra Yusufu la. A ka a fɔ Yusufu yε ko: «Na, i la n fε.» ⁸ Yusufu ma sən fewu. A ka a fɔ muso wo yε ko: «I ja lɔ. N tii tε a jere tɔrɔla foyi la a wara yan ka a masərən n ye yan. A ra a bolofen bεε karifa n na.» ⁹ A la fanka ni n ta bεε ka kan a wara yan. N sawo ye fen bεε rɔ lu ma yan fo ile, baa i ye a muso le ri. N ti se kojuu su wo kəla, ka haramu kε Alla ɲana.» ¹⁰ Hali wo, muso wo ma a boloka wo si rɔ. Lon lon a tere ye Yusufu madiyala, kəni Yusufu ma sən ka i la a fε.

¹¹ Lon do rɔ, Yusufu wara baara diya bon na. Wo ka a tereñ bonkəndo jən si tun tε ye. ¹² Muso ka Yusufu mira a la duruki ma, ko a ye a la a fε. Kəni Yusufu ka a bori a yε ka bɔ bon na ka a la duruki to muso bolo.

¹³ Muso ka a yen tuma mən na ko Yusufu borimantsɔ ra bɔ bon na ka a la duruki to a bolo, ¹⁴ a ka a kan nabɔ bonkəndo jənilu ma. Woilu nani, a ka a fɔ alu yε ko: «Ai la ragbe. N cε ka Heburu cε mən nana an ma, wo ra an dooya. A ra don n kan ko a ye i lala n fε. Kəni n kulera fanka la.» ¹⁵ A ka n kule kan mən tuma mən na, a borimantsɔ bɔra bon na ka a la duruki to n dafε yan.»

¹⁶ Muso ka duruki wo lamara a dafε ka Yusufu tii Potifari makənɔ. ¹⁷ Wo nani, muso ka dantεeli

bεε kε a cε yε ja kelen wo ma ko: «I ka Heburu jønce mεn nana an ma, wo ra don n kan ka n dooya. ¹⁸ Køni n kulera tuma mεn na, a borimantø børa bon na ka a la duruki to n dafε yan.»

¹⁹ Nba, a ka a muso la kuma mεn Yusufu la ko rø tuma mεn na, a jusu børa kojuuya. ²⁰ Wo rø, a wara Yusufu mira ka a bila kaso la, mansa la kasodeni bilani dinkira mεn. Yusufu tora kaso la ye.

²¹ Køni Allabatala tora Yusufu fε. A ka jnumaya kε Yusufu yε. Wo rø, a ka Yusufu dεmen ka a la ko diya kaso bon kuntii yε. ²² Wo rø, kaso bon kuntii ka Yusufu lasii kasoden tø bεε kun nø kaso bon na. Yusufu le tεre ko bεε jnanabøla ye. ²³ Kasobon kuntii ka ko mεn bεε to Yusufu bolo, a ma hamin wo si la butun baa Allabatala tεre ye Yusufu fε. A ka fen fen kε, Allabatala ka wo bεε sabati.

40

Yusufu ka siboilu kørø fo

¹ Waati wo taminni kø, Misiran mansa la minninfendila ni a la burugbasila ka kojuu do kε a la. ² Ferawuna jusu børa møøba fila woilu kanma, a la minninfendilailu la kuntii ni a la burugbasilailu la kuntii kønin. ³ A ka alu mira ka alu bila kaso la, Yusufu bilani dinkira mεn dø. Kaso wo tεre ye kasoden kandalila kundiiba la bon dafε. ⁴ Kasoden kandalila kundiiba ka alu karifa Yusufu la, ko a ye kε alu dεmenba ri. Alu mεnda kaso la.

⁵ Lon do rø, mansa la minninfendila ni a la burugbasila sibora su rø. Wo ka a tεren alu ye kaso la følø. Alu fila sibora, køni sibo kelen tun tε. Alu kørøilu tun tε kelen di fanan. ⁶ Wo duusa gbe, Yusufu ka a yen ko hamin ba ye alu la. ⁷ A ka mansa la jømøø majininka ko: «Nfen kεni ai

sewani tε bi?» ⁸ Alu ka a jabi: «An fila ra sibo, koni mɔɔ te yan men di sibo woilu kɔrɔilu fɔ an yε.» Yusufu kan ko: «Sibo kɔrɔ lɔnba te Alla le ri wa? Ai ka menilu yen sibo rɔ, ai ye woilu jnafɔ n yε.»

⁹ Wo rɔ, mansa la minninfendilailu la kuntii ka men yen, a ka wo fɔ Yusufu yε. A kan ko: «N siboni le, n ka resenju do yen n jnε. ¹⁰ Bolo sawa ye a la. A fira wa bɔ damira, a ri a feren ka den ka ke resen mɔninalu ri i kɔrɔ. ¹¹ Misiran mansa la minninfen tere ye n bolo. Wo rɔ, n ka resen mɔni woilu kadi, ka alu rabirin mansa la minninfen kɔndo, ka a di a ma.»

¹² Yusufu kan ko: «Wo kɔrɔ le jnif di. Bolo sawa wo ye tele sawa le ri. ¹³ Tele sawa wa tamin, mansa ri i bɔ kasol, ka i bila i la baara kɔrɔ la. I ri a la minninfen don a bolo iko i darini a kela ja men ma kɔrɔman. ¹⁴ I wa hεre wo sɔrɔn tuma men na, i jaandi, i kana jnina n kɔ. I ka kan ka jnumaya ke n yε baa n ka i dεmen. I ye n na ko fɔ Ferawuna yε wo rɔ, kosa a ri n nabɔ kasol, ¹⁵ baa mɔɔilu ka n mira fanka le la ka n nabɔ Heburu ilu la jamana rɔ. Kebi alu ka n nana yan, n ma kojuu ke, mɔɔ ri mɔɔ bila kasol ka men dɔ.»

¹⁶ Nba, burugbasilailu la kuntii ka a yen ko Yusufu ka a duŋɔɔnce la sibo kɔrɔ fɔ ka a diya. Wo rɔ, ale ka a fɔ Yusufu yε ko: «N fanan sibora. N ka seye sawa yen n kun ma. ¹⁷ Seye men tere ye sanfe, buru su bee tere ye wo kɔndo. Wo bee rabenni tere Ferawuna yε, koni kɔnɔilu tere ye jiila a ma ka fen woilu damun seye kɔndo n kun dɔ ma.» ¹⁸ Yusufu kan ko: «Sibo wo kɔrɔ le jnif di. Seye sawa wo fanan ye tele sawa le ri. ¹⁹ Tele sawa wa tamin, Ferawuna ri i bɔ kasol, ka i kun tee a la ka i suu dun jiri la. Kɔnɔilu ri na i sobo damun.»

²⁰ Nba, tele fila a sawana, wo kera Ferawuna sɔrɔn lon sankunben tonon di. Wo rɔ, Ferawuna ka tibili ba ke a la jamana mɔɔbailu ye. A ka minninfendilailu la kuntii ni burugbasilailu la kuntii labɔ kaso la ka alu lana mɔɔbailu bεε jana. ²¹ A ka minninfendilailu kuntii bila a la baara kɔrɔ la, kosa a ri Ferawuna la minninfen don a bolo ikɔ. ²² Koni Ferawuna ka burugbasilailu la kuntii wo dun jiri la iko Yusufu ka a fɔɔna men ma.

²³ Minninfendilailu la kuntii ma a miri Yusufu ma wo kɔ. A jinara a kɔ fewu.

41

Misiran mansa la siboilu

¹ San fila taminnin kɔ rɔ, Misiran mansa sibora ka a jere lɔni yen Nili ba dala. ² A lɔnin tora ye tuma men na, nisi tɔlɔni wɔrɔnwula bɔra ji rɔ ka na bin damun diya ba dala. ³ A ma men bakε, nisi barani wɔrɔnwula fanan bɔra Nili ba ji rɔ. Woilu nara alu lɔ nisi tɔlɔni woilu tɔrɔfe ba dala. ⁴ Nisi barani kojuuyani woilu ka nisi juma tɔlɔni wɔrɔnwula woilu damun ka ban. Wo keni, mansa kunura sunɔɔ rɔ.

⁵ A sunɔɔra ikɔ ka sibo gberε fanan la. A ka sumantɔnsɔn wɔrɔnwula yen. Wo bεε bɔni sumangbala kelen de la. Alu kise bεε kunba. Alu ka ji. ⁶ A ma men bakε, sumantɔnsɔn wɔrɔnwula gberε bɔra. Woilu kise misenman. Alu keni iko fɔŋɔ ba wa suman janfɔ a gban na. ⁷ Sumantɔnsɔn menilu kiseni misenman, woilu ka suman juma wɔrɔnwula woilu damun, menilu kise kunba. Wo keni, mansa kunura ka a yen ko sibo le tεε.

⁸ Wo duu sa gbəni, mansa jusumakasara. Wo rɔ, a ka Misiran jamana fələlilailu bəε ni a hankili-mailu bəε kili. A ka mən yen sibo rɔ, a ka wo jnafə alu yε, kəni wo si ma se ka a la sibo kərə fə a yε.
⁹ A la minninfendilailu la kuntii kumara a yε ko: «Mansa, n hankili ra bila n na kojuu kəni rɔ sisen.
¹⁰ I mənəra an, i la jənilu ma tuma mən na wo lon, i ka nde ni i la burugbasilailu la kuntii bila kaso la kasoden kandalila kuntiiba la jnala kaso la. ¹¹ An məɔ fila bəε sibora su kelen dɔ. Sibo woilu kərəilu tun tə kelen di. ¹² Heburu kanberen do tərə ye an fə kaso la. Kasoden kandalila kuntiiba la jən de tərə. An məɔ fila ka mən yen sibo rɔ, an ka wo jnafə a yε. A ka woilu kərəilu fə an yε. ¹³ A ka a kərə mən fə, a kəra wo ja le ma! I ka nde laseyi n na baara kərə la, ka ban ka burugbasilailu la kuntii dun jiri la.»

Yusufu ka Misiran mansa la sibo kərə fə

¹⁴ Mansa ka kela lawa ko Yusufu ye na. Məɔilu borimantɔ wara Yusufu labə kaso la. Yusufu ka a bonbosi li ka a la faanin mayəleman, ka wa i lɔ Misiran mansa jakərɔ. ¹⁵ A seni ye, mansa ka a fə a yε ko: «N da sibo le kε. Məɔ si ma se ka wo kərə fə n yε. A fəra n yε ko i ri se sibo kərə fəla.» ¹⁶ Yusufu ka mansa jabi: «Mansa, nde ti se, kəni Alla ri a kərə numa di i ma.»

¹⁷ Mansa ka a fə a yε ko: «N sibora ka n ləni yen Nili ba dala. ¹⁸ N ləni tora ye tuma mən na, nisi wərənwula bəra ji rɔ ka na bin damun diya ba dala. Alu ka jni kosebe. Alu tələni. ¹⁹ A ma mən, nisi wərənwula gbərə fanan bəra ji rɔ. Woilu barani tərə kojuuya. Alu kəjuuyani ka tamin. Sobo jənjən tun tə alu la. N tun ma nisi gbərə kəjuuyani woilu

jooñ yen fôlô munun Misiran jamana muumë rø yan. ²⁰ Nisi barani woilu, menilu kejuuyani kõnin, woilu ka nisi tõlõni wõrõnwula wo damun, menilu fôlôma bôra ji rø. ²¹ Hali alu ka woilu damun, mœti se wo lõn na, ka a masorõn alu fari barani tere na men ma fôlô, a ye ja kelen wo ma munun. Wo keni, n kunura sunoñ rø. ²² N sunoñra iko ka sibo. N ka sumantõnsõn numa wõrõnwula yen. Woilu bõni sumangban kelen de la. Alu bee kise kunba. ²³ A ma men bake, sumantõnsõn wõrõnwula gberë bôra. Woilu tun kiseni te jõnjõn. Alu bee kise misenman. Alu keni iko fõjõ ba wa suman janfõ a gban na. ²⁴ Sumantõnsõn misenman woilu ka Sumantõnsõn numa wõrõnwula wo damun. Nba, n ka wo bee fõn na felelilailu yε, kõni woilu si ma se wo kõrõ fôla n yε.»

²⁵ Yusufu ka a fõ mansa yε ko: «I la sibo fila bee ye kõrõ kelen de ri. Alla natõ men kela, a ra wo le yiraka i la. ²⁶ Nisi numa wõrõnwula wo misaliya ye san wõrõnwula le ri. Sumantõnsõn numa wõrõnwula wo fanan misaliya ye san wõrõnwula le ri. Sibo fila wo bee ye kõrõ kelen de ri. ²⁷ Nisi barani kejuuyani wõrõnwula men bôra ji rø kõfe, wo ye san wõrõnwula le ri. Sumantõnsõn misenman wõrõnwula wo, fõjõ ka menilu ja, wo fanan ye san wõrõnwula kõnkõ le ri. ²⁸ Mansa, n ka a fõ i yε ja men ma, a ye wo ja le ma. Alla ketõ men kela, a ra wo le yiraka i la. ²⁹ San wõrõnwula menilu natõ, suman di sõn a ja jere jere ma Misiran jamana fan bee rø. ³⁰ San woilu wa tamin, kõnkõ ri na ka san wõrõnwula ke. Mœilu ka suman ba men sõrõn san diyani wõrõnwula woilu kõrõ, alu ri jina wo bee ko, kõnkõ ri juuya jamana bee rø. ³¹ Kõnkõ

ri juuya kosebe. Mœilu ka suman men sœron san diyani wœrnwula wo rœ, wo bœe rijina alu la fewu. ³² Mansa, i ka sibo jin ke sjna fila. Wo kœrœ le ko Alla ra ban wo ko latee la. Alla ri wo ke lakaliyali bolo ma.

³³ «Wo rœ, mansa, i ye mœ hankiliman do jinin, men ka ko kœrœ lœn, ka wo lasii Misiran jamana kun na. ³⁴ I ye mœba doilu lasii jamana kœndœ, sa mœ woilu wa suman men sœron, mœba woilu ye a tala looluna lamara. Alu ye a ke wo ja jamana fan bœe rœ san diyani wœrnwula bœe kœrœ. ³⁵ I ye a fœ alu ye ko ie ye suman woilu bœe laden wo ja le ma san woilu kœrœ, ka wo bœe laden jamana soilu la i tœ rœ ka a kœnogben. ³⁶ Sa san wœrnwula kœnkœ ba don Misiran jamana rœ tuma men na, suman lamarani woilu ri ke jamana mœilu la balo ri.»

Misiran mansa ka Yusufu lasii jamana kun na

³⁷ Yusufu ka men fœ, wo diyara Misiran mansa ni a la jœmœilu bœe ye. ³⁸ Mansa ka a fœ a la jœmœilu ye ko: «An di mœ sœron Misiran yan, Alla la Nin ye men dœ ikomin ce jin?»

³⁹ Mansa ka a fœ Yusufu ye ko: «Alla ra wo bœe yiraka i la. Wo rœ, mœ si te yan, men hankili ka bon i ta ri, men ka ko kœrœ lœn ile ri. ⁴⁰ N di i lasii n na jamana kun na. I ba men fœ, n na mœilu ri wo ke. Mansaya dœrœn de ri ke i ni nde tœma. ⁴¹ N da i lasii Misiran jamana bœe kun na.»

⁴² Mansa ka a la bolola koyini bœ a bolo la, a la mansaya tœmasere ye men kan, ka wo don Yusufu bolo la. A ka faanin jumajuma di a ma, ka kanna nee saninnaman bila a kan na. ⁴³ A ka a la sowontoro filana don Yusufu bolo. Mœilu

wara sowontoro wo je ka alu kan nabo ko: «Bee ye alu majii!» Misiran mansa ka Yusufu lasii Misiran jamana bee kun na wo ja le ma.

⁴⁴ Mansa ka a fo Yusufu ye ko: «Nde le Misiran mansa ri, koni moo ilu kana foyi ke Misiran jamana ro butun fo ile wa son men ma.» ⁴⁵ Mansa ka Yusufu too la ko Safinati Paneya, ka Potifera denmuso Asanati di a ma ka a ke a muso ri. Potifera wo tere ye Oni so moo ilu la joo sarakalasela le ri.

Nba, Yusufu kera Misiran jamana kunnasiila ri wo ja le ma. ⁴⁶ A ka baara wo damira Ferawuna ye ka a teren a soron da san bisawa bo. A bora mansa dafe, ka wa Misiran jamana rataama.

⁴⁷ Awa, san woronwula kera, suman ye sonna a ja jere jere ma. ⁴⁸ San san, Yusufu ri suman naden suman ka waati la Misiran jamana fan bee ro a so misen a ni a so kunba. Suman kanin yoro yoro a ka suman namara wo yoro kelen de bee ro. ⁴⁹ Wo ro, Yusufu ti se a jatela butun baa a tere ka siya kojuuya ikomin ba kije.

⁵⁰ Sani san woronwula konko ye don jamana kondo, Yusufu muso Asanati ka dence fila soron a ye. Asanati wo tere ye Oni so moo ilu la joo sarakalasela Potifera denmuso le ri. ⁵¹ Yusufu ka a dence folo too la ko Manase, baa a kan ko Alla ra a lajina a la toroya bee ko ro, ka a hankili bo a fa wara ro.

⁵² A ka a dence filana too la ko Efirayimu, baa a kan ko Alla ka a ke, a toroni tere jamana men do, a ra jiri ye.

⁵³ San diyani woronwula wo dafara Misiran tuma men na, ⁵⁴ san woronwula konko donda iko Yusufu ka a fo ja men ma. Konko donda jamana gberilu bee ro, koni suman namarani tere fan bee

rɔ Misiran. ⁵⁵ Kɔnkɔ sera Misirankailu ma tuma mɛn na, alu wara Misiran mansa madiya ko a ye suman di alu ma. Mansa ka alu jabi: «Ai ye wa Yusufu tərən ye. A wa mɛn fɔ ai yε, ai ye wo kε.» ⁵⁶ Kɔnkɔ juuyara ka se Misiran jamana yɔrɔ bεε rɔ, tuma mɛn na, Yusufu ka suman namara bondonilu da laka, ka suman san Misirankailu ma. ⁵⁷ Mɔɔilu bɔra jamana bεε rɔ ka na suman san diya Yusufu ma Misiran, baa kɔnkɔ gbεleyara dununa fan bεε rɔ.

42

Yusufu kɔrɔceilu wara suman san diya Misiran

¹ Nba, a fɔra Yakuba yε ko suman ye sɔrɔnna Misiran tuma mɛnna, a ka a fɔ a denceilu yε ko: «Nfenna ai siini ai jnɔɔn dagbela yan ten? ² N da a mɛn ko suman ye sɔrɔnna Misiran. Ai ye wa do san an yε, sa an kana faa kɔnkɔ bolo yan.» ³ Wo rɔ, Yusufu kɔrɔceilu mɔɔ tan wulira ka wa suman san diya Misiran, ⁴ kɔni Yakuba ma sɔn Yusufu dooce Beniyaminu ye wa a kɔrɔceilu kɔfε, baa Yakuba silanni tere ko kojuu kana a sɔrɔn sila la.

⁵ Isirayeli denceilu ni mɔɔ gbereilu wara suman san diya Misiran, baa kɔnkɔ tere ye Kanaan bɔnsɔn na jamana rɔ. ⁶ Wo ka a tere, Yusufu ye jamana kuntiiya la Misiran. Ale le tere suman sanna mɔɔ bεε ma. Wo le ka a kε, a kɔrɔceilu nara Yusufu ma, ka alu majii a kɔrɔ, ka alu kun majii. ⁷ Yusufu ka a kɔrɔceilu yen tuma mɛn na, a ma fili alu ma, kɔni a ka a kε ikomin a ma alu lɔn. A jamanda alu ma ka a fɔ ko: «Ai bɔni mi?» Alu ka a jabi: «An bɔni Kanaan bɔnsɔn na jamana le rɔ, ka na suman jinjin diya yan.»

⁸ Yusufu ma fili a kɔrɔceilu ma, kɔni woilu filira ale ma. ⁹ Yusufu hankili bilara a la siboilu rɔ, a ka a kɔrɔceilu yen sibo rɔ na mɛn ma. A ka a fɔ alu yε ko: «Ai nani jamana lakɔrɔsi diya le, sa ai ri a lɔn ai ri se an na na mɛn ma.» ¹⁰ Alu ka a jabi: «An tii, wo kuma tε! Ande, i la jɔnilu nani suman san diya le dɔrɔn. ¹¹ An bεε ye cε kelen den de ri. Mɔɔ telenilu le ande ri. An tε jamana si lakɔrɔsila.» ¹² Yusufu kan ko «ɛɛn de! Ai nani jamana lakɔrɔsi diya le.» ¹³ Alu kan ko: «An ye i la jɔnilu le ri. An bεε ye fa kelen de la. An fa siini Kanaan bɔnsɔn na jamana le rɔ. A denceilu tεre mɔɔ tan ni fila le ri. An dooce ye an fa dafε ye bi. A tɔ kelen da sa.» ¹⁴ Yusufu kan ko: «N ka a fɔ na mɛn ma, a ye wo na kelen de ma jɔ! Ai nani jamana lakɔrɔsi diya le! ¹⁵ N di alu la kuma fesefesε ja mɛn ma, wo le ye jin di. Ni ai dooce doomani ma na yan, ai te bɔ yan fewu. N ye n kali la wo la Misiran mansa tɔɔ le rɔ. ¹⁶ Ai mɔɔ kelen ye wa ai dooce ta ka na a ri. Ai tɔilu ri wo makɔnɔ kasol yan. Wo rɔ, n di ai la kuma fesefesε. Ni ai ka tuja le fɔ, n di wo lɔn. Ni wo tε, ai ma na foyi kanma, fo ka an na jamana lakɔrɔsi dɔrɔn. N ye n kalila wo rɔ Misiran mansa tɔɔ le rɔ!»

¹⁷ Wo rɔ, a ka alu bila kasol yan. Alu ka tele sawa ke ye.

¹⁸ A tele sawana, Yusufu ka a fɔ alu yε ko: «Nba, n silanni Alla yε. Wo rɔ, n ye mɛn fɔla ai yε, ai ye wo mira, sa ai ri kisi. ¹⁹ Ni mɔɔ telenilu le ai ri, mɔɔ kelen ye to kasol yan ai bεε nɔ rɔ. Ai tɔilu ye wa suman di ai la denbaya kɔnkɔto ma, ²⁰ kɔni a fεrε tε fo ai ye na ai dooce doomani ri yan. A wa na, n di a lɔn ko ai ka tuja le fɔ n yε, sa ai kana faa.» Alu sɔnda wo ma.

²¹ Alu ka a fō i jōōn ye ko: «Sika tē a rō, tōrōya jin da an sōrōn Yusufu le kosōn. Wo lon, a tōrōra an nakōrō. A ka an madiya ko an ye hina a la, kōni an ka an ban a rō. Wo le kosōn kojuu jin da an sōrōn bi.»

²² Rubēn ka a fō alu ye ko: «N ma a fō ai ye ko ai kana kojuu kē den na wa, kōni ai ma sōn n na kuma ma? Nba, a jeli jininkali le jin ka a hake bō an dō.»

²³ Alu ma a lōn ko Yusufu tolo ye alu kan na, baa alu ni Yusufu wa kuma, kan nataminna ri alu kan natamin i jōōn ma. ²⁴ Yusufu ka a mabō alu la ka wa kasi. A kōseyi mēn kēni, a kumara alu ye, ka ban ka Simeyōn bō alu rō ka a bolo sidi alu jana.

Yusufu kōrōceilu ka i kōseyi Kanaan bōnsōn na jamana rō

²⁵ Yusufu ka a fō a la mōailu ye ko alu ye a kōrōceilu la bōrōilu lafa suman na, ka alu kelen kelenna bēe la wodi bila ei la bōrō woilu kōndō, ka suman fanan di alu ma ka a kē ei sila fanda ri. Alu ka wo bēe kē ikomin Yusufu ka a fō ja mēn ma. ²⁶ Alu ka bōrōilu la alu la falilu kō kan, ka sila mira ka wa.

²⁷ Su kora alu ma tuma mēn na, alu ka alu lō yōrō do rō ka sii ye. Mōo kelen ka a la bōrō da laka ko a ye damunun dila a la fali ma. A ka a la wodi yen bōrō kōndo. ²⁸ A ka a fō a badenmailu ye ko: «N na wodi a ra laseyi n ma. A ye n na bōrō kōndō yan.» Alu kōndafilira kojuuya. Alu kōndakaliyara ka a fō alu jōōn ye ko: «Alla ra nfēn de kē an na jin de ten?»

²⁹ Nba, alu se mēn kēni alu fa Yakuba wara Kanaan bōnsōn na jamana rō, ko mēn ka alu sōrōn, alu ka wo bēe danteeli kē a ye. Alu kan ko: ³⁰ «Misiran jamana kuntii jamanda an ma kōsēbē!»

A ka an jalaki ko an wani alu la jamana lakɔrɔsi diya le. ³¹ An ka a jabi an ye mɔɔ telenilu le ri, ko an ma jamana si lakɔrɔsi fɔlɔ habadan. ³² An kan ko an bɛɛ ye fa kelen de la, ko an mɔɔ tan ni fila le tere an fa bolo. Ko kelen da sa. Ko an dooce doomani ye an fa dafɛ ye Kanaan bɔnsɔn na jamana rɔ, ³³ kɔni jamana kuntii wo kan ko a ri a lɔn ko an ye mɔɔ telenilu ri ja men ma, ko wo le ye jin di. Ko an ye mɔɔ kelen to a bolo ye, ka na suman di an wara mɔɔilu kɔnkɔto ma. ³⁴ Ko an ye wa an dooce doomani ri a ma. Wo wa kɛ, ko a ri a lɔn ko an ma wa jamana lakɔrɔsi kanma, ko a ri a lɔn ko an ye mɔɔ telenilu le ri, kosa a ri an badenma bɔ kaso la. Ko a ri jamana bɛɛ labila an ye.»

³⁵ Nba, alu ka suman nabɔ alu la bɔrɔilu kɔndɔ tuma men na, alu bɛɛ ka alu la wodi bila bɔrɔneilu sidini yen suman bɔrɔilu kɔndɔ. Alu ni alu fa ka wodi sidini wo yen tuma men na, alu bɛɛ silanda.

³⁶ Alu fa Yakuba ka a fɔ alu ye ko: «ɛɛ! Ai ye n denilu bɔla n bolo. Yusufu tɛ yan butun. Simeyɔn fanan tɛ yan butun. Sisen ai ye a fe ka Beniyaminu fanan mira ka wa wo ri. Nin tɔrɔya bɛɛ ye nde le kan.»

³⁷ Ruben ka a fɔ a fa ye ko: «I ye Beniyaminu karifa nde la. N di a laseyi i ma. Ni n ma na Beniyaminu ri, i ye n dence fila bɛɛ faa Beniyaminu nɔ rɔ.» ³⁸ Yakuba kan ko: «ɛɛn de! N dence tɛ wala ai kɔfɛ! A kɔrcɛ Yusufu ra sa ka wo kelen pe to. Sisen n da kɔrɔ. Ni ko ka ale fanan sɔrɔn taama rɔ, n di faa jusumakasa bolo.»

43

Yusufu kɔrcɛilu wara Misiran ikɔ

¹ Nba, kənkə juuyara jamana kəndə. ² Yakuba denceilu nara suman mən di ka bə Misiran, wo bantəla le tere. Wo rə, Yakuba ka a fə alu yε ko: «Ai ye wa suman do san an yε Misiran.»

³ A dence Yahuda ka a jabi: «Cε wo ka a fə an yε le ka a magbəleya kosebə ko an tə a yen butun fo an dooce wa ke an kəfε. ⁴ Ni i sənda an dooce Beniyaminu ye wa an kəfε, an di wa ka suman san i yε. ⁵ Ni i kənin ma sən, an tə wa ye, baa cε wo ka a fə an yε ko an tə a yen butun fo an dooce wa ke an kəfε.»

⁶ Isirayeli kan ko: «Ai ra kojuu ke n na de! Nfenna ai ka a fə cε wo ye ko ai dooce ye ai kəma?»

⁷ A denceilu ka a jabi: «Cε wo ka jininkali siyaman ke an kun, ka an majininka an na ko ma, a ni an na denbaya la ko ma. A kan ko: <Ai fa kəndε wa? Ai dooce ye ye?> An ka a jabi ten tuun. An ma wo lən ko a ri a fə an yε ko an ye wa an dooce ri.»

⁸ Yahuda ka a fə a fa Isirayeli yε ko: «N fa, i ye n dooce karifa n na, sa an di wa i kərə. Wo wa ke, kənkə te ile ni ande a ni an denilu faa yan. ⁹ Nde jere ri n lə den kunko la. Ni ko ka a sərən, i ye nde majininka. Ni n ma na a ri i ma, ka a lələ i jnəkərə, wo jalakili te bə n kan habadan. ¹⁰ Ni an kənin tun ma lanəə yan, sa an da wa ka na sija fila.»

¹¹ Alu fa Isirayeli kan ko: «Nba, diyagboya le. Wo rə, ai ye an na jamana fen jnuma doilu bila ai la bərəilu kəndə ka jamana kuntii wo sanba. Ai ye tulu do ta, a ni li ni wusulan ni latikələn ni jiriden doilu, pisitasi ni amande kənin. ¹² Ai wara wodi mən di fələ, ai ye wo jəən fila ta, baa wodi mən bilani tere ai la bərəilu kəndə, fo ai ye ai kəseyi wo ri. Ai ri a sərən, alu jninanin de. ¹³ Nba, ai ye ai

dooce ta ka wa ce wo t̄erēn ye sisen. ¹⁴ Alla Seb̄eetii ye ai la hina don a r̄o, kosa a ri Beniyaminu ni Simeyən naseyi ai ma, kōni ni n bōnōra n deni la, n di bōnō wo r̄o kosebe.»

¹⁵ Wo r̄o, alu ka Beniyaminu ta, a ni sanba fenilu, a ni wodi wo j̄ōon fila, ka sila mira ka wa Misiran. Alu se men k̄eni ye, alu wara Yusufu t̄or̄fe, ka alu l̄o a nak̄or̄. ¹⁶ Yusufu ka Beniyaminu yen alu fe tuma men na, a ka a f̄a a la bon kunnasiila ye ko: «Wa māo j̄inilu ri n na bon na, ka kolofen do faa ka a tibi. Alu ket̄o telero damunun k̄ela nde le fe bi.»

¹⁷ Ce wo ka alu malo Yusufu la bon na iko Yusufu ka a f̄a a ye ja men ma.

¹⁸ Alu wat̄la Yusufu la bon na, wo ka alu masilan. Alu kan ko: «An da lana yan wodi ko le r̄o, wodi men bilara an na b̄or̄ilu k̄ond̄o an na ko f̄olo r̄o. Alu ket̄o bela an kan de, ka an na falilu ta, ka an mira ka an ke j̄onilu ri.» ¹⁹ Wo r̄o, alu ka i madon Yusufu la bon kunnasiila la bonda la ka kuma a yε.

²⁰ Alu kan ko: «An fa, hake to an yε. Waati taminni, an nara suman san diya yan. ²¹ An b̄o men k̄eni yan, an ka an l̄o an sii diya. An ka an na b̄or̄ilu da laka ka wodi bilani yen b̄or̄ilu k̄ond̄o. An na wodi b̄εe le t̄ere, an ka men san suman na. Wodi wo nani an bolo ka a laseyi ai ma. ²² Suman sank̄o fanan nani an bolo, k̄oni men ka wodi do wo bila an na b̄or̄ilu r̄o wo lon, an ma wo l̄on.»

²³ Bon kunnasiila ka alu jabi: «Ai kana hamin wo la. Ai kana silan. Ai Maari Alla a ni ai fa Maari Alla, wo le ka wodi wo bila b̄or̄ilu k̄ond̄o ai yε. Ni wo t̄e, ai ka suman sank̄o men b̄o, n ka wo s̄or̄on.»

Wo r̄o, ce wo wara Simeyən ta ka na a di alu ma, ²⁴ ka alu b̄εe ladon Yusufu la bon na. A ka ji di alu ma ko alu ye alu sen mako. A ka damunun di alu

la falilu fanan ma. ²⁵ Alu nara sanba fen m̄enilu ri, alu ka woilu labɔ ka Yusufu makɔnɔ, baa a fɔra alu yε ko a ri na telero damunun diya alu fe ye.

²⁶ Yusufu sera a wara tuma m̄en na, alu nara a la sanbailu di a ma bon na ka alu majii a kɔrɔ. ²⁷ Yusufu ka alu fo ko: «Tana tε ai la? Wo lon, ai ka ai fa la ko fɔ n yε ko a ra kɔrɔya. Ale don? A kɛndɛ fɔlɔ?»

²⁸ Alu ka Yusufu jabi: «Tana si tε an fa la, i la jɔnce kɔnin. A kɛndɛ.» Alu ka alu kun majii Yusufu kɔrɔ.

²⁹ Yusufu ka a jaṇakalan ka a dooce Beniyaminu yen, a jere na la den. A kan ko: «Ai ka ai dooce m̄en na ko fɔ, wo le ye jin di wa?» Alu kan ko: «Oon, ale le.» Yusufu ka a fɔ a yε ko: «N den, Alla ma hεre kera i yε.»

³⁰ Beniyaminu hina donda Yusufu la kosebε. Wo rɔ, a kasitɔla le tere. A ka bɔ alu tɔrɔfe i kɔrɔ ka wa a jere la bon kɔndo ka kasi. ³¹ A ka ban kasila tuma m̄en na, a ka a ja lako, ka wa alu tereñ ye. A ka a jere mira ka a fɔ a la mɔɔilu yε ko alu ye na balo di alu ma. ³² Alu ka Yusufu la balo bɔ a la a dan na, ka a badenmailu ta bɔ a dan na. Misiranka m̄enilu tere ye, alu ka woilu fanan ta bɔ a dan na, baa Misirankailu ti sɔn ka damunun kε Heburuili fe. Alu tana le wo ri. ³³ Yusufu ka a badenmailu lasii a jaṇakɔrɔ, ka alu tuun i jɔɔn na ka ben alu si kasabiya ma, ka a damira kɔrɔmamɔɔ ma ka wa se doomamɔɔ ma. Alu ka alu sijna wo yen tuma m̄en na, alu ka i jɔɔn dagbε ka kabannakoya. ³⁴ Balo m̄en tere ye Yusufu kɔrɔ, a la mɔɔilu ka a badenmailu bεε sɔ wo le rɔ. Beniyaminu ka m̄en sɔrɔn, wo kera a kɔrɔcili ta jɔɔn loolu le ri. Alu ka damunun kε ka alu min, ka sewa Yusufu la kosebε.

44

Yusufu ka a kɔrɔcɛilu kɔrɔbɔ

¹ Nba Yusufu ka a fɔ a la bon kunnasiila yε ko: «Alu la bɔrɔilu lafa suman na. Alu la falilu di se donin mɛn kɔrɔ, i ye wo jate di alu ma. I wa bɔrɔilu lafa, i ye alu kelen kelenna bεε la wodi la suman kan alu la bɔrɔilu kɔndɔ. ²I ye n na wodigbε minninfen bila doomamɔɔ la bɔrɔ kɔndɔ a la wodi kan.» Bon kunnasiila ka wo bεε kε ikomin Yusufu ka a fɔ a ye ja mɛn ma.

³ Wo duu sa gbəni jona Yusufu ka sila di alu ma. Alu ka alu la dominilu la alu la falilu kɔ kan, ka wa. ⁴Ka a tɛren alu ma janfa so la fɔlɔ, Yusufu ka a fɔ a la bon kunnasiila yε ko: «Wa alu kɔ! I wa se alu ma tuma mɛn na, i ye a fɔ alu ye ko: ‘Nfenna ai ka kojuma sara kojuu la? ⁵Nfenna ai ka n tii la minninfen sonya? A ye a minna wo le la, a ye najinin kela wo le la. Ai ra kojuu ba le kε jin di de!»»

⁶ Bon kunnasiila wara se alu ma tuma mɛn na, a kumara alu yε ikomin Yusufu ka a fɔ a ye ja mɛn ma. ⁷Alu ka a jabi: «An tii, nfenna i ye an jalakila ten? An tε ko su wo kela fewu! ⁸I jεrε ka a lɔn ko an nani wodi ri an na bɔrɔilu kɔndɔ wo lon, ka bɔ Kanaan jamana rɔ ka na wodi wo di i ma. A ye di? An di wodigbε wala sanin sonya i tii la bon na wo rɔ wa? ⁹An tii, ni i ka minninfen yen an si kunma, wo tii ri faa. Ka a la wo kan fanan, an tɔilu ri kε i la jɔnilu ri.»

¹⁰ Bon kunnasiila kan ko: «Ale le wo ri, n da dijε wo ma, kɔni minninfen wa yen mɔɔ mɛn kunma, wo ri kε n na jɔn di. Ai tɔilu tε jalakili.»

11 Wo yɔrɔ wo rɔ, alu ka alu la bɔrɔilu lajii duu ma ka alu da laka. **12** Bon kunnasiila ka bɔrɔilu ragbe. A ka a damira kɔrɔmamɔɔ ta ma, ka wa se doomamɔɔilu ta ma. A ka minninfen yen Beniyaminu la bɔrɔ kɔndɔ.

13 Wo le rɔ, alu ka alu la durukilu rafara alu kan na jusukasi bolo ma. Alu ka alu la bɔrɔilu la falilu kɔ kan, ka alu kɔseyi so kɔndɔ. **14** Yahuda ni a badenmailu sera Yusufu wara ka a tereñ a ye ye fɔlɔ. Alu ka alu la duu ma a kɔrɔ. **15** Yusufu ka a fɔ alu ye ko: «Ai na nfen ko kela jin ten? Ai ma a lɔn ko nde jɔɔn di jañinin ke ka koilu lɔn wa?» **16** Yahuda kan ko: «N tii, an ti se foyi fɔla. Kuma tɛ an bolo butun. An ti se an bɔla ko jin dɔ. Alla jɛrɛ le ra an sonjuu labɔ gbe rɔ. An bɛe ye i la jɔnilu le ri sisen, minninfen yenni mɛn kunma, a ni an tɔilu bɛɛ.» **17** Yusufu ka a jabi kɔnin ko: «Ka alu bɛe jalaki ten, n tɛ ko su wo kela fewu! Minninfen yenni mɛn kunma, wo le kɛtɔ n na jɔn di. Ai tɔilu ye wa hɛrɛ rɔ ai fa wara.»

Yahuda ka Yusufu madiya Beniyaminu la ko rɔ

18 Yahuda ka a madon Yusufu la, ka a fɔ a ye ko: «N tii, i jaandi, i ye dijɛ n ye kuma i yɛ. N ka a lɔn ko i ni Misiran mansa bɛe ka kan. I kana mɔnɛ n ma. **19** N tii, an na ko fɔlɔ yan, i ka an mañininka an fa ni an badenmailu ma. **20** An ka i jabi an fa ye ye, ko a ra kɔrɔya kosebɛ. Ko an dooce doomani fanan ye ye, an fa kɔrɔyanin ka mɛn sɔrɔn. Doomamɔɔ wo kɔrɔcɛ ra faa, ka a kelen pe to. Dogberɛ tɛ ye butun, a ni mɛn ye na kelen na. A la ko duman an fa yɛ kosebɛ. **21** I ka a fɔ an yɛ ko an ye na a ri yan, kosa i na ri la a kan. **22** An ka a fɔ i yɛ wo lon ko den ti se bɔ la an fa tɔrɔfɛ. Ni a bɔra a tɔrɔfɛ an fa ri faa,

²³ kɔni, an tii, i ka an jabi ni an dooce ma na an kɔfε yan, ko an tε i yen butun.

²⁴ «Wo rɔ, an ka an kɔseyi an fa wara tuma mɛn na, an ka i la kuma lase a ma. ²⁵ Lon do rɔ, an fa ka a fɔ ko an ye na suman do san ikɔ. ²⁶ An ka a jabi an ti se nala suman san diya fo an dooce wa na an kɔfε, baa cε wo kan ko an tε a yen butun fo an dooce wa ke an kɔfε. ²⁷ An fa ka a fɔ an yε ko an ka a lɔn ko a muso Rasɛli ka dencɛ fila-pe le sɔrɔn a yε. ²⁸ Ko kelen da tunun a ma. Ko a miri rɔ, ko wara juu le ka a mira ka a rafarafara. Ko kεbi wo lon, a ma a yen butun. ²⁹ Ko ni an wara do nin fanan di don? Ni ko ka a sɔrɔn taama rɔ, ko a kɔrɔyani ri faa ninnafin dɔ. An fa kan ten.

³⁰ «Nba, ni n ka n kɔseyi i la jɔnce, n fa, ma sisen ka den to n kɔ yan, wo tε bɛn. Den wo le ye n fa la ko bεε ri. ³¹ N fa wa a yen tuma mɛn na ko den wo ma a kɔseyi an fe, a ri faa. An fa kɔrɔyani ri faa jusumakasa rɔ, wo le rɔ an di kε wo sababu ri. ³² Ka a la wo kan, n ka n lɔ den na kunko la. N ka a fɔ n fa yε ko ni n ma kɔseyi den di a ma, n fa hake ri to nde kan kadawu. ³³ I jaandi, i ye n kε i la jɔn di den nɔ rɔ, kosa den di a kɔseyi a kɔrɔceilu kɔ fe. ³⁴ N ye n kɔseyila n fa ma di, ni den tε n bolo? N tε i se n fa jusumakasani yenna fewu.»

45

Yusufu ka a jεrε yiraka a badenmailu la

¹ Nba, Yahuda banni kumala, Yusufu ma se a jεrε mirala a la jɔnilu jana. A ka alu jamari ko alu bεε ye bɔ. Mɔɔ gberε si tun tε ye tumana mɛn na, fo Yusufu ni a badenmailu, Yusufu ka a jεrε yiraka

alu la. ² A kasira kosebe, fo Misirankailu ka a kasi kan men kɔkan. Wo ko fɔra mɔɔilu jana Misiran mansa wara.

³ Yusufu ka a fɔ a badenmailu ye ko: «Yusufu le nde ri! N fa kɛndɛ wa?» Yusufu badenmailu ma se a jabilä, baa alu silanni tere kojuuya. ⁴ Yusufu kan ko: «Ai ye i madon n na.» Alu ka i madon a la tuma men na, a kan ko: «Ai badenma Yusufu le nde ri, ai ka men san Isumayila bɔnsɔn julailu ma men ye taala Misiran. ⁵ Ai jusu kana a lafin. Ai kana mɔne ai jere ma n san ko rɔ. Alla le ka n nana ai jɛ yan sa n di ke sababu ri ka mɔɔilu kisi kɔnkɔ ma. ⁶ Kɔnkɔ san fila le jamana kɔndo jin. A ra to san loolu le ma, senekelailu ti nala foyi sɔrɔnna sene rɔ. ⁷ Alla le ka n lɔ ai jɛ yan ka an to yan an fa bɔnsɔnilu kisibaya kanma, sa ai bɔnsɔn kana tunun dunuya ma. ⁸ Ai le ma n nana yan de. Alla le ka n nana yan ka n ke Misiran mansa lalila ri, ka n nasii mansa la bon kun na, ka n nasii Misiran jamana bɛɛ kun na. ⁹ Ai ye ai kaliya ka i kɔseyi n fa ma. Ai ye a fɔ a ye ko a dence Yusufu kan ko Alla ra a lasii Misiran jamana bɛɛ kun na. Ko a ye a kaliya ka na n tereñ yan. ¹⁰ Ko a ri a sii Koseñi jamana rɔ, ka to n tɔrɔfɛ yan. Ko a ye na, a ni a la denilu ni a la mamarenilu ni a la kolofenilu ni a bolofen bɛɛ. ¹¹ Ko n di alu balo, baa kɔnkɔ ri san loolu ke fɔlɔ. Sa a ni a la mɔɔ bɛɛ kana bolokolonya kojuuya.»

¹² Yusufu kan ko: «Nba, ai ja yen n na sisen. N doocɛ Beniyaminu fanan ja yen n na. Ai ra a yen ko Yusufu jere le kumala ai ye. ¹³ Mɔɔilu ye n bonyala ja men ma Misiran yan, ai ye wo fɔ n fa ye. Ai ra fen fen yen ai ja la yan, ai ye wa wo bɛɛ fɔ a ye, ka ban ka na a ri jona.»

¹⁴ Nba, Yusufu ka a ton a dooce Beniyaminu kan ka kasi. Beniyaminu fanan ka a ton a kan ka kasi. ¹⁵ Yusufu kasimantɔ ka a ton a kɔrɔcɛ kelen kelenna bɛɛ kan ka alu sunbu. Wo le ka a ke, a kɔrɔcɛilu ka kuma damira a fɛ.

Misiran mansa kan ko Yakuba ye na Misiran

¹⁶ Nba, Yusufu badenmailu na ko fɔra Ferawuna wara tuma mɛn na, wo diyara mansa ni a la jɛmɔɔ bɛɛ yɛ. ¹⁷ Mansa ka Yusufu kili ka a fɔ a yɛ ko: «A fɔ i badenmailu yɛ ko alu ye alu doninilu la alu la falilu kɔ kan ka alu kɔseyi Kanaan jamana rɔ. ¹⁸ Alu wa se ye, alu ye alu fa ni alu la mɔɔ bɛɛ ta ka na alu ri n ma. N di duu jnuma di alu ma, mɛn ka ji duu bɛɛ ri Misiran. Alu ri an na jamana balo jnuma damun. ¹⁹ I ye a fɔ i badenmailu yɛ fanan ko alu wa ke wala, alu ye wontoro doilu ta Misiran yan. Alu wa se alu fa wara, alu ri alu musoilu ni alu denilu ni alu fa lasii wontoro woilu kɔndɔ ka na woilu ri yan. ²⁰ Ni alu bolofen doilu tora alu kɔ ye, alu kana hamin woilu la, baa Misiran fen jnumajumailu le ditɔ alu ma yan.»

²¹ Nba, Misiran mansa ka mɛn fɔ Isirayɛli denilu yɛ, alu ka wo ke. Yusufu ka wontoroilu di alu ma, ka bɛn mansa la kuma ma. A ka sila fanda suman fanan di alu ma.

²² A ka faanin kura di alu kelen kelenna bɛɛ ma, kɔni a ka wodigbɛ kɛmɛ sawa ni faanin kura loolu di Beniyaminu ma. ²³ A ka a fa sanba falice tan ni falimuso tan na. A ka falice woilu donin Misiran fen jnumailu la, ka falimusoilu donin sumankisɛ ni buru ni damununfen gbereilu la, mɛnilu ri a fa balo taama rɔ. ²⁴ A ka sila di a badenmailu ma wo rɔ ka a fɔ alu yɛ ko: «Ai kana silan de!»

²⁵ Alu bɔra Misiran ka wa alu fa Yakuba t̄erēn Kanaan jamana rɔ. ²⁶ Alu seni ye, alu ka a fɔ a yε ko: «Yusufu kende le! Ale le jere siini Misiran ja-mana bεe kun na sisen.» Kuma wo bararɔ Yakuba rɔ fo ka a dan natamin. A ma la a la fewu.

²⁷ A denceilu ka Yusufu la kuma bεe lase a ma-tuma mεn na, Yakuba ka wo bεe mεn ka won-toroilu yen fanan, Yusufu ka mεnilu lana a ta kanma. Wo le rɔ, a sewara ka a jaalen. ²⁸ A kan ko: «N dencε Yusufu kende fɔlɔ! Nde tε foyi jininnna butun ka tamin wo kan. N di wa n ja la a kan sisen sani n ye sa.»

46

Yakuba watɔla Misiran

¹ Wo rɔ, Isirayeli ka a bolofen bεe ta ka sila mira ka wa Misiran. A sera Bεri Seba, a ka saraka bɔ ka a di a fa Isiyaka Maari Alla ma.

² Su wo rɔ, Alla ka Isirayeli kili ko: «Yakuba, Yakuba!» A ka jabi: «Naamun.» ³ Alla kan ko: «N ye i fa Maari Alla le ri. I kana silan Misiran taa ko rɔ, baa n di i bɔnsɔn siyaya ye kosebε kosebε. ⁴ N jere di wa i kɔfε Misiran. N jere le kεtɔ i bɔnsɔn nanala yan fanan. I sa tuma wa se, Yusufu jere ri i jnakis latunun.»

⁵ Wo rɔ, Yakuba wulira ka bɔ Bεri Seba. A denceilu ka a ladon wontoro kɔndɔ, Misiran mansa ka mεn nana a ta kanma. Alu ka alu denilu ni alu musoilu fanan nadon wontoroilu kɔndɔ. ⁶ Alu ka alu la kolofenilu fanan ta, a ni alu bolofenilu bεe, alu ka mεnilu sɔrɔn Kanaan bɔnsɔn na jamana rɔ. Yakuba ni a la denbaya bεe wara Misiran wo ja le ma. ⁷ A denceilu bεe wara a kɔfε, a

ni a denmusoilu, a ni a mamarenilu, a la denbaya b ε k σ nin. Woilu b ε wara Misiran Yakuba k σ f ε .

⁸ Nba Isirayelika menilu wara Misiran, Yakuba ni a la dence ilu kɔnin, wo tɔɔilu le nin di.

Yakuba dence fös tō le ko Ruben. ⁹ Ruben
dence ilu le ten: Henoki, Palu, Hesiran a ni Karimi.

10 Simeyən, wo denceilu le ten: Yemuweli, Yamini, Owadi, Yakən, Sokari, Sawuli. Sawuli na tere Kanaan bɔnsɔn do le ri.

¹¹ Lebi, wo denceilu le Kerisōn ni Kohati ni Mer-
ari ri.

12 Yahuda, wo denceilu le ten: Eri, Onan, Sela, Peresi a ni Seraki, kōni Eri ni Onan sara Kanaan jamana rō. Peresi denceilu le Hesirōn ni Hamuli ri.

¹³ Isakari, wo denceilu le ten: Tola, Puwa, Yøbu a ni Simirøn.

¹⁴ Sabulən, wo denceilu le Serədi ni Elən ni Jaləli
ri.

¹⁵ Leya ka dence menilu sərən Yakuba yε Padani Aramu, woilu le woilu ri. A ka denmuso do fanan sərən a yε ye, men təo ko Dina. Yakuba bənsən menilu bəni Leya rə, wo bεe ladenni kera məo bisawa ni məo sawa le ri.

¹⁶ Kadi, wo denceilu le ten: Sefon, Haki, Suni, Esibon, Eri, Arödi, a ni Arëli.

17 Aséri, wo dence'ilu le ten: Imina, Isiba, Isibi a ni Beyira. Aséri denmuso tə̄ ko Sera. Beyira dence'ilu le Keberi ni Malikiyeli ri. **18** Silipa wo tere jə̄nmuso le ri, Laban ka mə̄n di a denmuso Leyama. Yakuba bə̄nsən mə̄nilu bə̄ni Silipa rɔ, wo bə̄e ladənni kə̄ra mə̄o tan ni wə̄orə le ri.

19 Yakuba muso Raseli denceilu le Yusufu ni Beniyaminu ri. **20** Asanati ka dence fila sərən Yusufu ye Misiran. Do təə ko Manase. Do təə ko Efirayimu. Asanati təre Potifera denmuso le

ri, men tere ye Oni so maoilu la joo sarakalasela ri. ²¹ Beniyaminu denceilu le ten: Bela, Bekeri, Asibeli, Jera, Naman, Ehi, Rensi, Mupimi, Hupimi a ni Aridi. ²² Raseli ka dence menilu soron Yakuba ye, woilu le woilu ri. Yakuba bonsen menilu boni Raseli ro, wo bee ladenni kera mao tan ni naanin le ri.

²³ Daan, wo dence le Husimu ri.

²⁴ Nefitali, wo denceilu le ten: Jaseli, Kuni, Jeseri, a ni Silemu.

²⁵ Bilaha ka dence menilu soron Yakuba ye woilu le woilu ri. Bilaha wo tere jomuso le ri, Laban ka men di a denmuso Raseli ma. Yakuba dence menilu boni Bilaha ro, wo bee ladenni kera mao waronwula le ri.

²⁶ Mao menilu wara Misiran Yakuba kofe, menilu boni ale ro konin, woilu bee ladenni tere mao biwaro ni mao waro le ri. A biranmusoilu ma jate.

²⁷ Yusufu ka dence fila soron Misiran. Nba, Yakuba la mao menilu nara Misiran, wo bee ladenni kera mao biwaronwula le ri.

Yakuba sera Misiran

²⁸ Nba, Yakuba ka Yahuda lawa a ne Misiran, ka wa a fo Yusufu ye ko alu ye i neen ben Koseni jamana ro. Yakuba ni a la maoilu sera Koseni tuma men na, ²⁹ Yusufu donda a la sowontoro kondro ka wa a fa kunben Koseni. A ka a fa yen tuma men na, a ka a fa laben ka a ke a konkondro ka kasi. A menda kasila kosebe.

³⁰ Yakuba ka a fo Yusufu ye ko: «Hali ni n sara bi, wo te baasi ri, baa n da i yen, ka a lbn ko i kendre le.»

³¹ Yusufu ka a fo a badenmailu ni a fa la tsilu ye ko: «N di wa a fo mansa ye ko n badenmailu ni n fa la maoilu bee ra bo Kanaan bonsen na jamana ro ka na n ma. ³² N di a fo a ye ko ai bee

ye kolofen kənəmadenilu le ri, ko ai la baara le kolofen namara ri. N di a fō a ye ko ai ra na ai la kolofen bəε ri, a ni ai bolofenilu bəε. ³³ Wo rɔ, ni mansa ka ai kili ka ai la baara majininka, ³⁴ Ai ye a jabi: «An tii, an ye kolofen namarala le ri kəbi an na denniya tumana. An benbailu bəε ka wo baara le kε.» Ni ai ka a jabi wo ja mən ma, a ri sən ai ye ai sii Koseni jamana rɔ, baa kolofen kənəmadenilu ma di Misirankailu ye muumε.»

47

Yusufu ka a la məəilu yiraka Misiran mansa la

¹ Wo rɔ, Yusufu wara a fō Misiran mansa ye ko: «N fa ni n badenmailu ra na ka bə Kanaan bənsən na jamana rɔ. Alu nani alu la kolofenilu ri, a ni alu bolofen bəε. Alu ye Koseni sisen.» ² Yusufu ka a badenma loolu yiraka mansa la, a ka mənilu lana wo kanma mansa wara. ³ Mansa ka woilu majininka ko: «Ai la baara ye nfen di?» Alu ka mansa jabi: «An tii, an ye kolofen kənəmadenilu le ri, iko an benbailu tərε ye ja mən ma. ⁴ An nani sii diya ḥininna i wara yan, ka a masərən kənkəra gbəleya an kan Kanaan bənsən na jamana rɔ. Kolofenilu la damunun tε ye butun. Wo rɔ, an tii, an ye i madiyala, i jaandi, i ye dijε an ye an sii Koseni jamana rɔ.»

⁵ Mansa ka a fō Yusufu ye ko: «I fa ni i baden-mailu ra na i ma. ⁶ An na jamana Misiran ye i ta le ri. Wa i fa ni i badenmailu lasii yɔrɔnumajuma rɔ, yɔrɔ mən ka ni a tə bəε ri. Alu ye alu sii Koseni. Ni i ka doilu sərən alu rɔ, mənilu kusan kolofen marala kosəbε, i ye n na kolofen fanan don woilu bolo.»

⁷ Yusufu ka a fa Yakuba lana ka a yiraka mansa la. Yakuba duwara mansa ye. ⁸ Mansa ka Yakuba majininka ko: «N fa, i sərən da san yəli bə?» ⁹ Yakuba kan ko: «N da san kəmə ni san bisawa sərən n na dunujaratee bəe rə, wo bəe rə, n si ma siya a ni n da tərəya siyaman sərən. N si ma siyaya ikomin n failu ka si sərən alu la dunujaratee rə ja mən ma.»

¹⁰ Yakuba duwara mansa ye iko ka wa.

¹¹ Yusufu ka duu di a fa ni a badenmailu ma ka alu lasii Misiran jamana rə iko mansa ka a fə a ye ja mən ma. Duu wo tere ye Raməsisi le. Yərə wo ka ji jamana yərə tə bəe ri. ¹² Yusufu ka a fa ni a badenmailu ni a fa la məo balo, bəe ni a la denbaya.

Kənkə juuyara

¹³ Nba, kənkə juuyara kosəbə, ka a masərən suman tun tə sərənna fan si. Məo ilu fanka tere ye desela kənkə bolola Misiran jamana ni Kanaan bənsən na jamana rə. ¹⁴ Misirankailu ni Kanaankailu ka alu la wodi bəe san Yusufu ma suman na. Yusufu ka wodi wo mira Misiran mansa ye ka wa a di a la bon na. ¹⁵ Wodi banda Misirankailu ni Kanaan bənsən bolola tuma mən na, Misiranka bəe nara Yusufu tərən ka a fə a ye ko: «Suman di an ma. I kana sən an ye faa i jana ten. An na wodi bəe ra ban fewu.»

¹⁶ Yusufu ka alu jabi: «Ni ai la wodi banda, ai ye na ai la kolofenilu ri, ka wa woilu falən suman na.»

¹⁷ Wo rə, alu nara alu la kolofenilu ri Yusufu ma. Soilu ni saailu ni bailu ni nisilu ni falilu, alu nara wo bəe ri. Yusufu ka kolofen wo bəe falen suman na, ka məo ilu balo san kelen wo kərə.

¹⁸ San wo taminni, alu nara Yusufu tərən iko, ka a fə a ye ko: «An fa, i ka a lən ko an na wodi ra ban.

An na kolofen b ε e ra k ε i ta ri fanan. Foyi ma to an bolo fo an j ε re ni an na duu. ¹⁹ I jaandi, i kana s \ddot{o} n an ye faa i j \ddot{o} na ten, sa an na duu rakolon kana to. I ye an ni an na duu san suman na. An di k ε mansa la j \ddot{o} nilu ri. An na duu ri k ε a ta ri. I ye suman di an ma, sa an di balo. I ye si di an ma, sa an na seneilu lakolon kana to.»

²⁰ Wo r \circ , Yusufu ka Misiran duu b ε e san mansa y ε . Misirankailu b ε ka alu la seneilu san, ka a mas \ddot{o} r \ddot{o} n k \ddot{o} nk \ddot{o} ra juuya foo ka a dan natamin. Jamana duu b ε e k \ddot{o} ra mansa ta r \ddot{o} na wo le ma. ²¹ Ka b \circ jamana kun do la, ka wa bila a kun do la, Yusufu ka jamana m \ddot{o} gilu ke j \ddot{o} nilu ri. ²² A ka duu b ε e san, fo duu men tere ye m \ddot{o} gilu la joo s \ddot{o} lailu bolo, baa mansa tere ye m \ddot{o} gilu la joo s \ddot{o} lailu s \ddot{o} la suman na tuma b ε e. Suman wo k \ddot{o} ra woilu balo ri. Wo le kos \ddot{o} n woilu ma alu la duu san.

²³ Yusufu ka a f \circ m \ddot{o} gilu y ε ko: «N da ai ni ai la duu san mansa ye bi. Nba, ai ye si jin ta ka wa a foyi ai la seneilu r \circ , ²⁴ k \ddot{o} ni ai wa suman men ka, ai ye wo tala loolu ri, ka tala kelen di mansa ma. A t \circ naanin, ai ta le wo ri. Ai ye do k ε si ri, ka do k ε balo ri, sa ai ri ai j ε re ni ai denilu ni ai wara m \ddot{o} gilu b ε e balo.» ²⁵ Alu ka Yusufu jabi: «An fa, i ra kojuma k ε an y ε ka an kisi k \ddot{o} nk \ddot{o} ma. An di k ε mansa la j \ddot{o} nilu ri.»

²⁶ Yusufu ka sariya sii Misiran jamana r \circ ko m \ddot{o} gilu wa suman men ka, wo ye tala loolu ri, ka tala kelen di mansa ma. Sariya wo siini ye folo haan bi. M \ddot{o} gilu la joo sarakalaselailu la duu le d \ddot{o} r \ddot{o} n ma k ε mansa ta ri.

²⁷ Nba, Isirayeli la m \ddot{o} gilu ka alu sii Koseni ja-mana r \circ Misiran. Alu ka nanfulu s \ddot{o} r \ddot{o} n ye ka jiri

kosεbe.

²⁸ Yakuba si bεe ladenni kεra san kεmε ni san binaanin ni san wɔrɔnwula le ri. A ka san tan ni wɔrɔnwula ke Misiran jamana rɔ. ²⁹ A sa waati sudunyanin tuma mεn na, a ka a dencε Yusufu kili ka a fɔ a yε ko: «Ni n duman i yε, i ye i bolo la n woro kɔrɔ ka lahidi ta n yε ko i ka kan ka jumaya mεn ke n yε, i ri wo ke ka kankelentiyya ke n yε n na saya kɔrɔ, ko i tε n suu don Misiran jamana rɔ yan fewu. ³⁰ N ye a fε i ye n suu don n benbailu suu don diya. Iye n suu ta ka bɔ Misiran ka wa a don diya wo rɔ.» Yusufu kan ko: «N di a ke ikomin i ka a fɔ ja mεn ma.»

³¹ Yakuba kan ko: «I kali n yε.» Yusufu ka a kali a yε. Wo rɔ, Yakuba ka i birin a la lafen kun na ka Alla bato.

48

Yakuba duwara Yusufu dencεilu yε

¹ Waati wo taminni a fɔla Yusufu yε ko a fa ma kεndε. Wo rɔ, a ka a dencε fila ta, Manase ni Efirayimu kɔnin, ka wa a fa tuwa. ² A fɔra Yakuba yε tuma mεn na ko a dencε Yusufu ra na, a ka a raja ka i wuli, ka i sii a la lafen kan. ³ Yakuba ka a fɔ Yusufu yε ko: «Alla Sebεtii bɔra gbe rɔ n yε Lusi so dafe Kanaan jamana rɔ, ka jumaya ke ka baraka don n na kɔ rɔ. ⁴ A ka a fɔ n yε ko: «N di i jiri, ka i bɔnsɔn siyaya ka a ke jama siyaman ba ri. N di jamana jin di i bɔnsɔn ma i kɔma rɔ, ka a ke alu ta ri kadawu.»» ⁵ Yakuba ka a fɔ Yusufu yε ko: «I ka i dencε Efirayimu ni i dencε Manase sɔrɔn Misiran yan ka a teren n tun ma na i tɔrɔfε fɔlɔ, kɔni sisen, n da woilu ke n denilu ri. Efirayimu ni Manase ra ke

n ta ri sisen ikomin Ruben ni Simeyən ye n ta ri ja
mən ma. ⁶ Ni i ka den mənilu sərən woilu kə, woilu
ri kə i ta ri. Woilu bənsən di duu sərən Efirayimu ni
Manase bənsən ta ni rə. ⁷ N bəra Padani Aramu rə
ka n kəseyi n fa wara tuma mən na, Rasəli sara ka
n ninnafin kojuuya. A sara sila la Kanaan bənsən
na jamana rə, ka a təren an tun da sudunya Efirata
so la. N ka a suu don Efirata sila la ye.» Efirata mən
təo bi ko Bətilehəmu.

⁸ Isirayəli ka Yusufu denceilu yen tuma mən na,
a kan ko: «Yon de jinilu ri?» ⁹ Yusufu ka a fa jabi:
«Alla ka dence filə mən di n ma yan, woilu le jin
di.» Yakuba kan ko: «Alu lana n ma yan, sa n di
duwawu kə alu yε.» ¹⁰ Isirayəli ja lafinni tərə. A tun
te fen nasala kosebə butun. Yusufu ka a denceilu
madon a la tuma mən na, Isirayəli ka a ton alu kan
ka alu sunbu. ¹¹ A ka a fə Yusufu yε ko: «N ma a
lən fewu ko n di i yen butun, kəni Alla ra a kə n da i
denceilu fanan yen sisen.» ¹² Yusufu ka a denceilu
ta ka alu bə a fa sen kan, ka a majii, ka a kun majii
a fa kərə. ¹³ A wulira ka a denceilu madon a fa la,
ka Efirayimu lasii a fa bolomaran fe, ka Manase
lasii a fa bolokinin fe. ¹⁴ Hali wo, Isirayəli ka a bolo
latamin a jəən kə rə. A ka a bolokinin natamin ka
a la Efirayimu kun də, ni a ye doomamərə ri. A ka
a bolomaran natamin ka a la Manase kun də, wo
mən ye den fələ ri. ¹⁵ Wo rə, a duwara Yusufu yε
ko:

«N benba Iburahima ni n fa Isiyaka tərə ye taamala
ka bən Alla mən kan ma,
wo ye jumaya kə den jinilu yε.
Alla mən ka a lə n jərə ka a damira n sərən waati
ma haan ka se bi ma,

wo ye jumaya ke den jinilu ye.

¹⁶ Alla mən nara n ma iko mələka, ka n kisi kojuu
bəe ma,

Wo ye jumaya ke den jinilu ye.

Denilu sababu la n təo kana tunun,

A ni n benba Iburahima təo ni n fa Isiyaka təo.

Ka alu bənsən siyaya a ja jere jere ma duukolo kan,

Alla ma wo kəra.»

¹⁷ Yusufu ka a yen tuma mən na ko a fa ra a bolokinin la Efirayimu kun də, wo ma diya Yusufu ye. A ka a fa bolo mira ka a bə Efirayimu kun də, ka a la a dence fələ Manase kun də. ¹⁸ A ka a fə a fa ye ko: «N fa, i filinin de. Den fələ le Manase ri. I bolokinin la wo kun də.»

¹⁹ A fa, kənin, ma sən wo ma. A kan ko: «N dence, n ye mən kəla, n ka wo lən jə. Manase bənsən fanan di siyaya ka ke kabilia ba ri. A ri bonya, kəni a dooce ri bonya ka tamin a kan. A dooce bənsən di ke jama siyaman di.» ²⁰ A duwara alu ye wo lon. A kan ko: «Isirayəlikə di duwa məəilu ye ai təo le rə ka a fə ko: «Alla ma i kəra iko Efirayimu ni Manase ye ja mən ma.»»

Wo rə, Yakuba ka Efirayimu bila Manase je. ²¹ A ka a fə Yusufu ye ko: «N satə le, kəni Alla ri to ai fe. A ri ai laseyi ai fa wara Kanaan jamana rə ikə. ²² N di i sə ka tamin i badenmailu kan, ka Sikəmu koyinkəma yərə di i ma. N ka Amərikailu kəle n na fanmuru ni kalabiye la ka yərə juma wo mira alu la.»

49

Yakuba ka mən fə a satəla la

¹ Yakuba ka a dence ilu kili ko:

«Ai ye na ai ladən n tɔrɔfɛ. N ye a fɛ ka koilu lase ai
ma, mənilu kɛtɔ alu la sini natɔ kɔnin.

² N dencɛilu, ai ye na ai tolo malɔ nde ai fa Yakuba
la,

a ye fola n ma ko Isirayɛli.

³ Rubɛn, ile le n dencɛ fɔlɔ ri.

I fɔlɔ le kɛra n na cɛya ni n na fanka fɔlɔ ri.

Bonya ni sebaaya ye i bolo ka tamin i doocɛilu kan,

⁴ kɔni i ye ikomin ji ba woyetɔ, mən ti se a jɛrɛ
mirala.

I ti nala kɛla bonkun ri fewu, baa i ra i la i fa la lafen
kan ka si a muso fɛ.

A ka a la n na lafen kan ka a manɔɔ.

⁵ Simeyɔn ni Lebi miriya ye ko kelen de ri.

Alu ka ie la fanmuruilu ta ka wa tijannin kɛ.

⁶ Alu wa kuma gbundu rɔ, n te sɔn ka n sen bila wo
rɔ.

Alu wa ladən kɛ, n di n ban wala,
baa alu mənɛra ka mɔɔilu faa.

Alu juuyara ka nisilu sen fasailu tɛɛ.

⁷ Alla ye tɔrɔya la alu kan alu la mənɛ wo kosɔn, baa
alu la mənɛ ka juu,

a ni alu la nənikɛjuuya wo kosɔn, baa alu la
nənikɛjuuya ka alu kɛ hinabaliilu le ri.

N di alu bɔnsɔn dataala Yakuba bɔnsɔn na jamana
rɔ.

N di alu lajensɛn Isirayɛlika la jamana yɔrɔ bɛɛ rɔ.

⁸ Yahuda, i badenmailu ri ile le tando.

I ri se i juuilu la.

I faludenmailu ri alu majii i kɔrɔ.

⁹ Yahuda ye ikomin yara kanberen de,
mən di wa sobo faa ka wo damun,
ka na i rasəmɔn ka i la.

Yon di a lawuli?

¹⁰ Faamaya gbeleke tɛ bɔ Yahuda bolo.

Mansaya gbeleke ri to a bɔnsɔn bolo
fo mansaya tii wa na,
dunuŋa bεε ri i majii mɛn kɔrɔ.

11 A ri a la fali sidi rɛsenju la,
ka a la faliden sidi rɛsenju ɲuma ɲuma la.
A ri a la faanin ko rɛsenji la,
ka a la durukiba ko rɛsenji la, mɛn wulenni ikomin
jeli.

12 A ri rɛsenji min fo ka a ɲailu lafin.
A ri nɔnɔ min fo ka a ɲi gbe.

13 Sabulɔn di i sii kɔɔji da la.

Kulunbailu lɔ diya ri kε a wara ri.
A la duu ri wa foo Sidɔn so fan fε.

14 Isakari ye ikomin fali, fanka ba ye mɛn na.

A ri a la a la donin bɔrɔilu tɛma.

15 Ni a ka a yen tuma mɛn na
ko jamana wo ka ɲi,
ko yɔrɔ wo duman kosebε,
a ri a kɔ rabɛn donin ta kanma
ka kε jɔn di ka diyagboya baara kε.

16 Daan di a sii a la mɔɔilu kun na ka alu la kitii tεε,
a ri kε ikomin Isirayeli kabila tɔilu fanan.

17 Daan ye ikomin sa, mɛn lani sila dafε,
ikomin fɔnfɔnni, mɛn ye sila misenilu la.

A ri so cin a sen ma,
ka so tii labe a kɔ kan.»

18 Yakuba kan ko: «ɛɛ Allabatala, n ye i
makɔnɔla, i ye n kisi.»

19 A kan ko:
«Benkanninnailu ri na be Kadi kan,
kɔni a ri alu gbɛn ka alu kɔsarān kojuuya.

20 Aseri ri suman duman sɔrɔn;
a ri damunun fen duman di mansailu ma.

21 Nefitali a la fərenin ikomin minanmuso, mən ye
a jərə ma,

mən ye den ɲumailu sərənna a jərə ma.

22 Yusufu ye ikomin jiri mən ye a denna kosebə,
jiri mən ləni kə dafə,
mən bolo ye janyanna foo ka tamin dandan kun
na.

23 Kalabijnetiilu wulira a kanma kojuuya.

Alu ka bijəilu lafli a ma ka a tərə kosebə,

24 kəni Yusufu la kala ma yərəyəre.

A boloilu ka fanka sərən Alla Sebeetii bolo,
mən ye Yakuba dəmənna.

Wo le ye məo latankala le ri,

mən ye Isirayeli lakandala,

mən barakani ikomin farakolo.

25 I fa Maari ye i dəmənna.

Alla Sebeetii ye ɲumaya kəla i yε.

A ri fen ɲumailu di i ma ka bə san ma.

A ri ji di i ma ka bə duu kərə.

A ri i denilu ni i la kolofenilu siyaya.

26 Fen ɲumailu ye bəla koyinke kərəilu la,

nanfuluilu ye bəla fələ tindilu la,

kəni Alla ka ɲumaya mənilu ke i fa yε, woilu ka bon
woilu bε ri.

Alla ye wo ɲən kə Yusufu yε.

Alla ye a kε, ɲumaya woilu ye mən Yusufu fε,

mən ɲenemətəmənni ka bə a badenmailu rə.

27 Beniyaminu fadima ikomin wara.

Səəma a ye sobo mirala ka do damun.

Wura la, a ri a tə ratala.»

28 Nba, Isirayeli kabila tan ni fila le woilu ri. Alu
fa duwara alu yε tuma mən na, a ka kuma woilu

fɔ. A duwara alu kelen kelenna bɛɛ ye, bɛɛ ni a la duwa.

Yakuba la saya

²⁹ Nba, Yakuba ka a fɔ a dencɛilu yε ko: «N satjla le ka la n benbailu kan. Ni n sara, ai ye wa n suu don n benbailu dafɛ falan na, falan mɛn ye Hɛtika Efurɔn na sene rɔ. ³⁰ Falan wo ye Makipela, Mamere telebɔ fan fɛ Kanaan bɔnsɔn na jamana rɔ. N benba Iburahima ka dinkira wo le san Hɛtika Efurɔn ma, ka a kɛ a la suu don diya ri. ³¹ N benba Iburahima ni a muso n ma Saran suu don diya ye ye le. N fa Isiyaka ni a muso n na Rebeka fanan suu don diya ye ye le. N ka Leya suu don ye le fanan. ³² Duu wo ni falan bɛɛ sanda Hɛtika de ma.»

³³ Nba, Yakuba banni kumala, a ka a la a la lafen kan ka sa, ka la a benbailu kan.

50

¹ Yusufu ka a ton a fa suu kan ka a sunbu ka kasi. ² Nba, Yusufu ka a fɔ a la dandalilailu yε ko alu ye a fa fure rabɛn ka baara kɛ kosa a kana toli, ka ban ka a mamininminin. Alu wara Isirayeli fure rabɛn. ³ Alu ka tele binaanin kɛ baarala. Alu la fure rabɛn ja le wo ri. Misirankailu ka tele biwɔrɔnwula kɛ a saya kasila.

⁴ Saya kasi waati wo taminni, Yusufu ka a fɔ Misiran mansa la mɔɔbailu yε ko: «Ni n na ko diyara ai yε ai ye wa kuma mansa yε. Ai ye a fɔ a yε ko ⁵ n fa ka kuma do fɔ n yε a sa tumana la. A kan ko n ye n kali a yε ko ni a sara, ko n di wa a suu don Kanaan bɔnsɔn na jamana rɔ. Ko a ka suu don diya mɛn dabɛn a jɛrɛ yε, ko n ye wa a suu don dinkira wo rɔ. N fa kan de wo ri. Wo rɔ, n ye mansa

madiyala, a ye sɔn n ye wa n fa suu don. N wa ban, n di na.»

⁶ Ferawuna ka jabi: «Wa i fa suu don iko i ka i kali a ye ja men ma.»

⁷ Wo rɔ, Yusufu wara a fa suu don diya. Misiran mansa la jɛmɔ bɛɛ wara a malɔ, a ni mansa wara mɔɔbailu ni Misiran jamana mɔɔbailu. ⁸ Yusufu wara mɔɔ bɛɛ fanan wara, a ni a kɔrɔceilu ni a dooce ni a fa wara mɔɔ bɛɛ. A den ni ala kolofenilu le tora alu kɔ ma Koseni. ⁹ Sowontoro tiilu ni so tiilu fanan wara Yusufu malɔ. A kera jama siyaman ba le ri.

¹⁰ Alu sera Atadi la gberema Juridɛn ba da waati men na, alu bɛɛ ka san kasi ke ye, ka kule kan ba labɔ. Yusufu ka tele wɔrɔnwula ke san kasila ye. ¹¹ Ye duurenili, Kanaan bɔnsɔn kɔnin, woilu ka wo yen tuma men na alu kan ko: «Misirankailu ra saya kasi ba le ke ten de!» Wo le kosɔn dinkira wo tɔɔ lara ko Abela Misirayimu, yɔrɔ men ye Juridɛn ba da la.

¹² Nba, Yakuba satɔla ka men fɔ a dencɛilu yɛ, alu ka wo ke. ¹³ Alu wara a suu ri Kanaan jamana rɔ, ka a suu don falan na Makipela, Mamere telebɔ fan fɛ, falan a ni duu men Iburahima ka san Hɛtika Efurɔn ma, ka a ke a la suu don diya ri. ¹⁴ Yusufu banda a fa suu donna tuma men na, a ka a kɔseyi Misiran. A badenmailu ni menilu bɛɛ wara a fɛ a fa suu don diya, woilu bɛɛ ka alu kɔseyi a fɛ.

¹⁵ Nba, Yusufu kɔrɔceilu ka a yen ko alu fa Yakuba tɛ alu fɛ butun. Wo rɔ, alu ka a fɔ i jɔɔn yɛ ko: «An ka kojuu men ke Yusufu la, ni an gboyara a yɛ don? A tɛ wo julu sara an na wa?» ¹⁶ Wo le rɔ, alu ka kela lawa Yusufu ma ko: «Sani i fa ye sa, a ka kuma do fɔ. ¹⁷ A kan ko an ye a fɔ i yɛ. Ko i jaandi,

i ye i kɔrɔc̄eilu la hak̄e ni alu la juluman yafa alu ma, alu ka m̄en ke i la. An fa kan de wo ri. Wo rɔ, an ye i madiyala, i ye yafa an ma an na kojuuilu rɔ, ande m̄enilu ye i fa Maari la j̄onilu ri.» Kela wo fɔra Yusufu ye tuma m̄en na, a kasira.

¹⁸ A kɔrɔc̄eilu j̄ere nara alu majii a kɔrɔ duu ma, ka a fɔ a ye ko: «Ande ye i la j̄onilu le ri.» ¹⁹ Yusufu ka a fɔ alu ye ko: «Ai kana silan. N ye Alla n̄o le rɔ wa? ²⁰ M̄en kera n na, ai ka wo ke kojuu ke kanma, k̄oni Alla ka wo ke kojuma le ke kanma, kosa m̄o siyaman di kisi n bolola yan bi. ²¹ Wo rɔ, ai kana silan. N di n janto ai rɔ, ai ni ai denilu b̄ee.» Yusufu kumara alu ye kaninteya la, ka alu jusu suma.

Yusufu la sayā

²² Nba, Yusufu ni a fa la m̄oɔilu tora Misiran. Yusufu si b̄ee ladenni k̄era san k̄em̄e ni san tan de ri. ²³ A ka a tolomirailu yen, a denc̄e Efirayimu ni a denc̄e Manase mamarenilu k̄onin. Manase denc̄e Makiri,* wo ka denilu s̄or̄on tuma m̄en na, alu nara a la Yusufu sen kan.

²⁴ Lon do rɔ, Yusufu ka a fɔ a badenmailu ye ko: «N sat̄la le, k̄oni Alla ri a janto ai rɔ ka ai ta ka bɔ jamana j̄in dɔ ka wa ai ri lahidi jamana rɔ, baa a ka kali an benba Iburahima ni an benba Isiyaka ni an fa Yakuba ye ko jamana wo ri ke alu ta ri.» ²⁵ Yusufu ka a fɔ a badenmailu ye ko: «Ai ye i kali n ye ko Alla wa na ai d̄em̄en ka ai labɔ Misiran yan, ko ai ri wa n koloilu ri.»

²⁶ Yusufu sara Misiran ka a t̄er̄en a s̄or̄on tun da san k̄em̄e ni san tan bɔ. Misirankailu ka a suu raben ka baara ke sa a kana toli. Wo banda m̄en

* ^{50:23} Yusufu le ka Makiri la den nabalo

A Damira 50:26

cxxxviii

A Damira 50:26

kε, alu ka a mamininminin ka a la suu balankari
kɔndɔ Misiran.

**Alla la Kitabu Seniman
Portions of the Holy Bible in the Sankaran Maninka
language of Guinea
Des portions de la Sainte Bible dans la langue
Sankaran Maninka de Guinée**

copyright © 2015 Pioneer Bible Translators

Language: Sankaran Maninka

Translation by: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 11 Nov 2022 from source files
dated 29 Jan 2022

bb49d365-c43a-57d0-a386-570745648030